

## Tuhun vaha nacaḥyí Lucas sahá ña naja na apóstol

### *Nasahan Jesús tuhun a quixi ínima yii Ndióxi*

<sup>1</sup> Jihna sa nacaḥyí i in libro ña ná candoo a nu ndóhó, tá Teófilo. Mé libro cán cáhan ndihi a sahá ña naja Jesús ta cáhan ndihi a sahá ña najánaḥa mé á tá nacasáhá cája chúun a <sup>2</sup> ta janda tá nandaa cuahan indiví. Tá nasahin a ñuyíví yóho ta cámani cuhun a indiví já naxaxi Jesús uxu ivi dataa cacuu da apóstol ña ná caja chúun na cuéntá mé á. Ta naja ínima yii Ndióxi ña ná cuu jánaḥa Jesús nuú na cán ña ndítahan nu ná caja na. <sup>3</sup> Ta tá sa naxihi Jesús ta nanditacu tucu a já naxica nuu a ñuyíví yóho tixi ivi jíc quivi. Ta nanaha mé á nuú ndihi na cúu apóstol já ná candaa ini na ña mé a ndaa nanditacu tucu a. Ta najánaḥa nu ná ña cúni Ndióxi cacomí a cuéntá sahá ñayivi.

<sup>4</sup> Tá cámani ndaa Jesús cuhun a indiví já nasahin a xihin na apóstol já nasahnda mé á chuun nu ná já cáchí a já xihin ná:

—Xíni ñuhú candati ndó ñuu Jerusalén yóho anda quiahva xinu ínima yii Ndióxi cañuhu a ini ínima ndo. Jáchi nasahan tátá i tuhun a nu ndo ña quixi ínima yii mé á ndacaan ini ínima ndo ña cán quea najánaḥa i ndohó ña naxachi mé á. <sup>5</sup> Mé a ndaa najácanduta Juan ñayivi xihin ticuú joo tixi chá quivi jándicutú Ndióxi ndohó xihin ínima yii mé á —cáchí Jesús xihin ná.

### *Tá nandaa Jesús cuahan indiví*

<sup>6</sup> Ta ndaja coo tá nataca na cán xihin Jesús já nacasáhá ndáca tuhún na mé á já cáchí na já xihin á:

—Jesús, xitoho nde, á viti quéa quiahva ndó ñamani nuú nde, na Israel cacomí nde cuénta saha mé nde já ná a cacomí ga gobierno ñuu Roma cuénta sahá nde —nacachi na xihin á.

<sup>7</sup> Anda já nanducú ñehe Jesús tuhun nu ná já nacachi a já:

—Co ndítahan toho nu ndóhó candaa ini ndó ndá quivi caja Ndióxi, tátá yo ña jan. Jáchi in tuhún mé á cuití va quéa xini a ndá quivi yaha ña sáhdá mé á coo. <sup>8</sup> Joo ndítahan nu ndó candati ndó yóho anda quiahva ná quixi ínima yii Ndióxi cañuhu a ini ndó. Já ná nduu ndeé ini ndó ña ná cuu jánaħa ndó nuú ñayivi sahá i. Anda já ndítahan nu mé ndó caħan ndó sahá i ñuu Jerusalén yóho xihin estado Judea xihin estado Samaria. Anda já quee ndó cuħun ndó cuaha ñuu xicá ní cúú ñuyiví jánaħa ndó nuú ñayivi cán saħa mí i —nacachi Jesús xihin ná.

<sup>9</sup> Tá nandihi nacahan Jesús ña yóho xihin ná ta nani sándeħé cáxí na cán nu Jesús ndíta na já nandaa cuahan indiví. Já naxinu in vico nachijahvi ñahá a chí coó naxini ga na mé á. <sup>10</sup> Ta nani ndíta na cán sándeħé na nuú nandaa Jesús cuahan indiví já nandicoto nihni na ta sa ndíta ivi ta ndíxi jahmá yaa jíin ná. <sup>11</sup> Já nacachi da já xihin ná:

—Taa Galilea, ndávaha sándeħé ndó indiví nuú nandaa Jesús cuahan. Jáchi tá quiahva naxini ndó nandindita cuahan indiví quiahva já cuni tucu

ndó a ndicó coo tucu a ñuyívi yóho —naçachi ndívi da cán xihín ná.

*Naçaxi na Matías caja da chuun ña najándacoo Judas*

<sup>12</sup> Tá nandihí nandaa Jesús cuahan indiví já naquee na apóstol yúcu naní yitó olivo cán já nandicó coo na ñuu Jerusalén. Ta mé yúcu cán cándo a tátuhun in kilómetro jatá ñuu Jerusalén.

<sup>13</sup> Tá naxinu coo na ñuu Jerusalén cán já nandaa na vehe cánúu jíco jáchi mé vehe cán nasanduu tóo na. Tóco ndihí na nasanduu cán nasacuu Pedro xihín Jacobo xihín Juan xihín Andrés xihín Felipe xihín Tomás xihín Bartolomé xihín Mateo xihín Jacobo, da cúu jahyi Alfeo xihín Simón, da naxica cuénta cananista xihín Judas, da cúu ñani Jacobo.

<sup>14</sup> Níi tiempo nasataca ndíhuxu in na yóho xihín ñani Jesús xihín María, náná Jesús xihín java ga najihí caça tahví na nu Ndióxi.

<sup>15</sup> Ta ndaja coo in quivi natata tátuhun in ciento oco na cúu cuénta Jesús. Já naçandichi Pedro mahñú na cán ta já naçachi da já xihín ná:

<sup>16</sup> —Candehé ndo, ñani i, na cúu cuénta Jesús. Nasahin tá in naçachi ínima yii Ndióxi coo. Jáchi naçaja Ndióxi ña ná cahan rey David ini tuhun mé á saha Judas, da nasandaca na natiin Jesús ñéhe na a cuahan na vecaa. <sup>17</sup> Mé Judas yóho nasacuu da da naxica xihín yo ta naçaja chúun da cuénta Jesús xihín yo. <sup>18</sup> Joo najicó túhún da Jesús ta naquehe da jjuhún sahá ña núu naçaja da. Ta xihín jjuhún cán naheen da in ñúhu. Ta tá nandihí já najándicava ndayi da mé dá ta nandata tixi da chí naçana cuyu ndihí xiti da. <sup>19</sup> Tá nañehé ñayivi ñuu Jerusalén

tuhun ña sa ñaxihí Judas cán já ñachinúu na quívi mé ñúhu ñaxeen da cán cananí a Acéldama. Mé tuhun cán cúní cachi a yójo nuú ñaxita ñii jáchi cán ñaxita ñii Judas tá ñaxihí da. <sup>20</sup> Jáchi já cáchí in Salmo ndácaan ini libro yíi Ndióxi tá ñacahan saha Judas já cáchí a já:

Ná candoo ndáha vehe da,

ta ni in ñayivi ná a cánduu ga ini a.

Ta sa mé cán ndácaan inga tucu Salmo ta cáchí a:

Inga tucu da ná ndicojo chuun ñasandojo da, cáchí tuhun Ndióxi.

<sup>21</sup> Anda já ñacachi tucu Pedro já xihín ná:

—Taño mí yóho ndúu java ña ñaxica nuu xihín yo tá ñaxica í xihín Jesús, xitoho í nani ñasahíin a ñuyiví yóho. <sup>22</sup> Java ña yóho ñasanduu na xihín yo tá najácandúta Juan Jesús xihín ticuí ta ñasanduu na xihín yo janda quiahva ñandaa Jesús cuahan indiví. Ña cán quéa ndítahan nu yó caxí in da taño ña yóho já ná caca da xihín yo caxi tuhun da nuú ñayivi ña ñanditacu tucu Jesús —ñacachi Pedro xihín ña cán.

<sup>23</sup> Sahá ña cán quéa ñacana ivi da taño ñayivi cán. Anda já ñasacu ini na caxi na in da taño ndíví da. In da ñacana ña cán ñasananí José ta naní tucu da Barsabás ta inga tucu quívi dá ñasacuu Justo. Ta da inga cán ñasananí Matías. <sup>24</sup> Anda já ñaxica tahví ndihi ña cán nu Ndióxi já ñacachi na já:

—Tátá Ndióxi, sa xíní ndó ndía cáhvi ini tóco ndihi ñayivi. Ña cán quéa caja ndó ñamaní jánaha ndó nuú nde ndá da cúu da sa ñacaxi ndó <sup>25</sup> cacuu apóstol ña ná caja da mé chuun ña najándacoo Judas. Mé Judas ñacaja da cuachi cáhnu nu ndo

ñá cán quéa viti ín da nu ndítahan nu dá coo da —  
naçachi na xihín Ndióxi.

<sup>26</sup> Anda já nasajíquí na ndá da cuu quee vaha.  
Naquee vaha Matías chí nandique táhan da xihín  
na uxu in apóstol cuéntá Jesús cán.

## 2

### *Tá nanuu ínimayii Ndióxi jatá na cúu cuéntá Jesús*

<sup>1</sup> Tá naxinu coo quiví coo víco Pentecostés já  
nanditaca ndihi na cúu cuéntá Jesús ndúu tútú na  
ini in vehe. <sup>2</sup> In cuití naxini johó na in a níhi  
naquixi a chí indiví. Tá quiahva níhi xícó tachi  
ndeé quiahva já níhi a naquixi a. Ta já naxini johó  
ndihi na ndúu coo vehe cán ña. <sup>3</sup> Anda já naxini  
na in ñaha ña cáa tá quiahva cáa ñuhú ita. Anda  
já nanditahnda ña nasandójó a jini in in na cán.  
<sup>4</sup> Ta nachutú ndaa ínimayii Ndióxi. Chí naçasáhá  
nandicañan na tuhun, ña coó nasatiahva na  
jáchi já naçaja ínimayii Ndióxi.

<sup>5</sup> Mé tiempo já nasanduu java na Israel, na cája  
cáhnu Ndióxi ñuu Jerusalén cán. Mé na Israel yóho  
naquixi na ndijáá ñuu jatá ñuyiví. <sup>6</sup> Tá naxini johó  
na cán ña níhi xójó cúu cán já naçasáhá ndítaca na.  
Joo tá naxinu na nu ndúu na cúu cuéntá Jesús cán  
já naçatóntó na jáchi naxini johó na cáhan na cúu  
cuéntá Jesús cán mé tuhun cáhan na vatí coo cúu  
ná na ñuu na. <sup>7</sup> Chí naçatóntó ndivaha na cán já  
naçasáhá ndítuhún xihín táhan na já cáchi na já:

—Tóco ndihi na cúu cuéntá Jesús yóho cúu ná  
na naquixi estado Galilea. <sup>8</sup> Ndá cuéntá quéa  
cáhan na tuhun cáhan in in mí. <sup>9</sup> Jáchi sa jín sa  
jín ñuu naquixi mí. Java í naquixi nación Partia

ta java í naquixi nación Media ta java í naquixi nación Elam ta java í naquixi nación Mesopotamia ta java í naquixi estado Judea ta java í naquixi estado Capadocia ta java í naquixi estado Ponto ta java í naquixi estado Asia <sup>10</sup> ta java í naquixi estado Frigia ta java í naquixi estado Panfilia ta java í naquixi nación Egipto ta java í naquixi ñuu cuéntá Africa, ña xícá chága a juú ga ñuu Cirene. Ta ndúu java ñayivi naquixi ñuu Roma yóho. Ta java na cán cúu ná na naquixi chichi Israel ta java na co cúu ná na naquixi chichi Israel joo cája cáhnu na Ndióxi, mé a cája cáhnu mí. <sup>11</sup> Ta sa mé yóho ndúu java ñayivi naquixi nación Creta xihin nación Arabia. Ta xini johó ndihí cáhan na cúu cuéntá Jesús yóho tuhun cáhan in in mí. Ta cáhan na sahá ñaha xituhún cája Ndióxi xihin ná —cáchi ndihi na sándehe cán.

<sup>12</sup> Ta chí co xini na ndúu sándehe cán ndia cahán na sahá na cúu cuéntá Jesús cán. Jáchi nacatontó ndivaha na janda ndaca tuhún táhan mé ná ndúu na já cáchi na já:

—Ndia cuni cachi ña cája na yóho.

<sup>13</sup> Joo java na ndúu cán nacasáhá sácú ndaa ñahá na já cáchi na já:

—Na xihí va cúu na yóho.

### *Cáhan ndojó Pedro nuú ñayivi*

<sup>14</sup> Anda já nacandichi Pedro xihin ndihuxu in ga na apóstol cán já nacasáhá cáhan cóhó da xihin tóco ndihi na cán já cáchi da já:

—Cuni johó vaha ndó ña cáhan i xihin ndó, ñayivi Israel, na estado Judea xihín ndihi ndó na tóho ndúu ñuu Jerusalén viti. <sup>15</sup> Mé ndó cáhán ndo

ñá naxini tóco ndihi ñayivi ndúu yóho. Joo cō cúu ná na naxini jáchi jacá caa in naha va queá. <sup>16</sup> Ña cāja na yóho queá nacachi da naní Joel sanahá tá nacahan da xihín ñayivi ña ndítahan coo. Mé da cán cúu da nacachi ña cáchi Ndióxi coo já nacachi da já:

<sup>17</sup> Tá sa nacayati quiví ndihi saha ñuyiví yóho já cáchi Ndióxi já:

“Chindahá i ínimá yii mí i cañuhu a ini tóco ndihi ñayivi.

Ta tóco ndihi jahyi yii ndo xihín jahyi jihí ndo caxi tūhun na xihín ndó tūhun cahan i xihín ná.

Ta na tacú cuni ndímáhnú na ñaha ñaha i nu ná.

Ta na yatá quixi sani nu ná caja i.

<sup>18</sup> Ta mé tiempo já chindahá i ínimá yii mí i ña ná cañuhu a ini na cāja chúun cuéntá mí i, á cúu ná ta á cúu ná ñaha.

Ta caja i ña ná cahan na sahá i nuú ñayivi.

<sup>19</sup> Ta cuahá ndivaha ña náhnú caja i indiví xihín ñuyiví ta cuni ñayivi ña.

Cuni na nii xihín ñúhu cáyi xihín ñihma ña ndindita tátūhun vico núhú.

<sup>20</sup> Ta canaá nuú candii ta ndicuáhá nii nuú yoo.

Ña yóho cacuu ña yaha tá sa nacayati quiví xinu yehe, mé á cúu xitoho na caja vií i sahá ñayivi ñuyiví.

Mé quiví cán cacuu a in quiví cáhnu ndivaha.

<sup>21</sup> Joo cacu ndaa ínimá tóco ndihi na ná ndicahán quiví i”, nacachi Ndióxi ini libro nacahyí Joel sanahá —nacachi Pedro.

<sup>22</sup> Anda já nacachi tucu Pedro já:

—Cuni johó vaha ndó tūhun cahan i xihín ndó, na Israel. Jáchi cahan i saha Jesús, mé a naquixi

ñuu Nazaret. Jáchì nàtahan ini Ndióxi xihìn tóco ndihi ñaha ñacaja mé Jesús. Ta naxini xihín nuu ndó ña náhnu xihín ña xitúhún ñacaja mé á nu ndo xihìn ndéé ñasahan Ndióxi nu a. Ta sa cándaá vaha ini mé ndó ña yóho. <sup>23</sup> Joo tá ñatiin ndó Jesús já najáxinu coo ndó ña ñasacu ini Ndióxi coo sanahá ndivaha. Ta mé ndó ñandiquiahva ndó Jesús ndáha ña quini. Ta ñacaja ndó ña ná cata caa na Jesús ndica crúxu. <sup>24</sup> Joo najánditacu Ndióxi Jesús já ná a cóo a nu ndóho ini ña sa ñaxihì jáchì ni in ñaha a cúu caja ña ná coo Jesucristo nu ndúu ña sa ñaxihì. <sup>25</sup> Sanahá ndivaha ñacahyí rey David sahá Jesús já ñacachi da já:

Xíni vaha ña ní tiempo ín ndó xitoho ñ, xihín ñ, ta ín ndó xoo cuáha ñ chindeé ndó yehe sahá ña cán quéa co yíhví toho ñ.

<sup>26</sup> Sahá ña cán quéa ñacajii ndivaha ini ñ, ta ñacahan vatá ndivaha ñ.

Jáchì vatí ná quivi ñ cacuu u ndii joo coo vaha ini ñ.

<sup>27</sup> Jáchì caja ndó ña ná nditacu tucu u já ná a cándoó nahá ínimá ñ nu ndúu ínimá ndii.

Ta ni a quiáhva toho ndó ñamaní ñahyí yiquí cuñu ñ jáchì cúu u ñahyí mánì ndo.

<sup>28</sup> Najánaha ndó nuú ñ ndaja caja ñ ña cúni ndo.

Jáchutú ndaa ndó ínimá ñ xihín ña cájii ini ñ jáchì já ín va ndó xihín ñ, ñacahyí David sanahá ndivaha —cáchi Pedro xihín na ndúu cán.

<sup>29</sup> Anda já ñacachi tucu Pedro já xihìn ná:

—Candehé ndo, ñani ñ ná ndicani ñ nu ndo ña cúni cachi ña yóho. Sa cándaá cáxí ín ña sa ñaxihì David, ña ñasacuu tásáhnu jíco yo. Ta najánduxu ña ña ta ín yii va nuú najánduxu ña ña. <sup>30</sup> ñacachi David ña yóho jáchì ñasacuu da profeta. Jáchì mé



Ndióxi quéa nasahan tūhun a nu dá ta nacachi a xihín dá ña quixi Jesucristo chichi mé dá ta nacachi a ña cacomí mé Jesucristo cán cuéntá sahá ñayivi Israel. <sup>31</sup> Sa nacandaa ini David ña caja Ndióxi chí nuu sahá ña cán quéa nacachi da xihín ñayivi ña nditacu tucu Jesús tá nandihí quivi a. Ta nacaxi tūhun David nu ná ña a jándicoo toho Ndióxi ínima Jesús nu ndúu ínima ndii ta ni a quiahva toho mé á ñamaní tahi yiquí cuñu mé Jesús cán. <sup>32</sup> Ta viti cándaa iní ña naxinu tūhun nacahyí David jáchi naxini tóco ndihí ña najánditacu Ndióxi Jesús. <sup>33</sup> Ta najándindita cáhnu ndivaha Ndióxi Jesús ta nasacu a ña xoo cuáha mé á. Ta nasahan Ndióxi ínima yi mé á nu Jesús jáchi ña yóho cúu tūhun nasahan Ndióxi sanahá. Ta tóco ndihí ña naxini ndó xihín nuu ndó ta naxini johó ndó yóho cúu á ña naquixi cuéntá Ndióxi. <sup>34</sup> Ta sa xini yo ña co cáhan David saha mé dá jáchi a juú David cúu da nandaa indiví, vaha. Sa mé David cúu dá da nacachi tūhun yóho:

Nacachi Ndióxi xihín xitoho i:

“Naha xoo cuáha jín i cacoun,

<sup>35</sup> janda quiahva ná cacu u na cándají yohó tixi sahun”, nacachi Ndióxi —já nacahyí David sanahá.

<sup>36</sup> Anda já nacachi tucu Pedro já:

—Ña cán quéa cuni ña ná candaa ini tóco ndihí ndó ña cáhan i xihín ndó, na Israel. Mé Jesús, mé a nacata caa ndó ndica cruxu nandaja Ndióxi ña ná nduu a xitoho ñayivi. Ta nandaja Ndióxi ña ná nduu a ña nachindahá mé á cacomí cuéntá sahá ñayivi —nacachi Pedro xihín na ndúu cán.

37 Tá naxini johó nā cán ña ñacachi Pedro xihin ná ivi laá natahvi ini na já ñacasáhá ndáca tuhún nā Pedro xihin java ga nā apóstol cán já cáchí nā já xihin ná:

—Ndía ndítahan caja nde, ñani, nā cúú cuéntá Jesús.

38 Anda já nanducú ñehe Pedro tuhun nu ná já cáchí da já xihin ná:

—Xíní ñúhú ndicó coo ini ndó ta jándicoo ndó cuachi cája ndó ta candúta ndó cuéntá Jesucristo já quéa ná caja cáhnu ini Ndióxi sahá cuachi ndó ta já ñehe táhvi ndó quiahva Ndióxi ínima yii mé á nu ndó. 39 Jáchi ñasahan Ndióxi tuhun a caja ña jáchutú ndaa ínima ndó xihin ínima yii mé á ta quiahva já caja ri a xihín jahyi ndó ta jári xihín na tóho, nā ndúu xícá. Jáchi já caja mé á xihín ñayivi ñacaxi mé á —ñacachi Pedro xihin ná.

40 Ta cuahá ndivaha java ga tuhun ñacahan Pedro xihin ná ta já najácahan da nā já ñacachi da já xihin ná:

—Candeeé ini ndó Jesús já ná jácaacu a ndohó já ná a cúhun ndó indayá nuú cuhun ñayivi cája cuachi —ñacachi Pedro xihin ná.

41 Cuahá ñayivi nandiquehe vaha na tuhun ñacahan Pedro ta ñacandeeé ini na Jesús. Ta mé quivi já ñacandúta tátuhun uní mil ñayivi já nandihvi na íchi cuéntá Jesús. Ta nandique táhan nā cán xihín java ga nā cúú cuéntá Jesús. 42 Ta ndinuhu ini na jácuaha na ña jánaħa nā apóstol nu ná. Ta cándúsa táhan tóco ndihi na ta ndítutú nā xícá tahví nā nu Ndióxi. Ta ní tiempo sá taca na ndicahnda java táhan na pan cuxu na.

*Ña ñacaja ñayivi tá ñacasáhá ña ndíco ña íchi cuéntá Jesús*

<sup>43</sup> Mé tiempo já ñasahan Ndióxi ñamaní nuú ña apóstol cán ña ná cuu caja na cuahá ndivaha ñaha xituhún xihín cuahá ña náhnu ndivaha ta chí cátontó tóco ndihi ñayivi tá xíní ña ña yóho. <sup>44</sup> Ta tóco ndihi ña cúu cuéntá Jesús cán in ñandu ndihi na ta ndícahnda java ñaha nu táhan na. <sup>45</sup> Ta jícó ña ñaha cómí ña ta já ndícahnda na jiuhún ña nuú ña ndímaní ñaha nuu. <sup>46</sup> Ta ndijáá ní quiivi ndítútú ña cája cáhnu na Ndióxi veñuhu cáhnu ndácaan ñuu Jerusalén cán. Ta tá ndíque táhan na vehe já ndícahnda java táhan na pan cuxu na ta cávatá ndivaha xihín táhan na cája na já. Ta ni in na co ndíñehe jícó mé. <sup>47</sup> Ñacaja cáhnu na Ndióxi ta tóco ndihi ñayivi ndúu ñuu Jerusalén ín vaha ini na xihín ña cán. Ta nini quiivi ñacaja Ndióxi ña ñandícuahá ña cúu cuéntá Jesús, mé ña jácacu ndaa Ndióxi ínimá.

### 3

*Ndivaha in tãa réncõ cája Pedro*

<sup>1</sup> In quiivi tátuhun caa uní sahini cuahan Pedro xihín Juan veñuhu cáhnu Jerusalén cán. Mé hora já táca ñayivi cuahan na veñuhu caça tahví ña nu Ndióxi. <sup>2</sup> Ta mé yuyéhé ñuhu cán ín coo in ña ñaxihí tuchu saha. Ta janda tá ñacacu da cáa da já. Ta ndijáá ní quiivi ñehe na ña cuahan ña yuyéhé ñuhu cáhnu naní yéhé ñúchí. Ta cán ín coo da sáti da nuú ñayivi ndíhvi ini veñuhu cán. <sup>3</sup> Ta tá ñaxini ña réncõ cán cuahan quihvi Pedro xihín Juan ini veñuhu cán já ñacata ñee da ndáha dá nu ná sáti da.

<sup>4</sup> Anda já nandicoto nihni Pedro xihin Juan nuú da réncō cán já ñacachi Pedro já xihin dá:

—Candehé nuú nde.

<sup>5</sup> Anda já ñasandehé cáxí da cán nu ná jáchi cáhán da quiahva na jjuhún nu dá. <sup>6</sup> Joo já ñacachi Pedro xihin dá já:

—Coó toho jjuhún i quiahva i nuun joo ña íin nuú i ña cán quiahva i nuun. Íin ndivaha ndée Jesucristo, mé á ñuu Nazaret sahá ña cán quéa sáhndá i chuun nuun ña ná candichún cacún — ñacachi Pedro xihin dá.

<sup>7</sup> Anda já ñatiin Pedro ndahá cuáha da cán ta nandiñehe da da já ñacandichi da chí ivi laá nandihvi ndée saha dá já nanditacu tuchu saha dá. <sup>8</sup> Anda já ñacandita mé da ñasahiin réncō saha cán já ñacandichi da ta já ñacasáhá da xíca da. Cándita da cája cáhnu da Ndióxi nandihvi da xihin ná ini veñuhu cán. <sup>9</sup> Ta tóco ndihi ñayivi ndúu cán ñaxini na cándita da cája cáhnu da Ndióxi. <sup>10</sup> Ta a juú quiahva ñacatóntó ña ta ñayihví ña sahá ña ñaxini na cán. Jáchi nandicuni na da cán cúú da da ñasacuu réncō, da ñasahiin coo sáti yéhe ñuhu naní yéhe ñúchí cán.

*Cáhan ndojó Pedro nuú ñayivi ndúu yéhe ñuhu cáhnu cán*

<sup>11</sup> Mé da ñasacuu ña réncō cán ñatiin tuun da Pedro xihin Juan ta chí cō cúní da janí ñahá da. Ta tóco ndihi ñayivi ñacatóntó ña xínu na cuahan ña candehé ña da réncō cán nu ndíta da yéhe ñuhu, ña naní yéhe Salomón. <sup>12</sup> Tá ñaxini Pedro ñacasáhá táca cuahá ñayivi nu íin da já ñacasáhá cáchí da já xihin ná:

—Cuni j<sub>o</sub>ho v<sub>a</sub>ha ndó, ñ<sub>a</sub>yivi Israel. Cátóntó ndiv<sub>a</sub>ha ndó s<sub>a</sub>nde<sub>h</sub>é ndó nde<sub>h</sub>e j<sub>a</sub>ch<sub>i</sub> cáh<sub>a</sub>n ndo ñ<sub>a</sub> n<sub>a</sub>ndaja v<sub>a</sub>ha nde da yóho x<sub>i</sub>h<sub>i</sub>n ndéé mé nde. Á tá coó ta cáh<sub>a</sub>n ndo ñ<sub>a</sub> n<sub>a</sub>ndaja v<sub>a</sub>ha nde da sah<sub>a</sub> ñ<sub>a</sub> ndícah<sub>a</sub>n ndiv<sub>a</sub>ha nde Ndióxi. <sup>13</sup> Joo co ín toho a tá quiahva cáh<sub>a</sub>n ndo. J<sub>a</sub>ch<sub>i</sub> mé Ndióxi, ñ<sub>a</sub> na<sub>a</sub>caja cáh<sub>nu</sub> Abraham x<sub>i</sub>h<sub>i</sub>n Isaac x<sub>i</sub>h<sub>i</sub>n Jacob, tás<sub>a</sub>h<sub>nu</sub> jícó yo n<sub>a</sub>ndaja v<sub>a</sub>ha mé á da yóho. Ta mé Ndióxi cán na<sub>a</sub>caja ñ<sub>a</sub> ná nduu cáh<sub>nu</sub> ndiv<sub>a</sub>ha Jesucristo, jah<sub>y</sub>i mé á. Joo mé ndó n<sub>a</sub>ndiquiahva ndó a ndahá na jutixia. Ta tá cúni Pilato janí da Jesús já na<sub>s</sub>aji nuu ndó nu dá caja da ñ<sub>a</sub>. <sup>14</sup> Mé Jesús cúu á ñ<sub>a</sub> y<sub>i</sub>i ndiv<sub>a</sub>ha ta ndinuhu ñ<sub>a</sub> ndaa cuití va cája. Joo mé ndó na<sub>c</sub>andají ndó a ta na<sub>x</sub>ica ndó nu Pilato ñ<sub>a</sub> ná janí da in da s<sub>a</sub>h<sub>n</sub>i ndi. <sup>15</sup> Tá n<sub>a</sub>ndihi já na<sub>s</sub>ah<sub>n</sub>i ndó Jesús, mé a cúu cája ñ<sub>a</sub> ná catacu ñ<sub>a</sub>yivi anda ama cáa qu<sub>i</sub>vi. Ta vatí na<sub>x</sub>ihi a na<sub>s</sub>acuu a ndi joo najánditacu tucu Ndióxi mé á. Ta cánda<sub>a</sub> cáx<sub>i</sub> ini nde ñ<sub>a</sub> cáh<sub>a</sub>n nde ñ<sub>a</sub> ndaa x<sub>i</sub>h<sub>i</sub>n ndo. <sup>16</sup> Ta sa mé Jesús cúu á ñ<sub>a</sub> cándeé ini nde. Ta sah<sub>a</sub> ñ<sub>a</sub> cándeé ini nde mé á sah<sub>a</sub> ñ<sub>a</sub> cán quéa n<sub>a</sub>ndiv<sub>a</sub>ha da cándichi nu ndó yóho. Ta x<sub>i</sub>ni ndó da n<sub>a</sub>ndiv<sub>a</sub>ha yóho ta cánda<sub>a</sub> cáx<sub>i</sub> ini ndó n<sub>a</sub>ndih<sub>v</sub>i ndéé saha dá sah<sub>a</sub> ñ<sub>a</sub> cándeé cáh<sub>nu</sub> ini nde Jesús.

<sup>17</sup> Candehé ndo, ñ<sub>a</sub>ni i. Sa x<sub>i</sub>ni v<sub>a</sub>ha nde viti ñ<sub>a</sub> tá na<sub>s</sub>ah<sub>n</sub>i ndó Jesús co na<sub>c</sub>anda<sub>a</sub> ini ndó ndí<sub>a</sub> na<sub>a</sub>caja ndó. Ta ni na cúu jefe ndo coó na<sub>c</sub>anda<sub>a</sub> ini na ndí<sub>a</sub> na<sub>a</sub>caja na. <sup>18</sup> Joo x<sub>i</sub>h<sub>i</sub>n ñ<sub>a</sub> yóho najáxinu coo Ndióxi tuhun na<sub>s</sub>ahan nu yó sa<sub>n</sub>ahá tá na<sub>c</sub>achi na profeta cuéntá Ndióxi ñ<sub>a</sub> ndítahan ndoho ini Jesucristo, mé a na<sub>c</sub>indahá Ndióxi cacomí cuéntá sah<sub>a</sub> ñ<sub>a</sub>yivi. <sup>19</sup> Sah<sub>a</sub> ñ<sub>a</sub> cán quéa x<sub>i</sub>ni ñúhú jándacoo

ndó cuachi cája ndó ta ndicó coo ini ndó nu Ndióxi já ná jándoo mé á cuachi nacaja ndó. Anda já caja Ndióxi ña ná ndivaha ini ndó. <sup>20</sup> Janda jihna nacaxi Ndióxi Jesucristo ná chindahá a ña ná quixi a ñuyívi yóho já ná cacomí a cuéntá sahá ñayivi. <sup>21</sup> Ta viti íin Jesucristo indivi ndáti a tandaa quívi caja Ndióxi ña nduu víi tóco ndihi ñaha. Já ndítahan coo jáchi sanahá ndivaha nacahan Ndióxi xihín na profeta mé á sahá ña yóho ta mé ná nacaxi tuhun na ña nuú ñayivi. <sup>22</sup> Ta ña yóho cúu tuhun nacahan Moisés nu tásáhnu jícó yo já nacachi da já xihín ná: “Taño mé ndó jan cana in profeta caja Ndióxi, xitoho í tá quiahva nacaja mé á xihín mí i. Ta coto a quéhe núu ndó ni in túhún tuhun cahan mé profeta jan xihín ndo. <sup>23</sup> Jáchi tóco ndihi ñayivi, na co cúni candúsa tuhun cahan mé profeta jan ndihi saha ná ta a ñehe táhvi ga na coo na xihín na ñuu Ndióxi”, nacachi Moisés sanahá —nacachi Pedro xihín ná.

<sup>24</sup> Ta nacahan chága Pedro xihín ná já cáchi da já xihín ná:

—Tóco ndihi na profeta nacahan na sahá ña yáha tiempo viti. Ta profeta Samuel cúu da nacasahá cahan sahá ña yóho. Ta tóco ndihi java ga na profeta naquixi tá nu ndihí nacahan na cán saha tiempo viti. <sup>25</sup> Nachindahá Ndióxi na profeta sanahá ña ná caxi tuhun na xihín yo ña sahan Ndióxi tuhun a nu yó, na Israel. Nacaja vaha mé á saha yo tá nacachi a já xihín Abraham, da nasacuu tásáhnu jícó yo: “Xihín ña caja na quixi chichún chí nuú já caja cuahá ndivaha i ñamaní xihín tóco ndihi ñayivi ndúu ndijáá ñuyívi”, nacachi a. <sup>26</sup> Tá najánditacu Ndióxi Jesucristo, jahyi mé á jihna

ñúhú ga nu mé ndó, na Israel nachindahá a ña ja ná caja yii á ndohó ja ná jándicoo ndó cuachi cája ndó —ñacachi Pedro.

## 4

### *Ndíquehe Pedro xihin Juan saha mé dá nuú na sacuahá veñuhu*

<sup>1</sup> Ta janda cáhan chá va Pedro xihin Juan nuú ñayivi cán ja naxinu java da cúu jutú xihin da sáhdá chuun nu policia veñuhu cán. Ta tañu na yóho naxinu ri na saduceo. <sup>2</sup> Xójo ndivaha ini na jáchi jánaha Pedro xihin Juan nuú ñayivi ña sa nanditacu tucu Jesucristo. Ta xihin ña yóho náha ña vaxi quivi nditacu tucu ndii. <sup>3</sup> Saha ña cán quéa natiin na cán Pedro xihin Juan ta nataán na da vecaa. Ta cán nacandoo da janda inga quivi itaan jáchi sa nacuaá va. <sup>4</sup> Joo cuahá ndivaha ñayivi nacandúsa tuhun nacahan Pedro ta xihin ña yóho nandicuahá chága na cúu cuéntá Jesús. Jáchi na nacandúsa cán nasacuu na tátuhun uhun mil dataa.

<sup>5</sup> Ta ndaja coo na cúu sacuahá nuú ñayivi Israel cán xihin na sacuahá veñuhu xihin na jánaha ley Moisés nandique táhan ndihi na inga quivi itaan. <sup>6</sup> Ta tañu na cán ndacaan ri da naní Anás, da cúu sacuahá nuú jutú. Ta tañu na cán nasandacaan ri Caifás xihin Juan xihin Alejandro xihin tóco ndihi na cúu na vehe na sacuahá nuú jutú cán. <sup>7</sup> Anda ja natavá na Pedro xihin Juan vecaa. Ta ñéhe na da cuahan na nuú nataca na cán ta nasani ndichi na da mahñú na nataca cán ta ja nandaca tuhún na da ja cáchi na ja xihin dá:

—Ndaja naçaja ndó nandaja vaha ndó da nasaquíhvi saha cán. Yo já nasañan ndée nu ndó ña cúu cája ndó ña yóho —cáchi na ndáca tuhún ñahá na.

<sup>8</sup> Ta naçaja Ndióxi ña ná ndicutú ndaa ínima Pedro xihin ínima yii Ndióxi ña cán quée naçasáhá da ndúcú ñehe da tuhun nu ná já cáchi da já xihin ná:

—Cuni joho vaha ndó, na sacuaña ñuu xihín na sacuaña veñuhu Israel. <sup>9</sup> Nandaca tuhún ndó ndeñe ndaja naçaja nde nandaja vaha nde da nasaquíhvi saha cán. <sup>10</sup> Cuni joho ndó ná ndicani nde sahá ña yóho nu ndo ta já ná cuu candaa ri ini tóco ndihi ñayivi Israel ña mé dataa, da cándichi nu ndo yóho nandivaha da xihín ndée Jesucristo, ña ñuu Nazaret. Mé a cán naçata caa mé ndó ndica crúxu cán ta tá nandihí já najánditacu ñahá Ndióxi. <sup>11</sup> Ta mé Jesús yóho cúu á ña cáñan tuhun Ndióxi saha, ña cúu á tátuhun yuu ndúhu, ña naçandají na cávaha vehe. Ta mé ndó cúu ndó tátuhun na cávaha vehe cán, na naçandají Jesús. Joo viti naxinu a cúu á tátuhun yuu ña íin chága saha naçaja Ndióxi. <sup>12</sup> Jáchi ni in túhún toho ñayivi ndúu ñuyíví a cúu jácaçu mí ña ná a cùhun yó indayá. In túhún Jesucristo quée naçindahá Ndióxi nu yo já ná caçu ndaa ínima yo —naçachi Pedro xihin ná.

<sup>13</sup> Tá naxini na sacuaña cán ña co yíhvi Pedro ni Juan ndíta da cáñan da xihin ná já naçatóntó na jáchi sa xini na ña coó tiañva da tutu. Ta naxini na ña cúu dá da ndahví, da naxica xihin Jesús. <sup>14</sup> Ta ni co ñeñe íni na sacuaña cán cachi na xihin Pedro ña cúu dá da tuhún jáchi sa nuu táhyí na já va cándichi da nandivaha saha cán. <sup>15</sup> Anda já nañavá too na



da cán já ñacasáhá ndítúhún xihín táhan na. <sup>16</sup> Já cáchí ña já:

—Ndía caja í xihín ndíví da yóho viti jáchi sa ñacandaa ini ndihi ñayivi ñuu Jerusalén ña xitúhún ñacaja da. Ta ni mí, a cúu cachí ña cúu á ña tuhún. <sup>17</sup> Joo cóho jáyihví yó ña ná a cáhan chága ña saha Jesús nuú ni in túhún toho ga ñayivi. Jáchi co cúni yo ña ná ndicuíta nuu tuhun saha Jesús —cáchí ña ndítúhún xihín táhan na.

<sup>18</sup> Anda já ñacana tucu na Pedro xihín Juan ta ñasahnda na chuun nu ná ña ná a jáñaha ga ña saha Jesús ta ni ná a cáhan ga ña quivi Jesús. <sup>19</sup> Anda já ñanducú ñehe Pedro xihín Juan tuhun nu ná já cáchí da já xihín ná:

—Cahvi vaha ini ndó, ña sacuaaha. Á cáhán ndó ña vaha chága caja nde ña sáhdá ndóhó á ña sáhdá Ndióxi nuú nde caja nde. <sup>20</sup> Jáchi a cuú jándacoo nde cáhan nde sahá ña ñaxini nde xihín sahá ña ñaxini johó nde —cáchí da xihín ña sacuaaha cán.

<sup>21</sup> Anda já ñacahan cuehe ña sacuaaha cán xihín dá ña ná a jáñaha chága da saha Jesús. Joo tóco ndihi ñayivi cája cáhnu na Ndióxi sahá ña ñacaja da cán. Ña cán quea najani ñaha ña jáchi coo ñahehe íni ña nda quiahva caja xíxi na xihín dá. <sup>22</sup> Ta mé da ñandivaha cán ñaxinu chága da nuú ivi jíco cuia tá ñandivaha saha dá.

*Xíca tahví ña cúu cuénta Jesús nu Ndióxi*

<sup>23</sup> Ta tá sa najani Pedro xihín Juan já ñaquee da cuahan da nuú ñasanduu java ga ña cúu cuénta Jesús cán. Ta já ñandicani na nuú ña cán ña ñacahan ña sacuaaha nuú jutú xihín ña sacuaaha

veñuhu cán xih̄in ná. <sup>24</sup> Tá nax̄ini joh̄o java ga na cúu cuéntá Jesús cán ña ndícani da nu ná já nacásahá tóco ndihi na xíca tahví na nu Ndióxi já cáhí na já:

—Tátá Ndióxi. Mé ndó cúu Ndióxi ña nacavaaha indivi xih̄in ñuyiví xih̄in tañuhú xih̄in tóco ndihi ñaha. <sup>25</sup> Sanahá ndivaha tá najándicutú ndaa ndó ínima David, tásahnu jícó nde xih̄in ínima yii mé ndó já nacachi ndó já xih̄in dá ta já nacahyí da:

Ndá cuéntá quéa ndívaā nahá ñayivi ndúu ñuyiví ta ndinuhu ña núu cáhvi ini na caja na.

<sup>26</sup> Tóco ndihi da cómi cuéntá sahá ñayivi ndúu ñuyiví xih̄in da sáhdá chuun nuú ñuu nandique táhan na cani táhan na xih̄in Ndióxi.

Ta cáni táhan na xih̄in mé a nacaxi Ndióxi chindahá a cacomí cuéntá sahá ñayivi, nacachi ndó sanahá.

<sup>27</sup> Ta mé a ndaa quéa yóho jáchi ini ñuu yóho najátaca táhan Herodes xih̄in Poncio Pilato xih̄in na tóho xih̄in na Israel viti. Najátaca táhan na caja núu na xih̄in Jesús, da cúu jahyi yii mé ndó, mé a nacaxi ndó. <sup>28</sup> Joo xih̄in ña nacaja na yóho naxinu coo nuú ña nasacu ini mé ndó coo janda jihna ndivaha jáchi cuu caja ndó tóco ndihi ña cúni ndó caja ndó. <sup>29</sup> Ta viti candehe ndo, tátá Ndióxi ndá quiahva cúni na caja xíxi na xih̄in nde. Ta quiahva ndó ñamaní ná candeé ini nde ndohó já ná a yíhvi nde cahan nde tuhun vaha saha mé ndó xih̄in ndá nuú ñayivi nacuu jáchi mé nde cúu nde na cája chúun nu ndo. <sup>30</sup> Ta xíca tahví nde nu ndo ña ná cuu ndaja vaha nde na quíhvi xih̄in ndeé mé ndó. Ta ná caja ndó ñamaní ña ná caja cuahá

nde ñaha xitúhún xihín cuahá ña náhnu ná cuni ñayivi ña xihin ndée Jesucristo, jahyi yii mé ndó cája nde tóco ndihi ña yóho —cáchi na xica tahví na nu Ndióxi.

<sup>31</sup> Tá nandihí naxica tahví na nu Ndióxi já naquiji nuu vehe nu ndúu tútú na cán. Ta já nandicutú ndaa ínimá ndihi na cán xihin ínimá yii Ndióxi ta nandindeé ini na cahan na tuhun Ndióxi nuú ñayivi.

*Sáhná java táhan na cúu cuéntá Jesús ñaha cómi na*

<sup>32</sup> Cuahá ndivaha nasacuu na cúu cuéntá Jesús cán joo chí in jini ndíhi na. Ta ni in túhún na co cájihnda ñaha nu táhan jáchi cáchi na: “Ñaha tóco ndihí queá.” <sup>33</sup> Xihin ndée sahan Ndióxi nu ná cáxi tuhun na apóstol ña nanditacu tucu Jesús. Ta nacaja Ndióxi cuahá ndivaha ñamaní xihin tóco ndihí na cúu cuéntá Jesús cán. <sup>34</sup> Ta ni in na coo nandimaní ñaha nuu jáchi na ín ñaha nuu tátuhun vehe á ñuhu najicó na ña ta ñéhe na mé jiuhún cán <sup>35</sup> ta sahan na ña nuú na apóstol já ná ndicahnda mé ná ña nuú in in na xini ñuhú a. <sup>36</sup> Já nacaja in dataa naní José, da naquixi chichi Leví. Ta cúu dá da nacacu in isla naní Chipre. Mé da yóho nachinúu na apóstol quivi dá naní da Bernabé ta mé tuhun yóho cuni cachí a da sahan tuhun ndeé ini ñayivi. <sup>37</sup> Ta mé da naní Bernabé yóho najicó da ñuhu dá ta já nasahan da mé jiuhún da cán nuú na apóstol.

## 5

*Cája Ananías xihin Safira cuachi nu Ndióxi*

<sup>1</sup> Joo mé tañu já in da naní Ananías xihin Safira, ñájíhí da najicó na in ñundáhyi ná. <sup>2</sup> Joo coó nandiquiahva ndihi da jiuhún ña nacayahvi ñúhu cán nuú na apóstol. Ta nacachi da xihin ná ña cán cúu ndihi va ña naquehe da saha ñúhu. Joo najándique táhan tuhun da xihin ñájíhí da ña ná candoo chá jiuhún cán nu ná. <sup>3</sup> Ta tá naxinu coo Ananías ndiquiahva da jiuhún cán nu Pedro já nacachi Pedro já xihin dá:

—Ndá cuéntá quéa nasahun ñamaní nu tiñáhá sacuahá nandihvi rí ínimun, Ananías. Ta nasacu inún jándahvún ínima yíi Ndióxi ta já naquehún táhan jiuhún nachahvi na sahá ñúhu jan. <sup>4</sup> Ñaha mé vún nasacuu ñúhu jan, nduu. Ta tá najícun ña, ñaha mé vún cúu ri jiuhún jan va. Nacahvi inún cajún ña núu yóho ta xihín ña nacajún yóho a juú nu mé nde cuití va nacahún ña tuhún joo nacahún ña tuhún nu Ndióxi —nacachi Pedro xihin dá.

<sup>5</sup> Tá naxini johó Ananías ña nacachi Pedro xihin dá ivi laá nandicava da naxihí da sahá cuachi nacaja da nu Ndióxi. Ta tóco ndihi na nacandaá ini sahá ña nayaha yóho nayihví ndivaha na. <sup>6</sup> Anda já naxinu java da tacú já nachitíví na ndii cán já ñehe na a cuahan na jánduxu na.

<sup>7</sup> Ta tá sa nayaha tátuhun uní hora já naquihvi ñájíhí Ananías nu ndácaan Pedro cán. Joo ni co xini ñá ña nandoho yíi ña. <sup>8</sup> Anda já nandaca tuhún Pedro ña já cáchí da já xihin ña:

—Á mé a ndaa najicó ndó ñúhu ndo ta nachahvi na tá quiahva nacachi yíun xihín i sahá —nacachi Pedro.

Anda já nanducú ñehe ñá cán tuhun nu dá já cáchí ña já xihin dá:

—Ajan, quiahva já najicó nde ña.

<sup>9</sup> Anda já nacachi Pedro já xihín ña:

—Mé ndó najándique táhan ndó tuhun ndó coto ndojó ndo ínima yii Ndióxi. Candehé. Jata vehe jan vaxi na nasahan najánduxu yíun. Ta viti cañehe ri na yohó va cuhun na jánduxu na —nacachi Pedro xihín ña.

<sup>10</sup> Tá nacachi Pedro já ivi laá nandicava ña saha dá naxihí ña sahá cuachi nacaja ñá. Tá naxinu coo da tacú, da nasahan najánduxu yíi ñá cán já naxini na cánduhu ri mé va ña naxihí ña. Anda já natavá na ña ta najánduxu na ña in xoo mé nuú najánduxu na yíi ña cán. <sup>11</sup> Ta tóco ndihi na cúu cuéntá Jesús cán xihín tóco ndihi java ga na tá nacandaa ini na sahá ña nayaha yóho nayihví ndivaha na.

*Sáhan Ndióxi ndée nuú na apóstol já ná caja na cuahá ñaha xituhún*

<sup>12</sup> Ta nacaja Ndióxi ña ná cuu caja na apóstol cán cuahá ñaha xituhún xihín cuahá ña náhnu tañu ñayivi cán. Ta tóco ndihi na cúu cuéntá Jesús nasataca na yéhe ñuhu cáhnu naní yéhe Salomón.

<sup>13</sup> Ta java ga ñayivi, na co ndíco íchi cuéntá Jesús cán yihví na catáhan na xihín na cúu cuéntá Jesús yóho. Joo ndijáá java ga ñayivi cán in toni ñuhú na xihín na apóstol cán. <sup>14</sup> Ta cuahá ndivaha ñayivi nacasáhá cándusa na Ndióxi, taa viti najihí viti.

<sup>15</sup> Ta sahá ña náhnu cája na apóstol yóho natavá na na quihví jata vehe ta nachinduu na na nuú xito á nu yívi mé nuú yaha Pedro cán. Já quea tá ná yaha da vatí candahví cuití da ná cani ndaa jatá java na cán ña ná ndivaha na. <sup>16</sup> Ta cuahá ñayivi ndúu java ñuu válí ndúu yati cán ñéhe na na quihví xihín na

ñúhu ínimá quini ini vaxi na ñuu Jerusalén ta cán nandivaha ndihi na.

*Jándoho na ini na apóstol*

<sup>17</sup> Anda já da cúu sacuahá nuú jutú cán xihín na cúu cuéntá Saduceo cán naçasáhá cáhiví ndivaha ini na xihín na apóstol. <sup>18</sup> Sahá ña cán quéa natiin na na apóstol cán ta nataán na na vecaa. <sup>19</sup> Joo ñuu naxinu coo in tátó Ndióxi ta nasuná a yéhé caa cán ta natavá a na ta já nacachi a já xihín ná:

<sup>20</sup> —Cuáhán ndó veñuhu cáhnu ta ndicani ndó nuú ñayivi saha tóco ndihi ña cája Ndióxi, mé a ndíjama ñayivi ná ndihvi na íchi cuéntá mé á — nacachi a xihín ná.

<sup>21</sup> Ña cán quéa tá nativi inga quivi itaan já nandihvi na apóstol veñuhu cáhnu cán ta naçasáhá na jánahá na nuú ñayivi cán.

Joo da cúu sacuahá nuú jutú cán xihín tóco ndihi na sacuahá cómi cuéntá sahá nación Israel cán nasahnda na chuun nu policia cán ña ná cuhun na tavá na na apóstol ñúhu vecaa cán ná quixi na nuú na sacuahá cán. <sup>22</sup> Joo tá naxinu coo na cúu policia vecaa cán coo nandiñehe toho ñahá na. Ta já nandicó coo na caxi tuhun na xihín na sacuahá cán. <sup>23</sup> Já cáhí na já:

—Tá naxinu nde yéhé caa já naxini nde ndájí tuun a ta ndíta soldado ndáá vaha da ña. Joo tá nandihvi nde ini vecaa sándehe nde coo na apóstol cán ná ndiñehé nde.

<sup>24</sup> Tá naxini johó na sacuahá nuú jutú xihín da cúu sacuahá nu policia veñuhu xihín java ga na sacuahá veñuhu cán ña yóho já naçasáhá ndáca

tuhún táhan na sahá ña ndítahan quixi nu ná chí nuu sahá ña cája na apóstol yóho.

<sup>25</sup> Mé hora já naxinu coo in dataa ta cáchi da já xihin ná:

—Na apóstol nataán ndó vecaa cuni cán, ndíta na jatá veñuhu jánaħa na ñayivi —nacachi da cán xihin ná.

<sup>26</sup> Anda já nasahan da cúu sacuaħa nuú policia xihin java ga policia já natiin tucu da na apóstol nasañehe da na nuú na sacuaħa veñuhu cán. Joo coó nacaja xíxi na xihin ná jáchi nayihví na ndicuıta ñayivi cuaħa cán cani na na xihín yuu.

<sup>27</sup> Ta tá naxinu coo na xihín na apóstol nu ndúu na sacuaħa veñuhu cán já nasacu ndichi na na nu ná. Anda já nacachi da cúu sacuaħa nuú jutı cán já xihin ná:

<sup>28</sup> —Mé nde nasahnda nde chuun nu ndó ña ná a jánaħa chága ndó sahá Jesús jan. Joo mé ndó sa najándicutú ndó Jerusalén xihín ña jánaħa ndó jan. Ta cúni ndó jácojo ndó cuachi jatá nde ña nasahní nde Jesús jan —cáchi da.

<sup>29</sup> Anda já nanducú ñehe Pedro xihín java ga na apóstol cán tuhun nu ná já cáchi na já xihin ná:

—Ndítahan nuú nde caja jihna ñúhú ga nde ña sáhnda Ndióxi nuú nde, a juú ga ña sáhnda ñayivi nuú nde caja nde. Sahá ña cán quéa coó nacaja nde ña nacachi ndó xihín nde. <sup>30</sup> Ta mé Ndióxi nacaja cáhnu tásáhnu jícó yo sanahá nacaja ña ná nditacu Jesús, mé a nasahní ndo tá nacata caa ndó a ndica crúxu. <sup>31</sup> Joo nandiñehe jícó Ndióxi Jesús ta nasacu a ña xoo cuáha mé á ta nacaja ña ná nduu Jesús ña cacomı cuéntá sahá ñayivi Israel ta jácacu a na já ná a cúhun na indayá. Ta tá ná ndicó coo ini na

já caja cáhnu ini Ndióxi sahá cuachi cája na. <sup>32</sup> Ta naxini xihín nuú nde tóco ndihi ña yóho ta cáhan nde sahá ta quiahva já cáhan ínima yii Ndióxi sahá ña yóho. Ta chindahá Ndióxi ínima yii mé á cañuhu a ini na cája ña cúni mé á —cáchi na apóstol xihín na cán.

<sup>33</sup> Tá naxini johó na sacuaḥa cán ña nacachi na apóstol já ivi laá naxojo ndivaha ini na xihín ná chí cúni na cahni ñahá na. <sup>34</sup> Joo ndaja coo íin tañu na cán in da sacuaḥa cúu fariseo naní Gamaliel, da íin toni ñúhú ñayivi xihín. Ta cúu dá da jánaḥa ley Moisés nu ná. Nacandichi da tañu na sacuaḥa cán já nasahnda da chuun ña ná tavá xóo na na apóstol cán jata véhe. <sup>35</sup> Anda já nacachi da já xihín na sacuaḥa cán:

—Candehé ndo, nataa Israel. Cuénta coo ndó a juú caja ndaja nacuú ndó xihín na apóstol yóho. <sup>36</sup> Xíni ñúhú ndicuhun ini ndó ña sanahá nandindita in da naní Teudas ta nacachi da xihín ñayivi ña cúu dá in da íin cuahá saḥa. Ta nasandico tátuhun comi ciento ta jata dá joo nasahní na da ta tá naxihí da já nandicuita nuu tóco ndihi ñayivi naxica jatá da cán ta xihín ña yóho nanaá sahá ndihi ña nacaja da. <sup>37</sup> Tá nandihí já nandindita inga tucu da naní Judas, da naquixi estado Galilea mé tiempo cándahvi ñayivi ñuu. Ta cuahá ndivaha ñayivi nandico jatá da cán joo nasahní ri na da cán va ta tóco ndihi na nasandico jata dá nandicuita nuu ndihi na. <sup>38</sup> Sahá ña cán quea jácahan i ndohó viti ná a quíhvi ndáha ndó na apóstol yóho. A quíhvi nuu ndó xihín ña cája na jáchi tá jini mé va na naquixi ña cája na já quea ndihi va sahá ña cája na yóho. <sup>39</sup> Joo tá Ndióxi nachindahá na caja na ña



cája na yóho já quéa a cúu toho caja ndó jándihi ndó sahá ña cája na. Cuéntá coo ndó jáchi tiahva náa xihín Ndióxi cani táhan ndó —cáchi Gamaliel xihín na sacuaḥa cán.

<sup>40</sup> Tóco ndihi na sacuaḥa naxini johó nuú naçahan da cán, natanan ini na xihín ña naçahan da. Anda já naçana na na apóstol ta já naçani na na xihín churú. Ta naçachi na xihín ná ña ná a çahan ga na saḥa Jesús nuú ñayivi. Anda já najaní ñahá na. <sup>41</sup> Ta cájii ndivaḥa ini na apóstol cán naçqueta na nu ñúhu na sacuaḥa cán jáchi naçahan Ndióxi ñamaní nu ná ndoho ini na saḥa Jesús. <sup>42</sup> Ta ndijáá níi quivi ini veñuhu cáhnu xihín ini vehe ñayivi çahan na ta jánaḥa na saḥa Jesucristo.

## 6

*Cáxi na usa da cacuu diácono, da chindeé na apóstol*

<sup>1</sup> Ta mé tiempo cán ndícuahá ndivaḥa na cúu cuéntá Jesús. Ta ndaja coo na çahan tuhun griego cán naçasáhá çahan cuachí na nuú na Israel. Mé na çahan tuhun griego yóho cáchi na ña co ndítaḥnda in nuú ñaha cája na Israel tá ndítaḥnda ña cuxu na cuáan in in quivi. <sup>2</sup> Anda já nandaja tútú ndíhuxu ivi na apóstol cán tóco ndihi na cúu cuéntá Jesús já naçasáhá cáchi na já xihín ná:

—Ña ndítahan nu mé nde, na apóstol quéa çaxi tuhun nde tuhun Ndióxi nuú ñayivi. Saḥa ña cán quéa co yáchi nde ndícaḥnda nde ña cuxu ñayivi. <sup>3</sup> Saḥa ña cán quéa xíní ñúhú ndinducú mé ndó usa ta tañu ndó já ná cajú na chuun yóho. Joo xíní ñúhú cacuu na ñayivi cándeé ini ndó. Ta xíní ñúhú cacuu na na tácu ini. Ta xíní ñúhú cacuu na

na nandicutú ndaa ínima xihín ínima yii Ndióxi já ná cuu quiahva ndó chuun yóho nu ná. <sup>4</sup> Ta ña caja mé nde quéa ndinuhu ini nde caça tahví nde nu Ndióxi ta jánaħa nde tuhun mé á nuú ñayivi — naçachi na apóstol xihín na cúu cuéntá Jesús cán.

<sup>5</sup> Ta tóco ndihi na natahan ini na xihín ña naçachi na apóstol. Saħá ña cán quéa naçaxi na da naní Esteban. Mé Esteban yóho cúu dá da cándéé cáhnu ini Ndióxi. Ta cúu dá da nandicutú ndaa ínima xihín ínima yii Ndióxi. Ta naçaxi na da naní Felipe xihín Prócoro xihín Nicanor xihín Timón xihín Parmenas xihín Nicolás, da naquixi ñuu Antioquía. Mé Nicolás yóho naçasáħa cándúsa da tá quiahva cándúsa na Israel, nduu joo nandiquehe da íchi cuéntá Jesús. <sup>6</sup> Tá nandihí já ñéhe na cúu cuéntá Jesús cán ndíħusa na naħinu coo na nu ndúu na apóstol cán. Anda já naħica tahví na nu Ndióxi saħa ná. Ta naħinúu na apóstol cán ndáħa ná jini in in ndíħusa na cán ña ná caja na chuun Ndióxi.

<sup>7</sup> Ta naçasáħa ndícuħta nuu tuhun cáħan saħa Jesús chí nandicuħhá na cúu cuéntá Jesús ñuu Jerusalén. Ta cuħhá na cúu ĵuħu cán naçasáħa cándéé ini na Jesús.

### *Tín na Esteban*

<sup>8</sup> Ta ndaja coo naçaja cuħa Ndióxi ñamañi xihín in da naní Esteban cán ta nandicutú ndaa ínima dá xihín ínima yii Ndióxi chí naçasáħa cája da cuħhá ñaha náħnu xihín ña xitúħún nuú ñayivi. <sup>9</sup> Joo in quivi naçasáħa java na cáni táħan yúħu ná xihín mé Esteban. Na cán cúu ná cuéntá veñuhu naní Esclavos Libertados xihín java na ñuu Cirene xihín na ñuu Alejandría xihín na ñuu Cilicia xihín java

ga na naquixi ñuu válí ndúu estado Asia naçasáhá cáni táhan yúhu ná xihín dá. <sup>10</sup> Joo a cuú quee vaha na xihín dá jáchí naşahan ínima yíi Ndióxi tuhun ndíchí nuú mé Esteban cán ña ná nducú ñehe da nu ná. <sup>11</sup> Anda já nachahvi na cán java na já ná cahan na tuhun tuhún saha Esteban. Ta naçachi na cán ña naxini joho na ña naçanahá Esteban xihín Moisés ta naçanahá da xihín Ndióxi. <sup>12</sup> Ta xihín ña yóho najándivaa ná ñayivi xihín na sacuaḥa veñuhu xihín na jánaḥa ley Moisés. Ta já naṭiin na da já ñehe na da cuahan da nuú ndihi na sacuaḥa ñuu cán. <sup>13</sup> Ta nanducú na da cándúsa cavaḥa tuhun tuhún sahá Esteban ta já naçasáhá cáchí da cávaḥa ña tuhún já:

—Cánaḥá da yóho xihín veñuhu cáhn nu Ndióxi yóho ta cánaḥá da xihín ley Moisés. <sup>14</sup> Ta naxini joho nde cáchí da ña jataṇi Jesús veñuhu cáhn nu yóho, mé da naquixi ñuu Nazaret ta ndijama da costumbre najándacoo Moisés nu yo —cáchí da cahan ña tuhún saha Esteban.

<sup>15</sup> Anda já nandicoto nihni na sacuaḥa xihín tócó ndihi na ndúu coo cán nu Esteban já naxini na nandiyéhe nuu dá tátuhun in nuu tát Ndióxi ndúu indiví.

## 7

### *Ndíquehe Esteban saḥa mé dá nuú na sacuaḥa*

<sup>1</sup> Anda já nandaçá tuhún da cúu sacuaḥa nuú juṭu cán Esteban já naçachi da já xihín dá:

—Á ña ndaḍa cúu ndihi ña cahan na yóho sahun.

<sup>2</sup> Anda já nanducú ñehe Esteban tuhun nu ná já naçachi da já:

—A juú toho ña ndaa quéa cáhan na jan sahá i. Joo cuni johó ndó ña ná cahan i xihín ndo, na sacuaḥa xihín ñani i. Saḥahá ndivaha tá naṣahiin táśahnu jíco yo, da naṣananí Abraham ñundáhyi Mesopotamia tá cámaní quee da cuhun da coo da ñuu Harán já naḥaḥa Ndióxi mé á nu dá. Ta mé Ndióxi, xitoho í cúú á in Ndióxi cáhnu ndivaha. <sup>3</sup> Ta já naçachi a já xihín Abraham: “Jándacoo táhún ta jándacoo ñuún ta cuáhán inga ñuu nuú naḥa i nuún coún”, naçachi Ndióxi xihín dá. <sup>4</sup> Anda já najándacoo Abraham ñundáhyi Caldea nuú naṣahiin da ta já naçee da cuahan da coo da ñuu Harán. Tá nandihi já naḥiḥi tátá da ta janda já naṣandaca Ndióxi Abraham naçixi da nu ndúu yó viti. <sup>5</sup> Joo coó naṣahan Ndióxi ñundáhyi nu dá tá naṣahiin da yóho. Ni in loho ñúhu coó naṣahan mé á nu dá mé tiempo cán. Joo naçachi a xihín dá ña quiahva ña nu dá chága chí nuu. Ta naçachi a xihín dá ña nduu a ñaha jaḥyi da tá ná quivi da vatí cámaní cacu jaḥyi Abraham mé tiempo já. <sup>6</sup> Ta naçachi Ndióxi xihín dá ña tóco ndihi jaḥyi da xihín na quixi chichi jaḥyi da cacuu na tátuhun na tóho jáchi canduu na inga ñuu, ña co cúú ñuu na. Ta cán caja chúun na joo a quéhe yahvi na sahá chuun caja na ta jándoho ndivaha na cán ini na tixi comi ciento cuja. <sup>7</sup> Naçachi tucu Ndióxi xihín dá já: “Joo jándoho i ini ñayivi, na caja xixi xihín ñayivi quixi chichún. Ta tá nandihi caja i ña ná queta na quixi chichún ta quixi na chóho já ná caja cáhnu na yehe.” <sup>8</sup> Ña yóho quéa naçachi Ndióxi xihín Abraham tá naṣahan tuhun a nu dá. Ta naçachi a xihín dá ña ná chicaan da marca yiquí cuñu da já ná a ndíndójo da sahá tuhun naṣahan Ndióxi nu

dá. Ta tá ñacacu jahyi Abraham, ña naní Isaac já ñachicaan Abraham marca yiquí cuñu da tá ñaxinu ña quivi ñacacu da. Ta quiahva já ñacaja ri Isaac xihin Jacob, jahyi da tá ñacacu da. Ta sa mé quiahva já ñacaja ri Jacob xihin uxu ivi jahyi da tá ñacacu da. Ta jahyi Jacob yóho cúu tátá uxu ivi táhnda ñayivi Israel.

<sup>9</sup> Ta mé jahyi Jacob yóho ñasacuu tásáhnu jícó yo joo ñachihvi ini na xihin in ñani na, ña naní José. Sahá ña cán quea najicó ña ña cuahan ña nación Egipto. Joo ñasahin Ndióxi xihin dá. <sup>10</sup> Ta ñachindee a ña nu tóco ndihi ña ñandoho ini da ta ñasahan cuaha Ndióxi xini túni dá. Ta ñacaja mé á ña ná tahan ini Faraón, mé rey nación Egipto cán xihin ña cája José. Sahá ña cán quea ñasacu rey cán José ña ná nduu da gobernador saha tóco ndihi nación Egipto cán. Ta ñacaja rey cán ña ná cacomí ña cuénta saha vehe mé rey cán viti.

<sup>11</sup> Ta in tañu ñaxinu tama ñdeé ta ñacasahá ndóho ndivaha ini tóco ndihi ñayivi ndúu nación Egipto. Ta quiahva já ñandoho ri ini ña ndúu ñundáhyi Canaán ta chí co ñéhe ná ña cuxu tásáhnu jícó yo. <sup>12</sup> Joo tá ñacandaa ini Jacob ña ín trigo nación Egipto já ñachindahá ña jahyi da, ña ñasacuu tásáhnu jícó yo cán já ñasahan ña ñaxeen na ña cuxu na. Ta tá ñasahan na nu cuítí yóho coo ñandicuni na ñani na José cán. <sup>13</sup> Joo tá ñasahan ña ña chí ivi chí Egipto cán já ñajána sa José mé dá nuú ñani da. Ta xihin ña yóho ñacandaa ini ña cúu rey nación Egipto cán ña cúu José ña Israel. <sup>14</sup> Andá já ñasahnda José chuun ña ná cañehe na Jacob, tátá ña xihin tóco ndihi ña vehe da quixi na canduu na ñundáhyi Egipto cán. Ta tóco ndihi ña ñasahan

cán nasacuu na uní jico sahun ñayivi. <sup>15</sup> Já naquee Jacob cuahan da coo da Egipto xihin tóco ndihi na vehe da. Ta sa mé cán naxihi da ta cán naxihi jahyi da, na nasacuu tásáhnú jícó yó. <sup>16</sup> Já nachicaan na ndii cán ini cáva mé Egipto cán joo tá nayaha tiempo já natavá na lásá na já ñéhe na ña nasahan na nachicaan na ini cáva mé cama santo ña naxeen Abraham núú jahyi in da naní Hamor ñuu Siquem cán.

<sup>17</sup> Ta tá nacayati quiví xinú coo ña nasahan Ndióxi tuhun a nu Abraham coo já nacasáhá cácu cuahá jahyi na naquixi chichi Israel. Já nandicuaaha ná nani ndúu na Egipto cán. <sup>18</sup> Anda já nacasáhá inga tucu rey cómi da cuéntá sahá ñayivi nación Egipto cán ta mé rey saá cán co xini toho da José. <sup>19</sup> Ta mé rey yóho najándahvi da tásáhnú jícó yó cán ta nacasáhá cája xíxi da xihin ná. Ta nacaja ndúsa dá xihin ná ña ná jándacoo na jahyi na, na jacá nacacu já ná quivi na. <sup>20</sup> Ta mé tiempo já nacacu Moisés ta nasacuu da in ticuáhá loho ña natahan ini Ndióxi xihin. Ta najácuahnu tátá náná Moisés yóho mé dá tixi uní yoo mé vehe mé na cán. <sup>21</sup> Joo tá naxinu quivi ndítahan nu ná jándacoo na da já nandiquehe ña cúú jahyi rey Egipto cán da já najácuahnu ña da tátuhun jahyi ña. <sup>22</sup> Ta najácuaha Moisés tóco ndihi ña xini na ndíchí nación Egipto cán. Ta nandindíchí ndivaha jini dá. Ta nacaja cuaha dá ña náhnú.

<sup>23</sup> Ta tá naxinu Moisés ivi jico cuia já nasacu ini da coto nihni da ñani táhan da, na naquixi chichi Israel. <sup>24</sup> Tá nacasaá da nu ndúu na cán já naxini da cája xíxi in da Egipto xihin in da Israel. Ta cúni Moisés ndiquehe da sahá da Israel ña cán

qu<sub>é</sub>a n<sub>a</sub>sahní Moisés mé d<sub>a</sub> Egipto cán. <sup>25</sup> Jáchi n<sub>a</sub>cahán Moisés ñ<sub>a</sub> cuu candaa ini n<sub>a</sub> Israel cán ñ<sub>a</sub> ch<sub>í</sub>ndahá Ndióxi d<sub>a</sub> já ná janí d<sub>a</sub> n<sub>a</sub> ndáha n<sub>a</sub> Egipto cán. Joo coó n<sub>a</sub>candaa ini na ñ<sub>a</sub> yóho. <sup>26</sup> Ta inga quívi itaan tá n<sub>a</sub>xinu coo Moisés nu ndúu n<sub>a</sub> Israel cán já n<sub>a</sub>xini da cáni táhan ivi d<sub>a</sub> n<sub>a</sub>quixi ch<sub>í</sub>chi Israel. Anda já n<sub>a</sub>casáhá Moisés sáhdá java táhan da d<sub>a</sub> cán já cáchi d<sub>a</sub> já xihín ná: “Ndaja ñani mé va ndó, a váha toho cája ndó cáni táhan ndaja táhan mé va ndó.” <sup>27</sup> Anda já n<sub>a</sub>chindahá nihni d<sub>a</sub> cája xixi xihín ñani táhan cán Moisés já n<sub>a</sub>cachi da já xihín dá: “Ni in toho na coó n<sub>a</sub>sahan chuun nu yóhó cacuún d<sub>a</sub> cacomí cuéntá sahá nde já ná cuu caja viún sahá nde. <sup>28</sup> Á tá quiahva n<sub>a</sub>cajún n<sub>a</sub>sahnún d<sub>a</sub> Egipto cán cuni quiahva já cúnun cajún xihín i”, n<sub>a</sub>cachi d<sub>a</sub> cán xihín Moisés. <sup>29</sup> Tá n<sub>a</sub>xini johó Moisés ñ<sub>a</sub> yóho já nayihví ndivaha da chí n<sub>a</sub>xinu da cuahan d<sub>a</sub> chí ñundáhyi cuéntá Madián já n<sub>a</sub>sahin da cán tátuhun in d<sub>a</sub> tóho. Ta cán natandaha dá ta n<sub>a</sub>cacu ivi jahyi taa da.

<sup>30</sup> Ta tá sa nayaha ivi jico cuia n<sub>a</sub>sahin Moisés Madián cán já nanaha in tátó Ndióxi mé á nu dá tañu in tohíñú cándaha ñúhu mé yucú íchí yati yucú naní Sinaí cán. <sup>31</sup> Ta chí n<sub>a</sub>catóntó Moisés xihín ñ<sub>a</sub> n<sub>a</sub>xini da n<sub>a</sub>caja Ndióxi cán. Ta tá n<sub>a</sub>cayati da sándehé da ñ<sub>a</sub> já n<sub>a</sub>xini johó da cáhan Ndióxi xihín dá já cáchi a já: <sup>32</sup> “Yehe cúu u Ndióxi n<sub>a</sub>caja cáhnu tásáhnu jícún Abraham xihín Isaac xihín Jacob.” Anda já n<sub>a</sub>casáhá quíji Moisés xihín ñ<sub>a</sub> yihví d<sub>a</sub> ta coó n<sub>a</sub>sahan ndeé ini da ndicoto nihni da nu cáhan Ndióxi cán. <sup>33</sup> Anda já n<sub>a</sub>cachi tucu Ndióxi já xihín dá: “Tavá ndusa sahun jáchi yii ndivaha cúu

nu sánun jan. <sup>34</sup> Sa naxini i ndá quiahva ndáhvi ndóho ñayivi cuéntá mí i, na ndúu Egipto ta naxini joho i nu tána na sahá ña jándoho na Egipto jan ini na. Sahá ña cán quéa vaxi i chindee e na ta yóhó cacuún da chindahá i cuhun Egipto já ná tavún na nu ndóho ini na cán”, nacachi Ndióxi xihin Moisés.

<sup>35</sup> Nacandají na Israel cán Moisés ta nacachi na xihin dá: “Coó na nasacu toho yohó ña ná cacomún cuéntá sahá nde já ná cuu caja viún sahá nde.” Joo Ndióxi quéa nachindahá Moisés ña ná cacuu da da cacomí cuéntá sahá na Israel cán ta já ná jácacu da na. Jáchi já nacachi tátō Ndióxi xihin dá tá nanaha mé á tañu tohíñú cándaha ñúhu cán.

<sup>36</sup> Ta mé Moisés nasahan tucu da mé Egipto cán ta natavá da tóco ndihi na Israel, na nasanduu Egipto cán ta nacaja da cuahá ñaha náhnu xihín ña xituhún mé Egipto cán. Ta quiahva já nacaja da xihin tañuhú naní Tañuhú Cuahá tá nasuná da do nuú nayaha na Israel cán. Ta quiahva já nacaja da cuahá ña náhnu yucú íchí nuú naxica na ivi jico cuia cán. <sup>37</sup> Ta mé Moisés nacaxi tuhun da xihín ñayivi já nacachi da já xihin ná: “Tá quiahva nacaja Ndióxi nachindahá a yehe nu ndo quiahva já chindahá mé á inga da cacuu profeta nu ndo. Ta mé da cán cacuu da in da quixi chichi mé ndó”, nacachi Moisés xihin ná. <sup>38</sup> Ta mé Moisés nasahin da tañu ñayivi Israel, na nasacuu tásáhnu jícó yo tá naxica na yucú íchí cán. Ta xihin mé da cán nacahan tátō Ndióxi jiní yucu Sinaí cán. Ta cán nasahan Ndióxi ley nu dá já ná naha da ña nu yo ña ná caca vaha í íchi cuéntá Ndióxi.

<sup>39</sup> Joo coó naxeen toho tásáhnu jícó yo cuni joho na nuú nacahan Moisés xihin ná. Ña cán quéa



naçandají na da ta naçasáhá ndúcú na ndicó coo na Egipto. <sup>40</sup> Ta nani naçahiin Moisés jini yúcu Sinaí cán já naçachi na xihín Aarón, ñani Moisés já: “Cúni nde ña ná cavañún tiniñu yúú Ndióxi caja cáhnu nde ta ná canuú a cuñun a nuú nde. Jáchi co cándaá ini nde ndía nandoho Moisés, da natavá ndehe nuú naçanduú nde Egipto cán.” <sup>41</sup> Anda já naçavaña na in yoco ñehe nañná chélo ta já naçahní na quiti najoco na nuú mé yoco cán. Ta naçajii ndivaña ini na xihín yoco ña naçavaña mé na cán. <sup>42</sup> Anda já najándacoo Ndióxi na já ná caja cáhnu na ndá ña cúni na tátuhun quimi xihín yoo xihín candii. Já naçachi Ndióxi ini libro naçahyí na profeta sanahá:

Ndóhó, na Israel, a juú nu mí i naçahní toho ndó quiti najoco ndó tañu ivi jico cuiá nani nañica nuu ndó yucú íchí jan.

<sup>43</sup> Ña naçaja ndó quéa naçaja cáhnu ndó yoco ña naçavaña mé va ndó.

Ta naçachi ndó ña cúu mé yoco cán inga ndióxi naní Moloc.

Ta nañañehe ndó ña xihín cáti á tá cuañan ndo.

Ta naçavaña ndó inga tiniñu quimi naçachi ndó cúu á inga tucu ndióxi naní Renfán.

Ta nañañehe ndó tiniñu cán cuañan ndó caja cáhnu ndó coo naçaja cáhnu ndó yehe.

Ña cán quéa tavá i ndohó ñundáhyi na Israel ta chindahá i ndohó in ñuu tóho xíca chága a juú ga Babilonia, naçachi Ndióxi xihín na cán —naçachi Esteban xihín na sacuañá ñuu cán.

<sup>44</sup> Já naçachi tucu Esteban já xihín ná:

—Vatí nacaja cáhnu tásáhnu jícó yo java ga yoco joo nasañehe tá nasañehe na in veñuhu níi quítí cuéntá Ndióxi tá naxica nuu na yucú íchí nuú co ndúu ñayivi cán. Jáchí janda jihna nasahnda Ndióxi chuun nu Moisés tá quiahva coo mé veñuhu níi quítí cán ta nasahnda chuun nu dá ña ná cavaaha da ña xihin níi quítí. Ta ini mé veñuhu cán nataán da yuu jáhnda nu ndaa ley nasahan Ndióxi nu dá sanahá. <sup>45</sup> Tá sa nayaha cuahá cuja já naxihí Moisés já nandiquehe da naní Josué chuun ña cañehe da cuéntá saha tásáhnu jícó yo. Ta mé tásáhnu jícó yo nacani táhan na xihín na nasanduu ñundáhyi yóho. Ta nacaja Ndióxi ña ná quee vaha na Israel xihín na cán. Natavá Ndióxi na cán já ná canduu na Israel ñundáhyi yóho ta mé tiempo já na Israel ñehe na veñuhu níi quítí cuahan na. Ta já nasahin a xihin ná janda quiví nasacomí David cuéntá sahá na Israel. <sup>46</sup> Nacaja Ndióxi cuahá ñamaní xihin David sahá ña cán quea nasacu ini David cavaaha da in nuú coo Ndióxi, mé a nacaja cáhnu Jacob sanahá. <sup>47</sup> Joo da nacavaaha mé vehe Ndióxi cán nasacuu Salomón, jahyi David. <sup>48</sup> Ta sa cándaá iní ña a juú quiahva cáhnu cúu Ndióxi ta co ndacaan toho a ini veñuhu cavaaha dataa. Ín in profeta ta nacañyí da ña nacachi Ndióxi já:

<sup>49</sup> Tátuhun in rey, da ín coo silleta vaha,  
ta chínúu da saha dá jatá in táyi loho,  
quiahva já ín coo i indiví ta chínúu i sahá i jata  
ñuyíví.

Yehe cómí i cuéntá sahá indiví xihin ñuyíví sahá ña  
cán quea cóo toho vehe cuu cavaaha ndó coo

yehe,  
ta co xíní ñúhú i in vehe nu ndíquehe ndée.

<sup>50</sup> Jáchi yehe cúú Ndióxi ña ñacavaaha tóco ndihi ñaha, já ñacachi Ndióxi sanahá —ñacachi Esteban xihin ná.

<sup>51</sup> Anda já ñacachi tucu Esteban já xihin ná:

—Joo mé ndó cúú ndó ñayivi sáa ini ta cúú ndó tátuhun na co xíní Ndióxi. Jáchi co cúní ndó cuni johó ndó ña cáhí Ndióxi xihin ndo ta co cúní ndó candaa ini ndó tuhun Ndióxi. Ta ni co cúní ndó quiahva ndó ñamani ndihvi ínimá yii Ndióxi ini ínimá ndo. Xíxi ndivaha ñasahin ini tásáhnú jícó ndo ta quiahva já cája ri mé ndó viti. <sup>52</sup> Mé tásáhnú jícó ndo ñacaja xíxi ndivaha na xihin ndihi na profeta ta ñasahní ñahá na mé na yóho ñaquixi na cáxi tuhun saha mé a quixi chí nuu, mé a co cája cuachi. Ta tá ñaxinu mé a cán já ñajícó túhún ndó a ta ñasahní ndó a. <sup>53</sup> Ta mé ndó cúú ndó na ñasahan tátó Ndióxi ley nuu joo co cúní ndó caja ndó ña cáhí a —ñacachi Esteban xihin ná.

### *Tá ñasahní na Esteban*

<sup>54</sup> Tá ñaxini johó na sacuaaha cán tóco ndihi ña ñacahan Esteban já ñaxojo ndivaha ini na xihin dá chí cáhña nuhu na. <sup>55</sup> Joo ñandicutú ndaa ínimá Esteban xihin ínimá yii Ndióxi ta já ñandicoto nihni da indiví já ñaxini da ndá quiahva cáhnú cúú Ndióxi ta ñaxini da cándichi Jesús xoo cuáha Ndióxi.

<sup>56</sup> Anda já ñacachi Esteban já xihin ná:

—Candehé ndó. Núná indiví xíní i ta tívi cándichi Jesús xoo cuáha Ndióxi —ñacachi Esteban xihin ná.

<sup>57</sup> Joo ñachicaji tuun na cán johó na já ná a cúní johó na ña cáhan Esteban. Ta ñacasáhá cáyuhú

cóhó n̄ cáti na cuah̄an n̄ cani na d̄a. <sup>58</sup> N̄atavá n̄ mé Esteban yuhú ñuu ta cán ñacasáhá cúun na yuu dá. Ta mé n̄ najácojo cuachi j̄ata Esteban cán n̄atavá n̄ cotó n̄ ta nachinduu tóo na ña nuú in d̄a tacú nani Saulo cándichi cán. <sup>59</sup> Ta nani cúun n̄ cán yuu Esteban j̄a ñacasáhá mé Esteban x̄ica tahví d̄a nu Ndióxi j̄a cáchi d̄a j̄a:

—Jesús, mé ndó cúu xitoho i. Ndiq̄ehe ndó ínima i viti.

<sup>60</sup> And̄a j̄a ñacaxítí Esteban j̄a ñacasáhá cáyuhú cóhó d̄a j̄a ñacachi da j̄a:

—Jesús, xitoho i, a quéhe ndó cuénta sahá cuachi cája n̄ yóho.

Tá nandih̄i ñacachi Esteban tuhun yóho j̄a naxih̄i d̄a.

## 8

### *Cásáhá Saulo cája x̄ixi da x̄ih̄in n̄a cúu cuéntá Jesús*

<sup>1</sup> Ta mé hora ñasahn̄i n̄ Esteban cándichi Saulo s̄andehé d̄a ta ñatahan ini da x̄ih̄in n̄a ñasahn̄i Esteban cán.

Ta mé qūivi cán ñacasáhá n̄ cája x̄ixi ch̄aga n̄a x̄ih̄in n̄a cúu cuéntá Jesús ndúu ñuu Jerusalén cán. Chí tóco ndih̄i n̄a cúu cuéntá Jesús n̄andicūita nuu na ndijáa chí estado Judea x̄ih̄in estado Samaria. Joo mé n̄a apóstol cuití va coó nax̄ita nuu toho na. N̄acandoo na ñuu Jerusalén. <sup>2</sup> Ta java dataa n̄andiquehe na yiquí cuñu Esteban cuah̄an n̄a jánduxu n̄a d̄a tá quiah̄va ín costumbre n̄a ta a juú quiah̄va ñasacu na saha dá. <sup>3</sup> Ta mé Saulo ñacaja x̄ixi ch̄aga d̄a x̄ih̄in n̄a cúu cuéntá Jesús ta ñaquih̄vi da vehe tá vehe na ta ñúhu da n̄a ta táva d̄a n̄a j̄ata

véhe. Coó caja toho á cúú ná taa á cúú ná ñáha ta já ñéhe da na cuahan na vecaa.

*Cáhan na cúú cuénta Jesús tuhun vaha saha mé á nuú na estado Samaria*

<sup>4</sup> Ta na cúú cuénta Jesús tá nandicujta nuu na jatá ñuu Jerusalén cán nacaxi tuhun na tuhun vaha sahá Jesús ní cúú nu xica na cuahan na. <sup>5</sup> Ta ndaja coo in da cúú cuénta Jesús naní Felipe naquee da cuahan da chí in ñuu cuénta Samaria ta cán nacasáha da cáhan da saha Jesucristo nuú ñayivi. <sup>6</sup> Nacasáha ndítútú cuahá ñayivi nu dá ta xihín ndinuhu ini na táa johó na nu cáhan da xihin ná jáchi naxini xihín nuu ná cuahá ñaha náhnu cája Felipe. <sup>7</sup> Nandaja vaha da cuahá ñayivi, na nasañuhu ínima quini ini chí cáyuhú cóhó mé ínima quini cán tá quéta ini na quíhvi cán. Ta nandaja vaha ri da cuahá na naxihí tuchu ta nandaja vaha ri da na xica réncó. <sup>8</sup> Sahá ña cán quéa nacajii ndivaha ini ñayivi ñuu cán xihín ña nacaja da.

<sup>9</sup> Ta mé ñuu cán nasahiin in da tají naní Simón. Mé Simón yóho nasacuu da in taa, da najándahvi ñayivi Samaria cán jáchi nasacachi da ña cúú dá in da ín ndivaha saha. <sup>10</sup> Ta tóco ndihi mé ñayivi ñuu cán, á cúú ná na ndahví á na náhnu, nasaxini johó na xihín ndinuhu ini na nuú nasacahan da, nduu. Ta nacachi na saha dá ña cája da ña náhnu tá quiahva cája Ndióxi. <sup>11</sup> Ta nasacandúsa na nuú nasacahan da xihin ná jáchi tixi cuaha tiempo najándahvi da na xihín ña tají. <sup>12</sup> Ta ndaja coo nacasáha na cándúsa na ñuu cán tuhun vaha cáhan Felipe saha Jesucristo, ña cacomí Ndióxi cuénta saha ná tá ná candeé ini na Jesucristo. Ta já

naçasáhá nā cándúta ná, taa xih̄in ñáha viti. <sup>13</sup> Ta janda mé Simón cán naçandúsa da ta naçandúta dá já naçasáhá xíca nuu da xih̄in Felipe. Ta chí cátóntó da xíní da ña náhnu xih̄in ña xitúhún cája Felipe cán.

<sup>14</sup> Ta tá nañehé nā apóstol ndúu ñuu Jerusalén cán tuhun ña nandiquehe nā Samaria cán tuhun vaha cáhan saha Jesús já naçindahá nā Pedro xih̄in Juan estado Samaria cán. <sup>15</sup> Ta tá naxinu çoo Pedro xih̄in Juan estado Samaria cán já naçica tahví nā nu Ndióxi sahá nā cúu cuéntá Jesús cán ña ná chutú ndaa ínimā ná xih̄in ínimā yii Ndióxi. <sup>16</sup> Jáchí sa naçandúta ná cuéntá Jesucristo sahá ña cándéé ini na mé á joo a ñáha chutú ndaa ínimā ná xih̄in ínimā yii Ndióxi. <sup>17</sup> Anda já chójó Pedro xih̄in Juan ndáha dá jiní in in nā cán nani xíca tahví da nu Ndióxi já naçhutú ndaa ínimā ná xih̄in ínimā yii Ndióxi.

<sup>18</sup> Tá naxiní Simón ña naçhutú ínimā nā cúu cuéntá Jesús cán xih̄in ínimā yii Ndióxi tá chinúu nā apóstol ndáha ná jiní ná já cúni da cueen da ndée Ndióxi cán. <sup>19</sup> Já naçachi Simón já xih̄in ná:

—Quiahva ndó ndée cómí ndó jan nuú i já ná cacomí ri yehe va ña já quéa ndá nā ná chinúu i ndahá i jiní ná cuu ndicutú ndaa ínimā ná xih̄in ínimā yii Ndióxi.

<sup>20</sup> Anda já nanducú ñehe Pedro tuhun nu dá já cáchí da já xih̄in dá:

—Ná jándihi Ndióxi sahun xih̄in sahá jiuhún cómún jáchí cáhún ña cuu cueún ña jása maní uun Ndióxi nuú ñayivi. <sup>21</sup> Çoo sahá tohún cajún ña cája nde yóho jáchí ço íin vaha toho ínimun nu Ndióxi.

<sup>22</sup> Xíní ñúhú jándacoún ña núu cáhvi inún jan ta

ndítahan caça tahvún nu Ndióxi já ná candehé mé á á caja cáhnu ini a sahun jáchi núu ndivaha cáhvi inún. <sup>23</sup> Jáchi náha cáxi ña cáhivi ndivaha inún. Cúu á tátuhun mé ña quini nacató a yohó chí cájún ña núu.

<sup>24</sup> Anda já nanducú ñehe Simón tuhun nu Pedro já cáchi da já:

—Caca tahvi ndó nu Ndióxi sahá i já ná a quíxi ña núu cáchi ndó jan nuú i —nacachi da xihin ná.

<sup>25</sup> Tá nandihí nandicani Pedro xihin Juan sahá ña nacaja Ndióxi xihin ná. Ta tá nandihí nacahan na tuhun Ndióxi nuú na cán já naquee na nasahan na cáhan na tuhun Ndióxi, ña cuu jácacu ñayivi ndijáá ñuu válí ñuhu chí estado Samaria cán. Anda jáví nandicó cōo tucu na chí ñuu Jerusalén.

### *Cáhan Felipe saha Jesús nuú in da naquixi nación Etiopía*

<sup>26</sup> Tá sa nayaha ña yoho já naxinu in tátō Ndióxi nu íin Felipe estado Samaria cán ta já cáchi a já xihin dá:

—Cuáhán chí sur nu quée íchi ña quéta ñuu Jerusalén cuahan chí ñuu Gaza —nacachi tátō Ndióxi xihin dá.

Ta mé íchi cán yáha nuú cō ndúu ñayivi jáchi íchi ndivaha. <sup>27</sup> Anda já naquee Felipe cuahan da. Ta íchi nu xíca da cuahan da cán nanditahan da in dataa, da naquixi nación Etiopía. Mé da Etiopía yoho cúu dá in taa cáhnu nación dá jáchi cúu dá da cómí cuéntá sahá jiuhún ña cúu ñaha ña naní Candace, ña cómí cuéntá sahá ñayivi nación Etiopía. Mé da yoho sa nasahan da ñuu Jerusalén caja cáhnu da Ndióxi. <sup>28</sup> Ta tá cuahan tucu da íchi

ndicó coo da Etiopía cán ta nani íin coo da jata carreta já cáhvi da libro naçahyí profeta Isaías.  
 29 Anda já naçahan ínima yij Ndióxi xihin Felipe já naçachi a já xihin dá:

—Cativi jíin carreta cuañan jan.

30 Anda já naçayati Felipe jíin carreta cán ta já nañini johho da cáhvi da Etiopía cán libro Isaías. Anda já nandaça tuhún Felipe da já cáhí da já xihin dá:

—Á cándaq inún ña cáhvún jan.

31 Anda já nanducú ñehe da Etiopía cán tuhun nu Felipe já naçachi da já:

—Ndaja caja i candaq ini i ña cáhvi i tá coo na ndicani nuú i ndía cúní cachi a —naçachi da Etiopía cán xihin Felipe.

Anda já nañica da ñamaní nu Felipe ña ná ndaa da jata carreta da já ná cacoo da xihin dá ta ná ndicani da nu dá ña cúní cachi a. Chí nandaq Felipe carreta cán.

32 Ta cáhvi da Etiopía cán tuhun Ndióxi nu cáhí a:

Tá quiahva ñehe na in ndicachi cuañan rí quivi rí quiahva já nañañehe na da cuañan da quivi da.

Ta tá quiahva cája ndicachi tá co ndáhyi ri nani ndíjatá na ri quiahva já naçaja mé dá jáchí coo nañuná da yúhu dá cañan da.

33 Naçaja xíxi ndivaha na xihin dá ta coo naçaja ndaa na xihin dá.

Jáchí janda na naquixi chichi nuú naquixi mé dá coo nandiquehe na saha dá.



Ña ñacaja na quéa ñasahní na ña dá já ná a cóo ga ña ñuyívi yóho, cáchí tuhun Ndióxi nu cáhvi ña Etiopía cán.

<sup>34</sup> Anda já ñandaca tuhún ña Etiopía cán Felipe já cáchí ña já xihín dá:

—Ta viti caja ndó ñamaní ndicani ndó nuú ña ndía cúni cachi a yóho. Á saha mé va profeta yóho cáhan ña á sahá inga va ña cáhan ña.

<sup>35</sup> Anda já ñacasahá Felipe ndicani ña nuú ña cán ña ñacahyí Isaías já ñandicani ña tuhun vaña saha Jesús nu dá. <sup>36</sup> Tá tá yáha ña cuahan ña nu ñúhu ticuúí já ñacachi ña Etiopía cán já xihín Felipe:

—Yóho ñúhu ticuúí. Á cuu caja ndúta ndó yehe —ñacachi ña xihín Felipe.

<sup>37</sup> Anda já ñacachi Felipe xihín dá:

—Tá cándeé ini ndó Jesús xihín ndinuhu ini ndó ta cuu va candúta ndo.

Anda já ñanducú ñehe ña cán tuhun nu Felipe já cáchí ña já:

—Cándúsa ña ña cúu Jesucristo in tuhún jiní já jahyi Ndióxi —ñacachi ña Etiopía cán.

<sup>38</sup> Chí ñvi laá ñasahnda ña Etiopía cán chuun ña ná caní ndichi ña carreta cándójó ña cuahan ña cán. Anda já ñanuu ndíví ña cuahan ña nu ñúhu ticuúí ta já najácandúta Felipe ña Etiopía cán. <sup>39</sup> Tá ñandihí ñaquee ña ini ticuúí cán já ñehe ínima yíi Ndióxi Felipe cuahan ña inga xoo chí cóo ñaxiní táhan chága ña xihín ña Etiopía cán. Joo cáji ini ña Etiopía cán cuahan ña íchi. <sup>40</sup> Tá ñandicoto nihni Felipe sa ín ña in ñuu naní Azoto. Tá tá ñuu tá ñuu cuahan ña cáhan ña tuhun vaña saha Jesús nuú ñayivi anda quiahva ñaxinu cóo ña ñuu Cesarea.

## 9

*Ndíquehe Saulo íchì cuéntá Jesús  
(Hch. 22:6-16; 26:12-18)*

<sup>1</sup> Joo ndaja coo da naní Saulo cája xíxi tá cája xíxi da xihín na cúu cuéntá Jesús. Ta sácú ini da ndaja caja da cahní da na. Ta sahá ña cúnì da jándihi da saha ná sahá ña cán quea nasahan da cahan da xihín da cúu sacuahá nuú jutu <sup>2</sup> ña ná quiahva na in carta nu cahan ña ñéhe dá ñamanì quihvi da veñuhu ñuhu ñuu Damasco já ná ndinducú da na ndíco íchì cuéntá Jesús já ná cató da na cañehe da na quixi na cahun na vecaa ñuu Jerusalén. Co cája toho a á cúu ná taá á ñáha. Chí naquee Saulo ñuu Jerusalén xihin mé carta. <sup>3</sup> Joo nani xíca da cuahan da íchì tá sa yati xinu coo da ñuu Damasco já in náa cuití nandiyihvi ndaa ñuhu jata dá. Mé ñuhu yóho naquixi a chí indiví. <sup>4</sup> Chí ivi laá nandicava Saulo nu ñuhu. Anda já naxini johó da cahan in a xihin dá já cáchì a já xihin dá:

—Saulo, Saulo. Ndá cuéntá quea cája xísún xihín i —cáchì a xihin dá.

<sup>5</sup> Anda já naçasahá ndaca tuhún Saulo já cáchì da já:

—Yo cúu ndó, na cahan. Ndaja naní ndo —cáchì da.

Anda já nanducú ñehe a cán tuhun nu dá já cáchì a já xihin dá:

—Yehe cúu u Jesús, mé a cája xísún xihin. Ta xihín ña cájún yóho cúu á tátuhun cája xísún xihin mé vún jáchì cájún tátuhun cája in tindiquí tá sání ndaa rí nu yócó poya ta jándicuehe rí mé va rí.

<sup>6</sup> Andá já ñacasáhá quíji Saulo xihín ña yíhví da já ñacachi da já:

—Cahan ndó xihín i, xitoho i ndía quea cuni ndó ná caja i —cáchi da.

Andá já ñanducú ñehe Jesús tuhun nu dá já cáchi a já xihín dá:

—Cuándaco ta cuáhán quihvi ñuu Damasco. Ta jan cahan na xuhun ndía ndítahan cajún —cáchi Jesús.

<sup>7</sup> Ta tóco ndihi da cásahan xihín Saulo cán ñayihví ndivaha da jáchi ñaxini johó da ña cahan cán vatí coó ñayivi ná xini da. <sup>8</sup> Tá ñandíhi já ñandaco Saulo nu ñúhu. Joo tá ñasuná da nduchú núu da chí co tívi ga nu dá. Sahá ña cán quea jandá tii ndaa na da cuahan da chí Damasco. <sup>9</sup> Cán ñasahin cuáa da tixi uní quivi ta chí coó ñaxixi da ta ni ticuí coó ñaxihi da.

<sup>10</sup> Mé ñuu Damasco cán ñasahin in da cúu cuénta Jesús naní Ananías. Ta ndaja coo ñaxini ndímáhnú da Jesús ta ñacahan xihín dá já ñacachi a já:

—Ananías.

Andá já ñanducú ñehe da tuhun nu á já cáchi da já:

—Yóho ín i. Ndía cuni ndo, xitoho i.

<sup>11</sup> Andá já ñacachi Jesús xihín dá:

—Candichi ta cuáhán cáyé naní a Ndacú Ndaa. Ta vehe da naní Judas cán ndaca tuhún sahá in da naní Saulo, da ñacacu ñuu Tarso. Viti ñúhú xíca tahví da nu Ndióxi ndácaan da. <sup>12</sup> Jáchi ñaxini ndímáhnú da ña quihvi mún, Ananías vehe nu ndácaan da. Ta ñaxini da ña chinúún ndáhun jini

dá ta já cuu candehé tucu da —ñacachi Jesús xih̄in Ananías.

<sup>13</sup> Tá ñaxini joh̄o Ananías ña yóho já ñacachi da já:

—Candehé ndo, xitoho i. Yíhv̄i i cuh̄un i jáchi sa cuahá ndivaha ñayivi ndícani nuú i sahá mé Saulo jan. Ta ndícani na nuú i ndá quiahva xíxi cája da xih̄in na cúu cuéntá mé á, na ndúu ñuu Jerusalén.

<sup>14</sup> Ta viti vaxi da jan ñuu yóho jáchi sa ñaxica da ñamani nuú na sacuah̄a nuú jutu ña ná cuu játaca da tóco ndihi na cája cáhnu mé ndó já ná cañehe da na cuh̄un na vecaa —ñacachi Ananías.

<sup>15</sup> Anda já ñacachi Jesús já xih̄in Ananías:

—Cuáhán quíi jáchi sa ñacaxi i da ña ná cahan da sahá i nuú ñayivi java ga nación ta quiahva já cahan da sahá i nuú na cómi cuéntá sahá na cán. Ta ñacaxi i da ña ná cahan da sahá i nuú na ñaquixi chichi Israel viti. <sup>16</sup> Ta jánaħa i nu dá ndá quiahva ndítahan ndoho ini da sahá i —ñacachi Jesús.

<sup>17</sup> Anda já ñaquee Ananías cuahan da vehe nu in Saulo cán. Tá ñaxinu da cán já ñachinúu da ndáħa dá jin̄i Saulo já ñacachi da já xih̄in dá:

—Ñani Saulo. Mé Jesús, xitoho í, mé á ñaxinún nuú ñaquisún íchi cán, mé á cán quéa ñachindahá yehe vaxi i já ná ndinuna nduchú núún já ná cuu candehé tucún. Ta já cúni Ndióxi ña ná ndicutú ndaa ínimun xih̄in ínima yii mé á —ñacachi Ananías xih̄in Saulo.

<sup>18</sup> Chí iv̄i laá ñacasáhá cúyu ñaha tátuhun runchu tiyacá nduchú núú Saulo chí ñanuna nuú dá sáñdehé tucu da. Anda já ñasahan Saulo ñacandúta dá. <sup>19</sup> Tá ñandih̄i já ñaxixi da ta

nandihvi tucu ndée dá ta nasahjin tóo da chá quivi xihín na cúu cuéntá Jesús ndúu ñuu Damasco cán.

*Cáhan Saulo saha Jesús nuú ñayivi ñuu Damasco*

<sup>20</sup> Tá nandihí já nacasáhá Saulo jánaḥa da tuhun Ndióxi ini veñuhu ta jánaḥa da ña cúu Jesús in túhún jiní já jahyi Ndióxi. <sup>21</sup> Ta tóco ndihí na taa johu nu cáhan da catóntó na cája da. Já cáchí xihin táhan na já:

—Á a juú da yóho cúu da nandicuíta cája xíxi xihín na cúu cuéntá Jesús ñuu Jerusalén, nduu. Á a juú sa mé da yóho vaxi da tiin da na cúu cuéntá Jesús mé ñuu yóho já ná cuhun na nuú na sacuaḥa nuú jutu já ná taán ñahá na vecaa —nacachi xihin táhan na.

<sup>22</sup> Joo ví ga ví ndíndeé ini Saulo cáhan da tuhun Ndióxi. Ta náḥa da nuú ñayivi ña mé Jesús cúu Cristo, mé á nachindahá Ndióxi cacomí cuéntá sahá ñayivi. Janda quiahva já najajaca da xini túni na naquixi chichi Israel ndúu Damasco cán xihin tuhun cáhan da xihin ná.

*Xínu Saulo nuú java na Israel jáchi cúní na cahní na da*

<sup>23</sup> Tá sa nayaha cuahá quivi já najándique táhan na naquixi chichi Israel cán tuhun na ña cahní na Saulo. <sup>24</sup> Joo nacandaa ini Saulo ña ndúcú na cahní na da. Ta mé na ndúcú cahní Saulo cán nasandati na ñuú ta ndiví yéhe ñuu cán janda quiahva ná queta da já ná cahní na da. <sup>25</sup> Joo in ñuú na cúu cuéntá Jesús ndúu ñuu Damasco cán nachicaan na da ini in toyica cáhnu já najánuu na da ndica náma cáhnu ndájí yuhú ñuu cán já nacacu da ta naquee da cuahan da.

### *Cuahān Saulo ñuu Jerusalén*

<sup>26</sup> Tá na<sub>x</sub>inu coo Saulo ñuu Jerusalén já nanducú da ndique táhan da xihín na cúu cuéntá Jesús ndúu cán. Joo tóco ndihi na cán nayihví na da jáchi co cándúsa na ña sa nandiquehe da íchi cuéntá Jesús.

<sup>27</sup> Joo nandiquehe Bernabé saha Saulo. Nasahan da najána<sub>h</sub>a da da nuú na apóstol cán já ná ndique táhan na xihín dá. Ta nandicani Bernabé nu ná ndaja nasahin tá na<sub>x</sub>ini Saulo Jesús íchi nu xíca da cuahan da chí ñuu Damasco. Ta nandicani da ña na<sub>c</sub>ahan Jesús xihín Saulo. Ta nandicani da ña coo nayihví Saulo cahan da saha Jesús ñuu Damasco.

<sup>28</sup> Anda já nandiquehe na Saulo ta na<sub>c</sub>andoo da ñuu Jerusalén. Ta na<sub>c</sub>asáhá xíca nuu da xihín na apóstol. <sup>29</sup> Ta co yihví da cáhan da sahá Jesús.

Ta nanditúhún da xihín na na<sub>q</sub>uixi chichi Israel, na cáhan tuhun griego ndúu ñuu cán. Joo mé na cán ndúcú na ndá quiahva caja na cahní na da. <sup>30</sup> Tá na<sub>c</sub>anda<sub>a</sub> ini na cúu cuéntá Jesús ña ndúcú na cahní na Saulo já ñéhe na da cuahan da ñuu Cesarea. Anda já na<sub>c</sub>hindahá na da cuanúhu dá ñuu Tarso.

<sup>31</sup> Anda já nanduu vaha ini tóco ndihi na cúu cuéntá Jesús ndúu ndijáá estado Judea xihín estado Galilea xihín estado Samaria. Ta nandindacú chága ví ini na xihín tuhun Ndióxi. Ta xihín ndinuhu ini na cája cáhnu na Ndióxi. Ta chíndeé ínima yii mé á na. Ta já nandicua<sub>h</sub>a chága na cuahan na.

### *Ndívaha in da naní Eneas*

<sup>32</sup> Ta ndaja coo xíca nuu Pedro xíto nihni da na cúu cuéntá Jesús ndúu ñuu válí cán. Ta já nasahan ri da xíto nihni da na cúu cuéntá Jesús ndúu ñuu

Lida. <sup>33</sup> Cán nanditahan da in dataa naní Eneas, da naxihí tuchu saha. Ta tixi una cuia nasandúhu dá jáchi a cuú caca da. <sup>34</sup> Anda já načahan Pedro xihín dá já načachi da já:

—Eneas, viti ndája vaha Jesucristo yohó. Cuáhán ndacoo. Nditivún yívun —cáchi Pedro xihín dá.

Chí ivi laá nandacoo Eneas. <sup>35</sup> Tóco ndihi na ndúu ñuu Lida xihín na ñuu Sarón naxini na da nandivaha yoho ta anda já najándacoo na costumbre yata nasacaja na já nandiquehe na íchi cuénta Jesús, xitoho í.

### *Ndíta in ñáñáha naní Dorcas*

<sup>36</sup> Ta ndaja coo nasahin in ñáñáha, ñá cuú cuénta Jesús ñuu Jope. Ta mé ñáñáha yoho naní ñá Tabita ta tuhun griego cáchi na Dorcas xihín ñá. Ta mé Dorcas yoho ní tiempo nandihí ini ñá cája ñá ñamaní xihín ñayivi ta načindeé ñá na ndahví. <sup>37</sup> Ta mé tañu já naquehe cuehe Dorcas ta naxihí ñá. Ta tá sa nandicata na yiquí cuñu ñá já ñéhe na ñá nasahan na načindúhu ná ñá piso ninu vehe cán. <sup>38</sup> Ta yati va ñéhe táhan ñuu Jope cán xihín ñuu Lida nu ín Pedro. Tá načandaá ini na cuú cuénta Jesús ñá ín yati Pedro já načindahá na ivi dataa nasahan da cana da Pedro ñá ná cuhun quí dá ñuu Jope cán.

<sup>39</sup> Anda já ndáca táhan Pedro cuahan da xihín ndíví dataa cán. Tá naxinu coo Pedro ñuu Jope cán já najáquihvi na da ini vehe nu ndácaan mé ndí Dorcas cán. Nataca tiyivi cuahá najihí cuáan ndúu na sácu ndivaha na saha ñá naxihí cán. Ta najánaña na jáhma ñá načavaha Dorcas nu dá tá nasatacu ñá. <sup>40</sup> Anda já načachi Pedro xihín ndihi

ñayivi ndúu cán ña ná quee tóo na jata véhe. Tá sa ñaqueta na cán já ñacaxítí da xíca tahví da nu Ndióxi. Anda já ñacasáhá sándehe da ndii cán já ñacasáhá cáchí da já xihín ña:

—Cuáhán ndacoo, Tabita.

Tá ñacachi da já chí ivi laá ñanuna nduchú núu ña ñanditacu ñá. Tá ñaxini ñá Pedro já ñasacoo ñá. <sup>41</sup> Anda já ñatiin Pedro ndáha ña já ñandiñehe da ña. Anda já ñacana da ña cúu cuéntá Jesús xihín na cuáan cán ná quihvi tucu na cán jáchí sa ñanditacu ñá. <sup>42</sup> Tóco ndihi ñayivi ñuu Jope cán ñacandaa ini na ña ñanditacu Dorcas chí cuaha ná ñacandúsa na Jesús ta ñandihvi na íchí cuéntá mé á. <sup>43</sup> Ta chí ñacandoo Pedro cuahá quivi ñuu Jope cán. Ñacandoo tóo da vehe in da naní Simón, da ndája vií níi quiti.

## 10

### *Cáhan Pedro tuhun vaha saha Jesús nu Cornelio*

<sup>1</sup> Ta ndaja coo ñasahiin in dataa naní Cornelio ñuu Cesarea cán. Ta mé Cornelio yóho cúu dá da cómi chuun nuú iñu ciento soldado. Ta mé táhndá soldado yóho naní a Táhndá Italiano. <sup>2</sup> Ta mé Cornelio yóho xihín tóco ndihi na vehe da cája cáhnu na Ndióxi xihín ndinuhu ini na. Ta jásá da jiuhún da ña chíndeé da na ñaquixi chichi Israel. Ta ní tiempo xíca tahví da nu Ndióxi. <sup>3</sup> In quivi tátuhun caa uní sahini nani xíca tahví da nu Ndióxi já ñaxini cáxí táhyí da ñaquihvi in tátō Ndióxi ini vehe nu ndácaan da já ñacachi a já xihín dá:

—Cornelio.

<sup>4</sup> Ta chí ñayihví Cornelio sándehe da tátō Ndióxi cán. Anda já ñacachi da já:



—Ndíá cúní ndo, tátō Ndióxi.

Anda já nanducú ñehe tátō Ndióxi cán tuhun nu dá já cáhí a já xihín dá:

—Xíni johō Ndióxi tá xíca tahvún nu á ta sa xíni a ña nachindee cuahún na ndahví. Ta táhán ini mé á xihín ña cájún. <sup>5</sup> Ta viti cúní Ndióxi ña ná chindahún java dataa ná cuhun da ñuu Jope já ná cana da da naní Simón, da cáhan tucu na Pedro xihín ná quixi da. <sup>6</sup> Íin tóo Pedro vehe inga da naní Simón, da ndája vii níi quítí. Ta yati yuhú tañuhú íin vehe da. Ta mé Pedro cán caxi tuhun da xuhun ndíá ndítahan nuun cajún —ñacachi tátō Ndióxi cán.

<sup>7</sup> Tá sa ñaquee tátō Ndióxi cán cuahan já ñacana Cornelio ivi mozo da ta ñacana da in táhan soldado, da cómi da cuénta saha. Ta mé soldado yóho cúú dá in da cája cáhnu Ndióxi. Ta cándeé ini Cornelio da. <sup>8</sup> Ta tá nandihí nandicani Cornelio nu ndíhuni da ña ñacachi tátō Ndióxi xihín dá já nachindahá ñahá da cuahan da ñuu Jope.

<sup>9</sup> Ta inga quiví itaan xíca na cán cuahan na íchi ta sa yati xinu coo na ñuu Jope. Ta cúú á tátuhun caxivi ta mé hora já nandaa Pedro jini véhe caça tahví da nu Ndióxi. <sup>10</sup> A juú quiahva cuíco Pedro chí ñaxíca da ña cuxu da. Ta nani cája ndíví na ña cuxu da já najánaḥa Ndióxi in ñaha nu dá. <sup>11</sup> Ta ña ñaxini da quéa nandinuna indivi já nanuu in jáhma cáhnu tátuhun in sábanā ña ndíco ndícomí tito ta núu a vaxi ñuyíví yóho xíní da. <sup>12</sup> Ta mé ini jáhma cán ñúhu tá nuú quítí, rí comí saha xihín coo xihín laa viti. <sup>13</sup> Anda já ñaxini johō da cáhan in a xihín dá já ñacachi a já:

—Pedro. Candichi ta cahní quítí jan casún.

<sup>14</sup> Anda já nanducú ñehe Pedro tuhun já cáchí da já:

—A cája toho i já, xitoho i jáchi ni in túhún tañu a ñáha caxí i quití quini tátuhun rí yóho. Jáchi cáchí ley ñasahan ndó nuú nde ña ná a cáxí toho nde ri —cáchí Pedro xihín á.

<sup>15</sup> Anda já ñacahan tucu a xihín dá já ñacachi a já:

—Sa nandaja vii va Ndióxi rí jan. Sahá ña cán quéa co ndítahan cachún ña cúu rí rí quini —cáchí a xihín dá.

<sup>16</sup> Tixi uní táhnda ñaxini da ña yóho ñacaja Ndióxi. Anda já nandindita tucu jáhma cán cuahan chí indiví. <sup>17</sup> Chí ñacasáhá ndícani ini Pedro ndía cúni cachi ña ñaxini da. Ta xihín ña yóho ñaxinu coo ndíhuni dataa, da nachindahá Cornelio mé vehe nu íin Pedro cán. Jáchi vaxi da ndaca tuhún da sahá vehe Simón janda quiahva nanditahan da ña. <sup>18</sup> Ndíta ndíhuni da cán yuyéhé vehe Simón ta cáyuhú da ndáca tuhún da sahá in da nani Simón, da cahan tucu na Pedro xihín. <sup>19</sup> Ta nani ndáca tuhún na yóho íin yii va Pedro jini véhe cán ndícani ini da sahá ña ñaxini da ñacaja Ndióxi cán. Anda já ñacahan ínima yii Ndióxi xihín dá já cáchí a já:

—Candehé, nandai cuu uní ña vehe yóho ta ndínducú da yohó. <sup>20</sup> Cuáhán nuu cuhún xihín dá ta a ndícani inún jáchi mí i nachindahá i da vaxi —cáchí a xihín Pedro.

<sup>21</sup> Anda já ñanuu Pedro já ñaxinu da nu ndíta dataa nachindahá Cornelio cán. Já ñacachi Pedro já xihín dá:

—Yehe cúu Pedro, da vaxi ndó ndínducú ndo ta viti cachi ndó xihín i ndá quéa cúni ndo.

<sup>22</sup> Anda já nanducú ñehe da cán tuhun nu Pedro já cáchí da já:

—Da naní Cornelio cúú da nachindahá ndehe vaxi nde. Mé Cornelio cúú dá in da cómí cuéntá sahá iñu ciento soldado. Mé dá cúú dá in ɬaa cája ña ndaa. Ta cája cáhnu da Ndióxi. Ta quihvi ndivaha ini na Israel da. Ta naçahan in tátō Ndióxi xihín dá ña ná chindahá da ndehe cana nde ndohó cuhun ndó vehe da já ná çahan ndó xihín dá ndá quëa cúni Ndióxi caja da —cáchí da xihín Pedro.

<sup>23</sup> Anda já najáyaha Pedro ndíhuni dataa cán ini vehe. Já naçandoo da cán naquiji da ñuu vehe Simón cán. Ta inga quiví itaan já naquee Pedro cuahan da xihín ndíhuni dataa cán. Ta ndáca Pedro java na cúú cuéntá Jesús ndúu ñuu Jope cán cuahan na xihín dá.

<sup>24</sup> Janda inga quiví itaan já naxinu çoo na ñuu Cesarea nu ín Cornelio ndáti da na. Mé Cornelio yóho sa najátaca da tóco ndihi na vehe da xihín java na ñehe táhan vaha xihín dá ndúu na xihín dá ndáti na saa Pedro. <sup>25</sup> Tá naxinu çoo Pedro vehe cán já naqueta Cornelio ndiquehe ñahá da. Ta tá nandihí já naçaxítí Cornelio nu Pedro ña caja cáhnu ñahá da. <sup>26</sup> Joo nasacu ndichí Pedro da já naçachi Pedro já xihín dá:

—Candichi jáchí ñayivi xihín mé vún cúú yehe.

<sup>27</sup> Sa já çahan Pedro xihín dá ndáca táhan da nandihvi da ini vehe. Ta tá nandihvi da cán já naxini Pedro nanditútú cuahá ñayivi ndúu na cán.

<sup>28</sup> Anda já naçasahá Pedro çahan da xihín ná já cáchí da já:

—Sa xíni vaha ndó ña cúú yehe in da naquixi chichi Israel. Ta sa xíni ndó ña sáhndá ley nuú nde

ñá ná a catáhan nde xihín ñayivi tóho. Ta ni vehe na ná a ndíhvi nde cáchí ley. Joo viti najánaḥa Ndióxi nuú i ña co cúu ndeḥe ñayivi víi chága a juú ga ndóhó, na tóho. <sup>29</sup> Sahá ña cán quéa tá naçana ndó yeḥe ivi laá naquee e vaxi i. Ta ni coó nandaja ndíchí i da ndáca yeḥe vaxi i yóho. Ta viti cúni candaa ini i ndá cuénta quéa naçana ndó yeḥe vaxi i —cáchí Pedro.

<sup>30</sup> Anda já nanducú ñehe Cornelio tuhun nu Pedro já cáchí da já:

—Janda comí quivi tátuhun hora viti, xíjuhun i ta xíca tahví i nu Ndióxi ndácaan i vehe e. Ta tá naṣandehé e já naḥini i in dataa ndíxi jahmá yeḥe cándichi da nuú i. <sup>31</sup> Já naçachi da já xihín i: “Cornelio, sa xíni joho Ndióxi nu xíca tahvún nu á. Ta quéhe a cuénta saḥá ñamañi cájún xihín na ndahví. <sup>32</sup> Ña cán quéa chindahá java dataa ná cuhun da ñuu Jope cana da Simón, da cáhan tucu na Pedro xihín ná quixi da cahan da xuhun. Viti ín tóo da vehe in da naní Simón, da ndája víi níi quíti. Ta yati yuhú tañuhú ndácaan vehe da”, naçachi tátó Ndióxi cán xihín i. <sup>33</sup> Sahá ña cán quéa ivi laá nachindahá i mozo i naṣaa da nducú da ndóhó. Ta vaha naçaja ndó vaxi ndó. Ta viti nanditútú ndihi nde ndáti nde nu Ndióxi. Ta cúni nde cuni joho nde tóco ndihi ña naṣahnda Ndióxi nu ndó cachi ndó xihín nde —cáchí Cornelio xihín Pedro.

### *Cáxi tuhun Pedro nuú ñayivi vehe Cornelio*

<sup>34</sup> Anda já naçasáhá cáhan Pedro já naçachi da já:

—Viti cánda a ini i ña coó na náhnu chága a juú ga inga na nu Ndióxi jáchi nu mé á in cúu ndihi

ví. <sup>35</sup> Ña cája mé á quéa ndíquehe vaha ndá ñayivi nacuú tá cándéé ini na mé á ta cája na ña vaha. Coó caja toho a á cúú ná na Israel á na tóho. <sup>36</sup> Nacaxi tuhun Ndióxi nuú ñayivi Israel ndá quiahva cuu coo vaha ini na tá cándéé ini na Jesucristo, mé á cúú xitoho toco ndihí. <sup>37</sup> Sa cándaá ini ndó ndaja nasahiin tá nacasáhá Juan cáxi tuhun da nuú ñayivi ndúu estado Galilea ña ná ndicó coo ini na nuú cuachi na ta já ná candúta na. Ta nandicutita nuu tuhun ndijáá nu ndúu na Israel. <sup>38</sup> Ta sa cándaá ini ndó ndaja nacaja Ndióxi xihin Jesús, mé a naquixi ñuu Nazaret. Najándicutú ndaa Ndióxi Jesús xihin ínima yii mé á ta najándicutú a ña xihin ndée mé á. Ta mé Jesús naxica nuu a cája ndinuhu ña vaha xihín ñayivi. Ta nandaja vaha mé á na nasandoho ini nacaja tiñáhá sacuahá. Nacaja Jesús ña yóho jáchi nasahiin Ndióxi xihin á. <sup>39</sup> Ta mé nde, na apóstol cúú na naxini ña nacaja Jesús tóco ndihi ña yóho tá nasahiin a estado Judea ta tá nasahiin a ñuu Jerusalén. Anda já nasahni na mé á tá nacata caa na a ndica crúxu. <sup>40</sup> Joo tá nayaha uní quivi já najánditacu Ndióxi Jesús ta nacaja Ndióxi ña ná nahá Jesús mé á nuú nde. <sup>41</sup> Coó nanaha toho Jesús mé á nu tóco ndihi ñayivi. Nuú ndehe, na nacaxi Ndióxi cuití va nanaha Jesús mé á. Jáchi janda jihna nacaxi mé á ndehe ña ná cuni nde ña ta ná cahan nde xihín ñayivi saha mé á. Ta tá sa nanditacu tucu a tañu ndii cán já naxixi nde xihin á. <sup>42</sup> Ta mé á nachindahá ndehe caxi tuhun nde nuú ñayivi saha Jesús ta ná ndicani nde nu ná ña nasacu Ndióxi mé Jesús ña ná caja vii a sahá ñayivi. Coó caja toho a á tácu na á naxihí na. <sup>43</sup> Ta jári na profeta va janda sanahá nacahan na

sahá Jesús ta nacachi na ña caja cáhnu ini Ndióxi sahá cuachi ndijáá ñayivi tá ná candeé ini na mé á —cáchi Pedro xihín ndihi na ndúu vehe Cornelio cán.

*Jándicutú Ndióxi na coó naquixi chichi Israel xihín ínimá yii mé á*

<sup>44</sup> Ta nani cáhan Pedro cándichi da já naxinu ínimá yii Ndióxi najándicutú a ínimá tóco ndihi na táa johó ña cáhan da cán. <sup>45</sup> Ta na cúu cuéntá Jesús, na naquixi chichi Israel, na ndáca Pedro vaxi xihín dá cán, nacatontó na tá naxini na nandicutú na tóho cán xihín ínimá yii Ndióxi. <sup>46</sup> Ta xíni na ña cúu á ña ndaa jáchi naxini johó ña cája cáhnu na Ndióxi ta cáhan na inga tuhun ña coó nasatiahva na. <sup>47</sup> Anda já nacachi Pedro já:

—Cája i cuéntá ni in túhún toho ñayivi a cúu caji nuu nuú na tóho yóho ña ná candútá ná jáchi sa nandicutú ínimá ná xihín ínimá yii Ndióxi tátuhun nandicutú mé nde xihín á —cáchi Pedro.

<sup>48</sup> Anda já nasahnda Pedro chuun ña ná jácandútá ná na cuéntá Jesucristo. Tá nandihí já naxica tahví na cán nu Pedro ña ná candoo da chága quivi xihín ná.

## 11

*Ndicani Pedro nuú na cúu cuéntá Jesús ndúu ñuu Jerusalén sahá ña nayaha vehe Cornelio*

<sup>1</sup> Tóco ndihi na apóstol xihín na cúu cuéntá Jesús ndúu estado Judea ñañehe ná tuhun ña nandiquehe ri na coó naquixi chichi Israel tuhun Ndióxi. <sup>2</sup> Ta tá nandicó coo Pedro chí ñuu Jerusalén já nacasáhá in táhnda na cúu cuéntá Jesús ndúu ñuu

cán cáhan núu na saha dá. Mé na yóho cáhán na ña ndítahan núu na tóho cahnda loho na yiquí cuñu na tátuhun ín costumbre na Israel. <sup>3</sup> Já cáhí na já xihín dá:

—Ndá cuéntá quéa nasahún naxito nihnún na coó naquixi chichi Israel. Ta ndá cuéntá quéa naxisún xihín ná. A váha toho nacajún cáhán nde —nacachi na Israel cán xihín Pedro.

<sup>4</sup> Anda já nacasáhá Pedro ndícani da tóco ndihi ña nayaha janda saha. Já nacachi da já:

<sup>5</sup> —Nasahjin i ñuu Jope. Ta nani xíca tahví i nu Ndióxi já najánaḥa mé á in ñaha núu i. Ta ña naxini i cúu in jáhma cáhnu tátuhun sábaná nanuu chí indivi ta ndícomí xoo tito á nacoḥo. Ta chí janda yati nu ín i naxinu a. <sup>6</sup> Ta tá nasandehé vaha i ini a já naxini i ñúhu tá núu quití, rí comí saha xihín tá núu quití yúcu xihín coo xihín laa ñúhu ini a naxini i. <sup>7</sup> Anda já naxini johó i cáhan in a já nacachi a já xihín i: “Pedro, cuáhán ndacoḥo cahní quití jan casún.” <sup>8</sup> Anda já nanducú ñehe e tuhun já nacachi i já: “A cáxí toho i rí yóho, xitoho i jáchi co xíní toho i caxí i quití quini tátuhun rí yóho”, cáhí i xihín Ndióxi. <sup>9</sup> Anda já nacahan tucu a cán chí indivi já nacachi a já: “Sa nandaja vií va Ndióxi rí jan. Saha ña cán quéa co ndítahan cachún ña cúu rí rí quini”, nacachi Ndióxi xihín i. <sup>10</sup> Uní táhnda nayaha ña yóho nacaja Ndióxi. Anda já nandaa tucu tóco ndihi ña cán cuahan tucu a chí indivi. <sup>11</sup> Ta chí sa mé hora já naxinu coo uní taa ndínducú da yehe mé vehe núu nasahjin too i cán. Ta da cán naquixi da janda ñuu Cesarea ndínducú da yehe. <sup>12</sup> Ta já nachindahá ínima yíi Ndióxi yehe cuahan i xihín ná sahá ña cán quéa coó nayihví i cuhun

i xihin ná. Ta ndáca i iñu ñaní yóho nasahan da xihín i. Tá naxinu coo nde ñuu cán já naquihvi nde vehe Cornelio, da nachindahá da cán ndinducú yehe. <sup>13</sup> Ta tá sa ñúhu ndihi nde vehe Cornelio cán já nacasáhá ndícani da nuú nde ña naxini da cándichi in tátō Ndióxi ini vehe da ta naxachi a xihin dá já: “Chindahá java taa ná cuhun da ñuu Jope cana da in da naní Simón, da cáhan tucu na Pedro xihin. <sup>14</sup> Ta da cán caxi tuhun xuhun ta xihín ndihi na vehún ndaja caja ndó cacu ndaa ínimá ndó”, naxachi tátō Ndióxi xihin Cornelio cán. <sup>15</sup> Ta tá nacasáhá i cáhan i xihín na vehe Cornelio cán já nandicutú ndaa ínimá ná xihin ínimá yii Ndióxi tá quiahva najándicutú a ínimá mí jihna. <sup>16</sup> Xihín ña yóho nandicuhun ini i ña naxachi Jesús, xitoho í xihin yo tá naxachi a já: “Mé a ndaa najácandúta Juan ndohó xihín ticuú joo vaxi quivi jándicutú Ndióxi ndohó xihin ínimá yii mé á”, naxachi Jesús. <sup>17</sup> Ta tá sa nasahan Ndióxi ínimá yii mé á nuú na cán tá quiahva naxaja xihin mí sahá ña naxandúsa í Jesucristo, xitoho í ama ná cani táhan i xihin Ndióxi sahá ña cája mé á xihín na cán —naxachi Pedro.

<sup>18</sup> Tá naxini johō na cán ña naxachi Pedro já naxatáji ná ta naxaja cáhnu na Ndióxi já naxachi na já:

—Mé a ndaa sahan ri Ndióxi ñamaní nuú na tóho ña ná ndicó coo ini na jándacoo na cuachi cája na já ná coo na xihin mé á anda ama cáa quivi —naxachi na cúu cuéntá Jesús, na naquixi chichi Israel cán.

*Cuahá na ñuu Antioquía ndiquehe na íchi cuéntá Jesús*



19 Tá nandihí nasahní nā Esteban já nacasáhá cája xíxi na xihín nā cúú cuéntá Jesús. Andā já nandicuita nuu na cuahān nā ta java na naxinu na jandā chí estado Fenicia. Java na naxinu na cuahān nā chí isla Chipre. Ta java na naxinu na chí ñuu Antioquía. Ta cán nacasáhá cáhān nā tuhun Ndióxi nuú nā naquixi chichi Israel cuití va. Joo coó naçaxi tuhun na ñā nuú nā tóho cán. 20 Joo java nā cúú cuéntá Jesús, nā naquixi chí isla Chipre cán xihín nā naquixi ñuu Cirene naxinu coo na ñuu Antioquía ta nacasáhá nā cáhān nā tuhun vaḥa saḥa Jesús, xitoho í xihín nā coó naquixi chichi Israel ndúu cán. 21 Ta nasahān Ndióxi cuahá ndée mé á nu ná. Ta cuahá ndivaha ñayivi najándacoo na costumbre yatá nā ta nandiquehe na íchi cuéntá Jesús, xitoho í.

22 Tá nacandaā ini nā cúú cuéntá Jesús ndúu ñuu Jerusalén tóco ndihí ñā nayaha cán já nāchindahá nā Bernabé cuahān dā jandā ñuu Antioquía cán. 23 Tá naxinu coo Bernabé ñuu Antioquía cán já naxini da ndá quiahva naçaja Ndióxi ñāmaní xihín ñayivi ñuu cán chí naçajii ndivaha ini da. Ta naçahān dā xihín ná ñā ná candico nā íchi cuéntá Jesús xihín ndinuhu ini na. 24 Mé Bernabé yóho cúú dá in taḥa vaḥa. Ta chútú ndāā ínima dā xihín ínima yii Ndióxi ta cāndeé cáhnu ini da mé á. Ta cuahá ñayivi nandiquehe na íchi cuéntá Jesús, xitoho í sahá ñā naçaja da.

25 Tá nandihí já naçee Bernabé cuahān dā ndinducú dā Saulo chí ñuu Tarso. Ta tá nandinehe dá Saulo já ñéhe da dā cuahān dā chí ñuu Antioquía. 26 Ta nasanduu da xihín nā cúú cuéntá Jesús mé ñuu cán tátuhun in cuiā. Ta najánaḥa

da tuhun Ndióxi nuú cuahá ndivaha ñayivi. Ta mé ñuu Antioquía cán cúú nuú nu cuítí nasacu na quivi ná cananí na ná cúú cuéntá Jesús.

<sup>27</sup> Ta mé tiempo já naxinu ɔo java na profeta mé ñuu Antioquía cán. Mé profeta yóho naquixi na chí ñuu Jerusalén ta tiahva na jáyaha na tuhun cáhan Ndióxi nuú ñayivi. <sup>28</sup> Ta in táhan da profeta cán, da naní Agabo nandaca ndíchí da tañu na cúú cuéntá Jesús mé vehe nuú nataca na cán. Já nacachi da já:

—Cáxi tuhun ínima yji Ndióxi xihín i ña quixi in tama ndeé ndivaha ndijáá ñuyiví yóho —nacachi da xihin ná.

Ta chí já ndusa nasahin jáchi naquixi in tama ndeé ndivaha tá nasacomí Claudio cuéntá sahá ñayivi ñuu Roma. <sup>29</sup> Anda já na cúú cuéntá Jesús ñuu Antioquía cán najátaca na jihún chindeé ñahá na cán. Ta ndá quiahva xinu ɔo nu mé ná quiahva na, quiahva já sahan na. Anda já nachindahá na ña nuú na cúú cuéntá Jesús ndúu estado Judea. <sup>30</sup> Ta mé Saulo xihín Bernabé cúú da ñéhe jihún cán cuahan da ndiquiahva da ña nuú na sacuahá cómi cuéntá sahá na cúú cuéntá Jesús ndúu estado Judea cán.

## 12

*Tá nacasáhá ndóho chága ini na cúú cuéntá Jesús*

<sup>1</sup> Ta mé tiempo já nacasáhá Herodes, da cómi cuéntá sahá ñuu Jerusalén cán cája xixi da xihin java na cúú cuéntá Jesús. <sup>2</sup> Nasahnda da chuun ña ná cahní na Jacobo, ñani Juan xihin yuchú cáni. Ta já nacaja na. <sup>3</sup> Ta tá naxini Herodes ña nacajii íni na sacuahá veñuhu Israel xihin ña nasahní da

Jacobo já natiin ri da Pedro. Ta ña yóho nasacuu a mé tiempo tá cája na Israel víco tá xíxi na pan ña co cáva táhan yusá naxaa xihin. <sup>4</sup> Tá sa nachicaan Herodes Pedro vecaa já nasahnda da chuun nuú comi táhnda soldado ña ná candaa na da. Ta comi comi ta ndáca in in táhnda cán. Mé Herodes nasacu ini da tavá da Pedro vecaa ndiquiahva da da nuú ñayivi Israel ña ná cahni na da tá sa ná yaha víco. <sup>5</sup> Nani ndácaan Pedro vecaa ndáa vaha na da. Joo na cúu cuéntá Jesús xihín ndinuhu ini na xíca tahví na nu Ndióxi saha dá.

### *Tává Ndióxi Pedro vecaa*

<sup>6</sup> Ta in ñuú sácú ini Herodes tavá da Pedro vecaa inga quiví itaan ña ndiquiahva da da nuú ñayivi, nduu. Joo mé ñuú já nani cándúhu Pedro quiji da tañu ivi soldado ta ndíco jín ga cadena ndáha dá ta co cáhan sahá java ga soldado ndíta ndáa yéhe vecaa cán. <sup>7</sup> Ta in náá cuití naxinu co in tát Ndióxi ini vecaa cán chí nandiyihvi ndaa ini a. Anda já naxinu co mé tát Ndióxi nu cándúhu Pedro já naquiní a ndáha á yica ndicá da já nandicáxi ini da. Anda já nacachi a já xihin dá:

—Camún ndacoo quíun.

Anda já nacuyu cadena ña nasandico ndáha Pedro. <sup>8</sup> Anda já nacachi tucu tát Ndióxi cán já xihin dá:

—Ndaja tuun ní tísun ta cayihi ndusun.

Ta tá sa nacaja da ña já nacachi tucu tát Ndióxi já xihin dá:

—Quehe ticachí níhnu chinúú jatun ná cohó candico yehe —cáchi a xihin dá.

<sup>9</sup> Anda já tácaa Pedro jata tát Ndióxi cán cuahan da. Joo co xini da á jivi quéa á a juú a. “Sání ví”,

cáhán da. <sup>10</sup> Ta xíca na cásahan na já nayaha na nu ndíta in táhndá soldado. Ta anda já nayaha na nu ndíta inga táhndá soldado. Ta tá sa naxinu coo na yéhe caa cán já nanuna mé va já naquee na vecaa cuahan na. Ta tá sa naxica chá na cáyé cán já naquee tátō Ndióxi cán cuahan ta já nacandoo Pedro cán. <sup>11</sup> Anda já nacandaa ini Pedro ña nayaha. Ta nacachi da já xihin mé dá:

—Viti ndusa cándaa ini i ña mé a ndaa táhyí quéa nacaja tátō Ndióxi yóho. Mé Ndióxi nachindahá a tátō á já ná tavá a yehe ndáha Herodes já ná a cáhni da yehe tá quiahva cúni na Israel —nacachi da.

<sup>12</sup> Nani cáhán Pedro xíca da cuahan da vehe María, ña cúu náná Juan, da naní tucu Marcos. Cán nanditútú cuahá na cúu cuéntá Jesús ndúu na xíca tahví na nu Ndióxi saha Pedro. <sup>13</sup> Ta tá naxinu coo da vehe María cán já nacasáhá cáti ndáha dá yéhe cán. Anda já naxinu coo in ña loho naní Rode ña candehé ña ndá na cándichi jata véhe cán. <sup>14</sup> Tá naxini joho ña cáhan da já nandicuni ña tachí Pedro. Joo nandindójó ña cuná ña yéhe sahá ña cájii íni ña. Ta já xínu ña nandicó coo tucu ña ini vehe caxi tuhun ña xihin na java cán ña cándichi Pedro jata véhe. <sup>15</sup> Joo tá nandicani ña ña yóho nu ná já nacachi na já xihin ña:

—Tachí va cúu yóhó.

—Jivi da —cáchi ña cán ndúcú ndée ña cáhan ña xihin ná.

Anda já nacachi na cán já:

—Ndá ínimá va da quéa jan jáchi vecaa va ndacaan Pedro —nacachi na.

<sup>16</sup> Joo ndaja coo Pedro cáti ndáha yii va da yéhe cán. Já naxinu coo na nasuná na yéhe nu dá ta chí

nayihví na tá naxini na da. <sup>17</sup> Joo nacu ndáha dá nu ná ña ná a cáhan chága na. Anda já nacasáha da ndicani da nu ná ndaja naja Ndióxi natavá a da veca can. Ta já nacachi da xihin ná:

—Ndicani ndó ña yóho nu Jacobo ta ndicani ndó ña nu tóco ndihi na cúu cuénta Jesús —nacachi Pedro.

Anda já naqueta Pedro cuahan da.

<sup>18</sup> Tá nativi inga quivi itaan já ncatónto soldado veca can tá nacanda ini da ña coo Pedro in veca ta coo naxini da ndáchi cuahan da. <sup>19</sup> Anda já nasahnda Herodes chuun ña ná ndinducú na da. Joo coo nandiñehe ná da. Anda já nacasáha da ndája ndichi da soldado veca can ndáchi cuahan Pedro. Joo coo nacu cachi na can ndáchi cuahan da. Sahá ña can quéa nasahnda Herodes chuun ña ná cahni ndihi na soldado da nasandaa yéhe ca can. Tá nayaha ña yóho já najandacoo Herodes estado Judea can ta naquee da cuahan da chí Cesarea coo da.

### *Quivi naxihi Herodes*

<sup>20</sup> A juu quiahva xójo ini Herodes xihin ñayivi ndúu ñuu Tiro xihin na ndúu ñuu Sidón. Joo ndivi ñuu can najandique táhan na tuhun na cuhun na cahan na xihin dá. Coo vaha ini na xihin dá cuni na jáchi ñundáhyi rey can cána tóco ndihi ña xixi na. Joo jihna ñuhú nandique táhan maní ná xihin in da naní Blasto. Mé Blasto yóho nasacu da in da cáhnu cája chúun nu rey can. Ta ncahan na ña ná cahan ndahví da can nu rey saha ná. <sup>21</sup> Ta nasacu Herodes in quivi nditútú ndihi na nu dá. Ta tá natandaa mé quivi já nasacandixi Herodes jáhma vaha ndivaha da, ña sacandixi rey. Ta nasaco da

nu sác̄o rey. Ta já naçahan cóhó da xihín ñayivi.  
 22 Tá naxinu coo ña cahan da já naçasáhá ñayivi cán cáyuhú na já cáchí na já:

—Ndióxi cúú da yóho ta co cúú dá ndá taa naçuu —cáchí na cája cáhnu na Herodes cán.

23 Ta chí sa mé hora já naxinu in tát̄o Ndióxi ta naçaja ña ná quehe Herodes cuehe jáchi coo naçaja cáhnu da Ndióxi ta já naçahan da ñamaní nuú ñayivi ña cáchí na cúú dá ndióxi. Chí sa mé hora já naquihvi ticujú yiquí cuñu da já naxihí da.

24 Ta ní cúú nandicuíta nuu tuhun vaaha saha Jesús xíca cuahan. Ta chí nandicuaha chága na cúú cuéntá Jesús.

25 Ta ndaja coo nandiquiahva Bernabé xihin Saulo mé jiuhún nuú na saçuaha veñuhu ndúu ñuu Jerusalén já nandicó coo da cuahan da ñuu Antioquía. Ta ndáca na Juan, da naní tucu Marcos cuahan da xihin ná.

## 13

### *Cája chúun Bernabé xihin Saulo cuéntá Ndióxi*

1 Ta ndaja coo tañu na cúú cuéntá Jesús ndúu ñuu Antioquía cán ndúu na cúú profeta ta ndúu ri na jánaḥa tuhun Ndióxi. Ta ña yóho cúú quivi ná: Bernabé xihin Saulo xihin Simón, da cahan na Taa Tuún xihin, xihin Lucio, da ñuu Cirene xihin Manaén, da naçahnu xihin Herodes. Mé Herodes yóho cúú dá da cómi cuéntá sahá ñayivi estado Galilea. 2 In quivi nani nanditútú ndihi na ndúu na xijuhun na ta cája cáhnu na Ndióxi já naçahan ínimá yii mé á xihin ná já naçachi a já:

—Tavá j́in ndó Bernabé xihín Saulo jáchi sa ñacaxi mí i chuun quiahva i nu ná caja na — ñacachi a.

<sup>3</sup> Ta tá sa ñandihí naxijuhun na ta tá ñandihí naxica tahví na nu Ndióxi já ñachojó ña ndáha ná jiní Saulo xihín Bernabé já ñandindayí ña ña cuahan ña caja na chuun Ndióxi.

*Cáhan Saulo xihín Bernabé tuhun vaha saha Jesús isla Chipre*

<sup>4</sup> Tá ñandihí já ñachindahá ínimá yíi Ndióxi Saulo xihín Bernabé cuahan ña ñuu Seleucia. Ta cán ñandaa na barco cuahan ña isla Chipre. <sup>5</sup> Ta ndáca na Juan, ña naní tucu Marcos cuahan ña xihín ná já ná chindeé ña ña. Ta tá naxinu çoo na ñuu Salamina nu sá ndíchí barco cán já ñacasáhá ña cáhan ña tuhun Ndióxi nuú ñayivi táca veñuhu ña Israel cán. <sup>6</sup> Níi cúu isla cán naxica nuu na janda quiahva naxinu çoo na ñuu Pafos. Ta cán ñanditahan na in ña tají ñaquixi chichi Israel ta naní ña Barjesús. Ta cúu dá in ña tuhún jáchi cáchi ña xihín ñayivi ña cáhan ña cuénta Ndióxi. <sup>7</sup> Ta mé ña tají yóho ñasahín tuun ña xihín in ña naní Sergio Paulo, ña cúu gobernador nuú ñayivi isla Chipre cán. Ta ñasacuu ña ña ndíchí jiní. Ta mé gobernador yóho ñacana ña Bernabé xihín Saulo jáchi cuni ña cuni joho ña tuhun Ndióxi. <sup>8</sup> Joo ña tají naní Barjesús, ña naní tucu Elimas ñacasáhá ña sáji nuu ña nuú Bernabé xihín nuú Saulo jáchi çoo cuni ña ña ná candeé ini gobernador cán Jesús. <sup>9</sup> Ñandicutú ndaa ínimá yíi Ndióxi ini Saulo, ña cáhan ña Pablo xihín já ñacasáhá sáñdehé ndaa ña nuú ña tají cán. <sup>10</sup> Já ñacachi ña já xihín dá:

—Yóhó cúún t̄aa quini ta cúún jahyi tiñáhá, da xíca jándahvi ñayivi. C̄o cúún t̄ócó ndihi ña vaha jáchi cúnun caji nuún nuú ñayivi ná a ndíquehe na íchi cuéntá Jesús. <sup>11</sup> Ta viti jándoho Ndióxi inún. Jácuáá a yohó ta ni a cúún nuú candii t̄ixi chá quivi —ñacachi Pablo xihín da tají cán.

Tá ñacachi Pablo já chí ivi laá ñacuaá da cán. Jandá tiin ndaa na da xíca da jáchi c̄o tívi nuú dá. <sup>12</sup> Tá ñaxini da cúú gobernador cán ña yóho chí ivi laá ñacandúsa da Jesús. Jáchi chí c̄átóntó da xini johó da t̄ócó ndihi ña cáhan na saha Jesús.

*Xínu c̄oo Pablo xihín Bernabé ñuu Antioquía ña ndácaan estado Pisidia*

<sup>13</sup> Nandaa Pablo xihín na xíca xihin dá barco ñuu Pafos cuahan na chí ñuu Perge ña ndácaan estado Panflia. Joo ñasahnda táhan Juan, da naní tucu Marcos xihin ná já ñandicó c̄oo da chí ñuu Jerusalén. <sup>14</sup> Tá ñandihí já ñaquee Pablo xihín na xíca xihin dá ñuu Perge já ñaxinu na ñuu Antioquía ña ndácaan estado Pisidia. Ta mé quivi ndíquehe ndée ñayivi ñandihvi na veñuhu já ñasac̄oo na. <sup>15</sup> Ta tá sa ñandihí ñacahvi na ley Moisés xihín ña ñacahyí na profeta já ñacana na sacuahá veñuhu cán Pablo xihín na xíca xihin dá já ñacachi na já xihin ná:

—Ñani i, tá iin tuhun vaha cúni ndó cahan ndó xihín ñayivi yóho cuu candichi ndó cahan ndó xihin ná viti —ñacachi na cán xihin dá.

<sup>16</sup> Anda já ñacandichi Pablo já ñacuu ndáha dá nu ná catáji yúhu ná já ñacasáhá cáchí da já xihin ná:



—Cuni johho ndó ñayivi Israel xihin tóco ndihi ndó, na cája cáhnu Ndióxi. <sup>17</sup> Mé Ndióxi, mé a cája cáhnu ñayivi nación Israel naçaxi a tásáhnu jícó yo ta naçaja mé á ña ná ndicuáhá ndivaha na nani nasacuu na na tóho nación Egipto cán. Joo tá nandihí já natavá mé á na xihin ndée mé á. <sup>18</sup> Ta cáhnu nasahiin ini Ndióxi sahá cuachi na tañu ivi jico cuia nani naçica nuu na yucú íchí cán. <sup>19</sup> Ta najándihí Ndióxi sahá usa nación ñayivi nasanduu ñundáhyi Canaán já najáyaha ñundáhyi jan ndáha tásáhnu jícó yo jáchi janda sanahá nasahan mé á tuhun a nu ná ña caja já xihin ná. <sup>20</sup> Anda já nasahnda Ndióxi chuun nu juexe já ná cacomí na cuéntá saha ná tixi comi ciento java cuia janda quiahva naçinu coo tiempo tá naquixi profeta Samuel, da jáyaha tuhun cáhan Ndióxi nuú ñayivi. <sup>21</sup> Anda já naçica tahví na Israel nu Ndióxi ña ná cacu mé á in rey ná cacomí da cuéntá saha ná. Sahá ña cán quéa nasacu Ndióxi in da naní Saúl ná cacuu da rey nu ná. Nasacuu da jahyi Cis, da naquixi chichi Benjamín. Ta nasacomí Saúl cuéntá saha ná tixi ivi jico cuia. <sup>22</sup> Tá nandihí já natavá Ndióxi Saúl já nachinúu a David ña ná cacomí da cuéntá saha ná. Já naçachi Ndióxi já saha dá: “Íin vaha ini i xihin David, jahyi Isaí jáchi xini ña caja mé dá tóco ndihi ña cuni”, naçachi Ndióxi saha David. <sup>23</sup> Ta in da naquixi chichi mé David cán cúu Jesús, mé a nasahan Ndióxi tuhun a chindahá jáçacu ñayivi Israel janda sanahá ndivaha. <sup>24</sup> Ta janda tá cámaní quixi Jesús já naçica nuu Juan, da jácandúta ñayivi naçahan da xihin ñayivi ña ndítahan nu ná jándicoo na cuachi cája na ta ná

candúta ná. <sup>25</sup> Ta tá sa yati quivi da já nacachi da já xihín ñayivi: “A juú cahán ndo ña cúú yehe da nachindahá Ndióxi cacomí cuénta saha ñayivi, vaha. Jáchi ja chá xinu inga da ín chága saha a juú ga yehe. Ta da cán cacomí cuénta saha ndo ta cúú ndusa da cáhnu chága ta chí coó saha mí i caxítí i ndaxí i correa ndusa dá”, nacachi Juan xihín ñayivi cán.

<sup>26</sup> Cuni johu vaha ndó, ñani i, na naquixi chichi Abraham xihin tóco ndihi ndó, na cája cáhnu Ndióxi xihín ndinuhu ini. Mé Ndióxi cúni a ña ná candaá ini ndó ña nachindahá mé á Jesús ñuyíví yóho já ná jácacu a ndohó já ná a cühun ndó indayá. <sup>27</sup> Tóco ndihi na ndúu ñuu Jerusalén xihín na sacuahá coó nacandaá ini na ña nachindahá Ndióxi Jesús ñuyíví yóho. Ta ni coó nacandaá ini na tuhun nacahyí profeta saha Jesús tá nasacahvi na ña veñuhu tá quivi ndíquehe ndée ná. Sahá ña cán queá nasahní na Jesús joo xihín ña nacaja na yóho najáxinu coo na ña nacachi profeta sanahá. <sup>28</sup> Ta vatí coó nañehe ná cuachi chicao na jata Jesús joo naxica na ñamaní nu Pilato ña ná cahnda da chuun ña ná cahní na Jesús. <sup>29</sup> Ta tá sa naxinu coo tóco ndihi ña cáhí tuhun Ndióxi saha mé á coo anda já najánuu na a ndica crúxu já najánduxu na ña. <sup>30</sup> Joo najánditacu Ndióxi Jesús tañu ndii. <sup>31</sup> Ta tixi cuahá quivi nanaha Jesús mé á nuú na nasañehe táhan xihin á tá naquee a estado Galilea cuahan chí Jerusalén. Ta mé na cán cúú na xica cahan saha mé á nuú ñayivi viti.

<sup>32</sup> Sahá ña cán queá cáxi tuhun nde tuhun vaha saha Jesús nu ndohó viti jáchi janda saha nacachi Ndióxi xihin tásáhnu jícó yo ña já coo. <sup>33</sup> Ta

tá najánditacu Ndióxi Jesús najáxinu coo a tūhun naṣahan nu yó, na naquixi chichi na cán. Jáchi já naṣahyi a nu Salmo ivi ta saha Jesús naṣahan tá naṣachi a já: “Jahyi mí i cúu yóhó. Ta yehe cája ña ná catacún quivi viti”, cáchi tūhun Ndióxi. <sup>34</sup> Joo Ndióxi sa naṣahan va tūhun a ña jánditacu a Jesús já ná a táhyi yiquí cuñu a. Jáchi já naṣahyi a ini libro yii mé á já cáchi a já: “Nu yóhó quiahva i tóco ndihi ña vaḥa, ña naṣahan i tūhun i nu David quiahva i nu dá”, cáchi tūhun Ndióxi. <sup>35</sup> Já cáchi tucu inga Salmo já: “Mé ndó a quiahva toho ndó ñamaní tahyi yiquí cuñu i jáchi cúu u jahyi máni mé ndo, da cája chúun nu ndo”, cáchi tūhun Ndióxi. <sup>36</sup> Ta sa xini yo co cáhan ña yóho sahá ña naṣaja David jáchi tá nandihí naṣaja da ña naṣahnda Ndióxi nu dá já naxihí da ta najánduxu na da nuú nanduxu tásahnu jícó da. Ta natahyi yiquí cuñu da cán. <sup>37</sup> Joo yiquí cuñu Jesús coo natahyi toho a jáchi najánditacu Ndióxi ña. <sup>38</sup> Ña cán quéa vaxi nde caxi tūhun nde ña yóho nu ndo, ñani i já ná candaa ini ndó ña cája cáhnu ini Ndióxi sahá cuachi ñayivi sahá ña naṣaja Jesús tá naxihí a ndica crúxu. <sup>39</sup> Ta cája cáhnu ini Ndióxi sahá cuachi ñayivi tá cándéé ini na Jesús. Jáchi ni in túhún ñayivi a cúu nduu ndaa nu Ndióxi sahá ña sácú vaḥa na ley Moisés. <sup>40</sup> Joo cuéntá coo ndó a juú ndoho ndó ña naṣachi na profeta sanahá tá naṣachi na já: <sup>41</sup> Cuni johó vaḥa ndó, ndóhó na sácú ndaa ichi ña cáhan Ndióxi.

Catóntó ndo jáchi cama chá ndihí saha ndo.

Jáchi yehe cúu Ndióxi ta cája i ña náhnu ndivaḥa, joo co cándúsa ndó ña cája i vatí ndicani java na ña

nu ndo, nacachi Ndióxi sanahá —nacachi Pablo xihín ná.

<sup>42</sup> Ta tá naqueta Pablo xihín na xíca xihín dá veñuhu na Israel cán já naxíca ñayivi, na coo naquixi chichi Israel ñamaní nu dá ña ná cahan da xihín ná sahá tuhun Ndióxi inga quivi ndiquehe ndée ná. <sup>43</sup> Tá naquee ndihi na veñuhu cán já cuahá na Israel xihín cuahá na tóho, na cándusa ley Moisés ta cája cáhnu na Ndióxi nacasáhá na ndico na jatá Pablo xihín jatá Bernabé. Ta Pablo xihín Bernabé jánaha da na ña ná candeé cáhnu ini na Ndióxi já ná caja mé á ñamaní xihín ná.

<sup>44</sup> Ta tá naxinu coo inga quivi ndiquehe ndée ná já nataca tátuhun tóco ndihi ñayivi ñuu veñuhu cán ña taa johu na tuhun Ndióxi cuni na. <sup>45</sup> Joo tá naxini na naquixi chichi Israel cán ña nataca cuahá ndivaha ñayivi já nacasáhá na Israel cáhivi ini na. Já nacasáhá na cahan núu na saha Pablo ta nacanahá na xihín dá. <sup>46</sup> Xihín ña cán nandindeé chága ini Pablo xihín Bernabé já nacasáhá cáhí da já:

—Jihna ñuhú ndítahan nuú nde caxi tuhun nde tuhun Ndióxi nu mé ndó, na naquixi chichi Israel. Joo sándehe nde ña co cuni toho ndó ndiquehe ndó ña. Ta cája nde cuénta ña coo saha ndó cuhun ndó indiví. Sahá ña cán quea vaha chága ná cuhun nde cahan nde tuhun Ndióxi xihín na coo naquixi chichi Israel. <sup>47</sup> Jáchi já cáa chuun nasahnda Ndióxi nuú nde tá nacachi a já xihín nde:

Nasacu yehe ndohó ña ná caxi tuhun ndó nuú ñayivi tóho ndúu ndijáá ñuyiví,

já ná candaá ini na ndaja caja na ná cacu ndaa ínimá ná, nacachi Ndióxi —nacachi Pablo xihin ná.

<sup>48</sup> Tá naxini johó na tóho, na cóo naquixi chichi Israel cán ña yóho chí nacajii ini na já nacasáhá na cáhan na ña cúu ndusa tuhun Ndióxi ña vaha. Ta tóco ndihi na nacaxi Ndióxi cacu ndaa ínimá, nandihvi na íchi cuéntá mé á. <sup>49</sup> Já nasahin nuú naxita nuu tuhun Ndióxi ní cúu ñundáhyi cán. <sup>50</sup> Joo na naquixi chichi Israel cán najándivaa na java najihí, na catóo cuhun veñuhu, na có cáhan núu ñayivi saha. Ta najándivaa na java dataa, da ín saha ñuu cán ña ná ndicuíta na xihin Pablo xihín Bernabé viti ta anda quiahva ná tavá na da ñundáhyi cuéntá ñuu cán. <sup>51</sup> Anda já naquiji nihni Pablo xihín Bernabé ña yácá ndusá saha mé dá já ná nahá nuú na cán ña cóo natahan ini da xihín ña cája na Israel cán. Já naquee da ñuu Antioquia cán cuahan da inga ñuu naní Iconio. <sup>52</sup> Ta na cúu cuéntá Jesús, na nacandoo ñuu Antioquia cán nandicutú ndaa ínimá ná xihin ínimá yii Ndióxi ta cájii ndivaha ini na.

## 14

*Cáhan Pablo xihin Bernabé tuhun Ndióxi nuú ñayivi ndúu ñuu Iconio*

<sup>1</sup> Tá naxinu Pablo xihin Bernabé ñuu Iconio já nandihvi da veñuhu nu ndítaca na Israel cán. Ta cán nacahan da tuhun vaha saha Jesús nu ná. Ta cuahá ndivaha na Israel xihín na cóo naquixi chichi Israel nacandeeé ini na Jesús. <sup>2</sup> Joo java na Israel, na cóo nacandúsa tuhun Ndióxi nacasáhá na cáva na jiní ñayivi, na cóo naquixi chichi Israel

ñã ná cahan núu na sahá nã cúú cuéntá Jesús. <sup>3</sup> Sahá ñã cán quéã nasanduu nahá chága ví Pablo xihín Bernabé mé ñuu cán. Ta cõ ná yihví nã cahan chága ví nã tuhun Ndióxi jáchi cándeé ini na Jesús, xitoho na. Ta nasahan Ndióxi ndéé á nu ná ñã ná cuu caja na cuahá nuú ñã náhnu ta xihín ñã yóho nacandaa ini ñayivi ñã mé a ndaa táhyi quíhvi ini ndusa Ndióxi ñayivi. <sup>4</sup> Joo ñayivi ñuu cán nacasáhá nã sáhndá táhan na jáchi java na cuahan nã jatá nã Israel ta java na cuahan jatá nã apóstol cán. <sup>5</sup> Andã já nã Israel xihín nã coó naquixi chichi Israel najándique táhan na tuhun na xihín nã jutixia ñuu cán ñã ndúcú nã canahá quini na xihín nã apóstol ta nducú nã cahní nã ñã xihín yuu. <sup>6</sup> Joo tá nacandaa ini Pablo xihín Bernabé ñã sácú ini nã cán caja xíxi na xihín dá já naxinu da cuahan ñã chí estado Licaonia. Naxinu coo da ñuu Listra xihín ñuu Derbe xihín java gã ñuu válí núhu ndijáá chí cán. <sup>7</sup> Ta cán nacahan ri da tuhun vaha saha Jesús nuú ñayivi ndúú cán va.

### *Cúun na yuu Pablo ñuu Listra*

<sup>8</sup> Tá naxinu coo da ñuu Listra cán já nandique táhan da xihín in dataa, ñã a cuú caca. Ta ín coo ñã cán jáchi cúú dá ñã quíhvi saha janda tá nacacu da cáa da já. <sup>9</sup> Ta ín coo ñã quíhvi saha yóho táa johu da nu cahan Pablo. Andã já nandicoto nihni Pablo nu dá ta cándaa ini Pablo ñã cuu ndivaha da jáchi cándeé ini ñã quíhvi cán Ndióxi. <sup>10</sup> Sahá ñã cán quéã nacayuhú Pablo nu dá já cáchí ñã já:

—Cuáhán candichi —nacachi Pablo.

Ta chí ivi laá nacandita da ta nacasáhá xíca da. <sup>11</sup> Tá naxini ñayivi ñuu cán ñã nandaja vaha

Pablo da cán já naçasáhá na cán cáyuhú cóhó na mé tuhun cáhan na ñuu Licaonia, ña co cándaḡa ini Pablo. Já cáchí na já:

—Ndióxi cúu da yóho ña naquixi indiví túní a ñéhe cuití da nahná ñayivi —cáchí na cáyuhú na tuhun mé ná.

<sup>12</sup> Naçachi na cán ña Bernabé cúu dá in ndióxi naní Júpiter. Ta Pablo cúu dá in ndióxi naní Mercurio cáchí na jáchí mé dá cúu da cáhan chága. <sup>13</sup> Ta da cúu jutú nuú veñuhu Júpiter, ña ndáçaan yuhú ñuu cán ñéhe da tindiçui xihín cuahá ita jáchí ndúcú ndihi na cán cahní na tindiçui joco na rí nu Pablo xihín nuú Bernabé caja cáhnu na da. <sup>14</sup> Joo tá naçandḡa ini Pablo xihín Bernabé ña ndúcú na cán caja cáhnu na da já nandata da jáhma dá sahá ña co táhán ini da xihín ña cája na. Ta já naçasáhá na xínu na naquihvi na tañu ñayivi cán. Ta cáyuhú Pablo já cáchí da já xihín ná:

<sup>15</sup> —Candehé ndo. A váha toho ña ndúcú ndó caja ndó yóho jáchí ñayivi xihín mé va ndó cúu ndehe. Ndá cuéntá quéa cúní ndó caja cáhnu ndó ndehe. Ta chuun vaxi nde yóho quéa çaxi tuhun nde xihín ndó tuhun vaha saha Jesús. Ta já ndítahan nu ndo jándacoo ndó ña a váha jan. Ta candiço ndó Ndióxi tácu, mé á naçavaha indiví xihín ñuyiví xihín tañuhú xihín tóco ndihi ñaha ndúu nuú in in ña cán. <sup>16</sup> Andḡa sanahá najándicoo ndáha Ndióxi ñayivi ndijáá nación caja na ndiḡa cúní mé va na caja na. <sup>17</sup> Joo ní tiempo najánaḡa Ndióxi yo cúu mé á nu ná jáchí ní tiempo naçaja vaha mé á xihín ná. Mé a chindahá javi nu yo. Ta mé á cája ña ná cana vaha ñundáhyi yo. Ta cája mé á ña ná

a cámaní ña cuxú já ná cajii ínı yo —naçachi Pablo xihín na cán.

<sup>18</sup> Ta vatı naçahan Pablo tuhun yóho xihín ná joo ihvi ndivaha já naçava da jinı ñayivi cán ña ná a cáhnı na tındiquı joco na nu dá ña caja cáhnu na da.

<sup>19</sup> Tá nandihı já naxınu ço java na Israel, na naquixı ñuu Antioquía xihín java na naquixı chí ñuu Iconio. Já naçava na jinı ñayivi já naçati na naçuun na yuu Pablo. Ta tá sa naçahan na naxihı da já ñuhu na da naçahan na najácana na da yuhú ñuu. <sup>20</sup> Joo na cúu cuéntá Jesús nataca na ta naçava nuu na nu cánduhu Pablo ta já nandacoo da já naquihvi tucu da ñuu cán. Ta inga quıvi itaan já naquee da xihín Bernabé cuahan da ñuu Derbe.

<sup>21</sup> Tá naxınu ço ndıví da cán ñuu Derbe já naçasáhá da cáxi tuhun da nuú ñayivi sahá Jesús ta cuaha ná nandiquehe íchi cuéntá Jesús ñuu cán. Anda jáví nandıcó ço Pablo xihín Bernabé chí ñuu Lıstra xihín ñuu Iconio já naquee da cuahan da chí Antioquía. <sup>22</sup> Ta mé ñuu cán najácahan da na cúu cuéntá Jesús ña ná coo ndacú chága na ta ná a jándacoo na ña cándeé ini na Jesús. Ta naçachi da ña já ndusa ndoho ndivaha ini na janda quiahva ná xinu ço na cacomı Ndióxi cuéntá saha ná. <sup>23</sup> Tá nandihı já nasacu Pablo xihín Bernabé java da sacuaaha ña ná cacomı da cuéntá sahá na cúu cuéntá Jesús in in ñuu cán. Ta tá nandihı naxıjuhun na ta naxıca tahví na nu Ndióxi saha ná já nandiquiahva da na ndáha Ndióxi ña ná candaa mé á na jáchi cándeé ini na mé á.



*Ndícó coo Pablo xihín Bernabé ñuu Antioquía ña ndácaan estado Siria*

<sup>24</sup> Tá nandihí já nayaha Pablo xihín Bernabé chí estado Pisidia janda quiahva naxinu coo na ñundáhyi cuénta Panfilia. <sup>25</sup> Ta nacañan na tuhun vaha saha Jesús nuú ñayivi ñuu Perge. Anda já naquee na cuañan na chí ñuu Atalia. <sup>26</sup> Ta ñuu Atalia cán nandaa na barco já nandicó coo na chí Antioquía nuú naquee na jihna. Jáchí mé cán cúu nuú nandiquiahva na da ndáha Ndióxi ña ná caja da chuun mé á. Ta viti sa najándihí da chuun natahnda nu dá cán. <sup>27</sup> Tá naxinu coo Pablo xihín Bernabé mé ñuu Antioquía cán já najátaca da tóco ndihí na cúu cuénta Jesús nduu ñuu cán já nandicani da tóco ndihí ña nacaja Ndióxi xihín dá. Nandicani da ndá quiahva nasahan Ndióxi ñamaní nuú na coo naquixi chichí Israel ña ná ndiquehe na íchí cuénta mé á. <sup>28</sup> Ta nacandoo nahá Pablo xihín Bernabé ñuu Antioquía cán xihín na cúu cuénta Jesús.

## 15

*Ndítaca na sacuaña cuénta Jesús*

<sup>1</sup> Ta ndaja coo mé tiempo já java dataa, da naquixi chí estado Judea naxinu da ñuu Antioquía cán. Ta nacasáha na jánaña na nuú na cúu cuénta Jesús ña ndítahan nu ná caja na ña cáchí ley Moisés ña ná chicaan na marca yiquí cuñu na já ná cuu jácacu Ndióxi na. <sup>2</sup> Joo Pablo xihín Bernabé nacasáha cáni táhan ndeé yuhu dá xihín na Judea cán saha ña yóho. Ta saha ña nandituhún cuaha ná saha ña yóho saha ña cán quea nasacu ini na cúu

cuéntá Jesús cán chindahá nā Pablo xihín Bernabé xihín java gā da cúú cuéntá Jesús ñā ná cuhun nā ñuu Jerusalén já ná nditúhún chága nā sahá ñā yóho xihín nā apóstol ta xihín nā sacuahā cómi cuéntá sahá nā cúú cuéntá Jesús ndúu Jerusalén cán.

<sup>3</sup> Andá já nā cúú cuéntá Jesús ndúu Antioquía nachindahá nā nā cán chí naquee na cuahan nā. Ta nu xíca na cuahan nā cán nayaha na chí ñundáhyi Fenicia xihín ñundáhyi Samaria. Ta cán nandicani na nuú nā cúú cuéntá Jesús ndá quiahva nandiquehe nā coó naquixi chichi Israel íchi cuéntá Jesús ta já najándacoo na costumbre yatá nasacaja na jihna. Chí nacajii ndivaha ini nā cúú cuéntá Jesús cán tá naxini johó na ñā yóho.

<sup>4</sup> Tá naxinu coo Pablo xihín Bernabé xihín java gā nā cán ñuu Jerusalén já nandiquehe vaha nā cúú cuéntá Jesús ndúu ñuu cán nā. Ta jári nā apóstol xihín nā sacuahá veñuhu cán nandiquehe vaha na nā. Andá já nandicani Pablo nuú nā cán tóco ndihi ñā náhnu nacaja Ndióxi xihín dá. <sup>5</sup> Joo java nā fariseo, nā sa ndiquehe íchi cuéntá Jesús nandaca ndichi na já nacasáhá cáchi nā já:

—Ndítahan nuú nā cúú cuéntá Jesús, nā coó naquixi chichi Israel chicaan nā marca yiquí cuñu nā. Ta ndítahan nu mí cahan í xihín ná ñā ná cacu vaha na ley Moisés —nacachi nā fariseo cán.

<sup>6</sup> Andá já nataka nā apóstol xihín nā sacuahā veñuhu ñā ná nditúhún nā ndaja coo sahá ñā yóho.

<sup>7</sup> Sa nanditúhún cuahá ndivaha nā cán sahá ñā yóho. Andá já nandaca ndichi Pablo tañu nā cán ta já nacachi da já:

—Sa xini vaha ndó, ñani i ñā nacaxi Ndióxi yehe jihna ñā ná caxi tuhún i tuhun vaha sahā Jesús

nuú na coó naquixi chichi Israel já ná candeé ri ini na cán va Jesús ña ná jácacu Ndióxi na. <sup>8</sup> Ta mé Ndióxi, mé a xini ndaja cáa ínimá in in ñayivi, mé a cán queá najánaha nu yo ña ndíquehe vaha mé á na tóho. Jáchi nasahan ínimá yii mé á nu ná tá quiahva nacaja xihin mí, na naquixi chichi Israel. <sup>9</sup> Ni in túhún toho í co cúu yo na vaha chága a juú ga inga na nu Ndióxi. Jáchi tá quiahva nandaja vií Ndióxi mí sahá ña candeé iní Jesucristo quiahva já nandaja vií ri a na cán va sahá ña candeé ini na Jesucristo. <sup>10</sup> Ta viti cúu á tátuhun nandindójó ndó ña nacaja Ndióxi tá nachindahá Jesucristo quivi a sahá cuachí. Ta viti cuni ndó caja ndúsa ndó xihin na tóho yóho ña ná cacu vaha na ley Moisés. Ta sa cándaá ini ndó ña ni mí ta ni tásánu jícó yo a cuú caja í cacu vaha í ley cán. <sup>11</sup> Joo ña candeé cáhnu iní queá ña jácacu maní uun Ndióxi mí sahá ña táhvi ini Jesucristo saha mí. Ta quiahva já táhvi ri ini a sahá na tóho cán va —nacachi Pedro xihin ná.

<sup>12</sup> Ta xihin ña yóho nacatáji yúhu tóco ndihi na cán. Ta táa johó na tá nacasáhá Pablo xihin Bernabé ndícani da nu ná tóco ndihi ña náhnu xihin ña xitúhún ña nasahan Ndióxi ñamani nu dá caja da nuú na coó naquixi chichi Israel cán. <sup>13</sup> Tá nandihí nacahan da cán já nacasáhá Jacobo cáhí da já:

—Cuni johó ndó ná cahan i xihin ndó, ñani i.

<sup>14</sup> Sa nacaxi tuhún Simón, da naní tucu Pedro nu yo tá nu cuítí nacaja Ndióxi ñamani xihin na tóho ta nacaxi a na ña ná nduu na ñayivi cuéntá mé á.

<sup>15</sup> Ta in quiahva cahan ña yóho xihin ña nacahyí na profeta sanahá tá nacahyí na ña nacachi Ndióxi:

<sup>16</sup> Tá sa nayaha tiempo já ndicó coo tucu ú. Ta tá quiahva nacaja cáhnu ñayivi yehe tá tiempo

naṣacomí David cuéntá sahá ñayivi Israel, quiahva já vaxi quivi caja i ña ná caja cáhnu tucu na yehe.

<sup>17</sup> Caja i já jáchi cúni ña ná ndinducú na tóho yehe ña ná cacuu u xitoho tóco ndihi na, mé ná cúu ná naçaxi yehe ná cacuu na cuéntá mí i.

<sup>18</sup> Ña yóho quéa naçachi Ndióxi sanahá ndivaha tá naçaxi tuhun a ndaja coo tiempo viti — naçachi Jacobo xihín na cán.

<sup>19</sup> Já naçachi tucu Jacobo já xihín ná:

—Sahá ña cán quéa cáhan i ña co ndítahan caja ndúsa yó xihín na tóho cacu vaha na ley Moisés jáchi naçasahá ndíco na íchi cuéntá Ndióxi viti.

<sup>20</sup> Joo ña ndítahan caja í quéa cahyí yo in carta ná cuhun a nuú na cúu cuéntá Jesús ndúu ñuu Antioquía já ná caja na ñamani ña ná a cáxi na cuñu quíti, rí najoco ñayivi nuú tiniñu yúú. Ta ná a cóo na xihín na co cúu ñájíhí na á yí ná. Ta coto ná a cáxi na cuñu quíti, rí naçahnú. Ta coto ná a cáxi na nii. <sup>21</sup> Jáchi janda sanahá najánaḥa na ña yóho nuú ñayivi ndijáá ñuu tá quivi ndíquehe ndée ná tá jánaḥa na ley Moisés nu ná ini veñuhu —naçachi Jacobo xihín ná.

<sup>22</sup> Anda já na apóstol xihín na saçuahá veñuhu cán xihín tóco ndihi na cúu cuéntá Jesús najándique táhan na tuhun na ña çaxi na tañu tóco ndihi na cúu cuéntá Jesús cán java da ná cuhun ñuu Antioquía xihín Pablo xihín Bernabé. Ta da naçaxi na cuhun cúu Judas, da naní tucu Barsabás xihín Silas. Ndívi da yóho cúu da ín saḥa nuú na cúu cuéntá Jesús cán. <sup>23</sup> Ta ña yóho cúu tuhun ndáa nu carta ñéhe na cán cuahan na:

“Tóco ndihi ndehe, na cúu apóstol xihín na sacuaḥa veñuhu xihín na cúu cuénta Jesús ndúu ñuu yóho chindahá nde Ndióxi coo ndóhó, na cúu cuénta Jesús, na coo naquixi chichi Israel, na ndúu ñuu Antioquia xihín ñundáhyi cuénta Siria xihín Cilicia jan. <sup>24</sup> Sa nañehé nde tuhun ña naquee java na cúu cuénta Jesús ñuu yóho nasaa na chí jan tá coo naxica na ñamani nuú nde cuhun na. Ta najáquihvi na ndohó ta najájana na jiní ndó xihín tuhun cáhan na jáchi cáchí na xihín ndó ña ndítahan nu ndó chícaan ndó marca yiquí cuñu ndó ta ndítahan cacu vaha ndó ley Moisés já ná cuu cacu ndaa ínimá ndo. <sup>25</sup> Sahá ña cán queá ñúhu johó ndihi nde ña ná caxi nde java ñaní já ná catáhan da xihín Pablo xihín Bernabé saa da coto nihni da ndohó. <sup>26</sup> Mé Pablo xihín Bernabé yóho ndúu tiaḥva da quivi da saḥa Jesucristo, mé a cúu xitoho í. <sup>27</sup> Ta chindahá nde Judas xihín Silas já ná cahan yúhu mé ná xihín ndo já ná ndicani na saḥa tóco ndihi ña yóho nu ndo. <sup>28</sup> Mé ínimá yii Ndióxi najácahan ndehe ña co ndítahan nuú nde caja ndúsa nde xihín ndó cacu vaha ndó tóco ndihi ña sáhdá ley Moisés. Joo ná cahan nde xihín ndo ndía queá co ndítahan caja ndó: <sup>29</sup> Coto a cáxí ndó cuñu quíti, rí najoco na nuú tiniñu yúu. Ta coto a cáxí ndo nii ta a cáxí ndó cuñu quíti, rí nasahnú. Ta coto a cóo ndó xihín ñájíhí á yí inga na. Tá ná cacu vaha ndó tóco ndihi ña yóho já queá cúu ndó na cája vaha. Ña yóho cúu tuhun cáhan nde xihín ndo ta ná coo Ndióxi xihín ndo.” Ña yóho cáchí carta nachindahá na nuú na ñuu Antioquia cán.

<sup>30</sup> Anda já naquee na cán cuahan na ñuu An-

tioquía. Ta tá naxinu na ñuu Antioquía cán já najátaca na tóco ndihi na cúu cuéntá Jesús cán já nandiquiahva na carta nu ná. <sup>31</sup> Ta tá nandihí nācahvi na cúu cuéntá Jesús mé carta já nācajii ndivaha ini na jáchi nandindeé chága ví ini na nācaja ña cáchí carta cán. <sup>32</sup> Mé Judas xihín Silas cúu da profeta, da jáyaha tuhun cáhan Ndióxi nuú ñayivi. Ta xihín ña yóho nasahan da cuahá tuhun ndeé ini na cúu cuéntá Jesús. <sup>33</sup> Nasanduu na cán chá quivi ta chí nasacu ini Judas xihín Silas ndicó coo da ñuu Jerusalén jáchi cán ndúu na nāchindahá ñahá ñuu Antioquía. Já nandindayí na cúu cuéntá Jesús da ña ná coo vaha da tá cūhun da íchi. <sup>34</sup> Joo nasacu ini Silas candoo da ñuu Antioquía cán. <sup>35</sup> Ta nācandoo Pablo xihín Bernabé chága quivi ñuu Antioquía cán ta xihín cuahá java ga na najánaha chága na tuhun vaha saha Jesús nuú ñayivi.

*Cuahan tucu Pablo cahan da tuhun vaha saha Jesús nuú ñayivi*

<sup>36</sup> Tá nayaha quivi já nācachi Pablo já xihín Bernabé:

—Cóho coto nihní na cúu cuéntá Jesús ndúu ndijáá ñuu nuú naxica nuu í nācahan yó tuhun Ndióxi jihna já ná candehé yo á ndíco yii va na Jesús —nācachi da.

<sup>37</sup> Cándúsa Bernabé cūhun da joo cúni da candaca tucu da Juan, da cáhan na Marcos xihín ña cūhun da xihín ná. <sup>38</sup> Joo Pablo nācahan da ña vaha chága ná a cáñehe na da cūhun da xihín ná jáchi najándacoo da na tá naxinu na estado Panfilia sahá ña cóo nāxeen ga da caca nuu da caja da chuun Ndióxi xihín ná. <sup>39</sup> Nānditúhún cuaha ná

sahá ña yóho joo coó nandique táhan tuhun na sahá ña cán queá nashnda táhan na. Sahá ña cán queá ñañehe Bernabé Marcos cuahan xihin dá chí isla Chipre. <sup>40</sup> Ta ñaxaxi Pablo Silas candaca táhan xihin dá. Ta ñaxica tahví ña cúú cuéntá Jesús nu Ndióxi saha dá ña ná chindeé a da nuú cuhun da. Anda já ñaquee da cuahan da. <sup>41</sup> Nayaha da chí ñundáhyi Siria xihin ñundáhyi Cilicia ta níú cúú nuú cuahan da sahan da tuhun ndeé ini ña cúú cuéntá Jesús ña ná candeé chága ini na mé á.

## 16

### *Cátahan Timoteo xica da xihin Pablo xihin Silas*

<sup>1</sup> Ta nayaha Pablo xihin Silas ñuu Derbe anda já ñaxinu coo na ñuu Listra. Ta cán nandinehe ná in da cúú cuéntá Jesús, naní Timoteo, da cúú jahyi in ña cúú cuéntá Jesús, ña ñaquixi chichi Israel. Ta tátá da cúú griego. <sup>2</sup> Ta ña cúú cuéntá Jesús ndúu ñuu Listra xihin ña ndúu ñuu Iconio ñacahan vaha na saha Timoteo. <sup>3</sup> Cúni Pablo ña ná catáhan Timoteo xihin dá caca nuu da xihin dá sahá ña cán queá ñacaja Pablo ña ñachicaan ña marca yiquí cuñu Timoteo tá quiahva cáchí ley Moisés já ná a cahan núu ña Israel ndúu ndijáá ñuu válí cán saha dá. Jáchi sa xini vaha ndihi ña cán ña cúú Timoteo jahyi in ña griego sahá ña cán queá coo ñachicaan ña marca Timoteo tá loho chá da. <sup>4</sup> Ta já ñaquee ndihi na cán cuahan ña ta níú cúú ñuu nu xica na cuahan ña cáxi tuhun na nuú ña cúú cuéntá Jesús ña ná caha na ña ñacachi ña sacuahá xihin ña apóstol ndúu ñuu Jerusalén cán. <sup>5</sup> Xihin ña yóho nandindacú chága ña cúú cuéntá Jesús ta candeé

cáhn̄u chága ini na mé á. Ta in in quiv̄i yáha joh̄o ndícuaḥa chága ñayivi ndíhvi íchi cuéntá Jesús.

*Ña naxini Pablo nacija Ndióxi tá nasah̄iin da ñuu Troas*

<sup>6</sup> Ta nasaji ínim̄a yii Ndióxi na cán ña ná a cúhun na estado Asia caḥan na tuhun vaḥa saḥa Jesús nuú ñayivi cán. Sahá ña cán quéa nayaha na ñundáhyi cuéntá Frigia xihín Galacia cuḥan na. <sup>7</sup> Já naxinu coo na yúhu estado Misia. Ta chí cán yaha na cūhun na ñundáhyi cuéntá Bitinia naḥan na. Joo coó nasahan ínim̄a yii Ndióxi ñaman̄i nu ná caja na ña. <sup>8</sup> Anda já nayaha saa na estado Misia janda quiahva naxinu coo na in ñuu naní Troas. <sup>9</sup> Ta in ñuú nani ín da mé ñuu Troas cán nasani ndímáhnú Pablo. Ta ña naxini da cúu in ta, da naquixi chí estado Macedonia. Ta cándichi da caḥan ndahví da xihin Pablo já cáchi da já: “Naha ndó chí Macedonia yóho ña ná chindeé ndó ndeḥe.” <sup>10</sup> Tá nandicani Pablo ña yóho nuú nde chí ivi laá nacija tiaḥva nde ñaha nde jáchi sa nacandaḥa cáxi ini nde ña mé Ndióxi quéa cána ndeḥe ña ná cūhun nde estado Macedonia cán já ná caxi tuhun nde tuhun vaḥa saḥa Jesús nuú ñayivi ndúu cán.

*Xinu coo Pablo xihín na xica xihin dá ñuu Filipos*

<sup>11</sup> Tá nandihi já nandaa nde barco ñuu Troas já naḥee nde cuḥan ndacu nde isla naní Samotracia. Ta janda quiv̄i itaḥan já naxinu coo nde ñuu Neápolis. <sup>12</sup> Ta cán nanuu nde mé barco cuḥan sahá nde chí ñuu Filipos. Mé ñuu Filipos cán cúu á ñuu ña ín chága saḥa nuú java ga ñuu válí ñúhu chí Macedonia cán. Ta ndíco a ñuu Roma. Ta



naṣanduu nde ñuu Filipos cán chá quiv̄i. <sup>13</sup> Ta in quiv̄i ndiquehe ndée ná já naṣanee nde cuaḥan nde yuhú ñuu yati yuhú yuta nu sá taca ñayivi xica taḥví na nu Ndióxi. Já naṣaṣoo nde cán ta naṣasáhá nde cáḥan nde tuhun vaḥa saḥa Jesús nuú najihí, na táca cán. <sup>14</sup> In mé ñáñáḥa cán nani ña Lidia ta cúú ñá ñá ñuu Tiatira. Mé Lidia yóho cúú ñá ñá jíco jáhma vaḥa ña color ndihí. Ta cúú ñá in ñá cája cáhnu Ndióxi. Ta nani xini johó ñá ña cáḥan Pablo saḥa Jesús já naṣuná Ndióxi xini túni ña já naṣandúsa ñá ña cáḥan Pablo cán. <sup>15</sup> Tá nandihí naṣandúta ña xihín na vehe ñá ta já cáchí ña já xihín nde:

—Tá ta mé a ndaa ndícuni ndó yeḥe ña cúú u cuénta Jesús caja ndó ñamaní saa ndó vehe e coo ndó —naṣachi ñá xihín nde.

Ta naṣaja ndúsa ñá xihín nde chí naṣandoo too nde vehe ñá cán.

<sup>16</sup> Ta ndaja coo in tañu tá cuaḥan nde nu sá xica taḥví nde nu Ndióxi já nanditahan nde in ñá tacú, ñá ndácaan ínima quini ini. Ta cája ña cán ña ná ndicuni ini ñá. Mé ñá tacú yóho cúú ñá naxeen na. Ta mé xitoho ñá cán táva cuaḥa dá jiuḥún saḥa ña ndícuni ini ñá. <sup>17</sup> Ta mé ñá tacú yóho naṣasáhá ña ndíco ñá jata Pablo xihín jata nde ta cáyuhú cóho ña já cáchí ña já:

—Da cája cáhnu Ndióxi, ña cáhnu íin indiví cúú da cáḥan yóho. Ta xica da cáxi tuhun da xihín ndó ndá quiaḥva cuu caṣu ndaa ínima ndo —cáchí ña cáyuhú ña.

<sup>18</sup> Já cuití já cuití cája ñá cuaḥa quiv̄i janda quiaḥva co ndée ga ini Pablo xihín ña cája ñá. Chí

nandicotó nihni Pablo nu ñá já nacachi da já xihin ínimá quini ndácaan ini ñá cán:

—Xihín quivi Jesucristo sáhdá i chuun nuun ña ná queún ini ñá loho yóho —cáchi Pablo.

Chí ivi laá naqueta ínimá quini cán cuahan.

<sup>19</sup> Joo tá naxini na cúu xitoho ñá cán ña a cóo ga cana jiuhún na caja ñá cán já natiin na Pablo xihin Silas já ñéhe na da nasahan na vechúun nuú na jutixia. <sup>20</sup> Tá naxinu coo na cán já nacachi na já xihín da cúu juéxe cán:

—Da naquixi chichi Israel yóho nandai cuu da jándinihi da ñayivi ñuu í. <sup>21</sup> Jáchi jánaħa da costumbre mé va da nuú ñayivi. Ta mí a cuú candúsa í ta ni a cúu caja í costumbre da yóho jáchi cúu yó ñayivi ndíco ñuu Roma —nacachi na cán xihin juéxe.

<sup>22</sup> Anda já nandicuita ñayivi xihin dá. Já nasahnda juéxe cán chuun ña ná tavá na jáhma Pablo xihin Silas ta ná cani na ndívi da xihin yíto.

<sup>23</sup> Tá nandihi nacani quini ndivaha na da já nataán na da vecaa. Ta nasahnda na chuun nuú da ndáá vecaa cán ña ná candaa vaha da da. <sup>24</sup> Tá natahnda chuun yóho nuú da ndáá vecaa cán já nachicaan da Pablo xihin Silas janda sa véhe cuí vecaa cán. Ta já nachicaan da saħa dá tañu ivi yíto naní cepo já ná ndituun vaha da.

<sup>25</sup> Joo tátuhun java ñuu xíca tahví Pablo xihin Silas nu Ndióxi ta xíta da ña cája cáhnu da mé á nani táa johó java ga na ñúhu ini vecaa cán nu cáhan da. <sup>26</sup> In jonáa cuití nacasáhá táan ndeé ndivaha chí janda yuu ndúhu saħa vecaa cán cánda. Anda já nanuna tóco ndihi yéhe caa cán ta nacuyu cadena nasandico tóco ndihi na nasañuhu vecaa cán.

<sup>27</sup> Anda já nandicaxí ini da ndáá vecaa cán ta tá

na\_xini da nú\_ná yé\_hé ca\_a cán ja natuhun da yuchú cán\_i dá ñ\_a cahní da mé dá já\_chi na\_çahán da sa na\_çuee ndihi na na\_ñañuhu vec\_aa cán cuaha\_n na. <sup>28</sup> Joo na\_çayuhú Pablo nu dá ja na\_çachi Pablo ja xih\_in dá:

—A cáhní tohún yohó já\_chi yóho ndúu ndihi va nde.

<sup>29</sup> And\_a ja na\_xi\_ç\_a da ndáá vec\_aa cán in lámpara ja xínu da na\_ndi\_hvi da nu ndúu na vec\_aa. Ta chí quí\_ji mé dá xih\_in ñ\_a yí\_hvi da ja na\_çaxítí da nu Pablo xih\_in nu Silas. <sup>30</sup> Tá na\_ndihi ja na\_tavá da na ja na\_çasáhá ndá\_ç\_a tu\_hún da na ja na\_çachi da ja:

—Ndí\_a ndítahan caja i ja ná já\_çacu ndaa Ndió\_xi ínim\_a i —na\_çachi da.

<sup>31</sup> And\_a ja na\_nducú ñ\_ehe Pablo xih\_in Silas tu\_hun nu dá ja cá\_chi da ja xih\_in dá:

—Ndítahan candúsún Jesucristo, xitoho í ja ná çacu ndaa ínimun xih\_in ínim\_a tó\_có ndihi na vehún —na\_çachi da.

<sup>32</sup> And\_a ja na\_çasáhá Pablo ndí\_cani da tu\_hun va\_ha sa\_ha Jesús nuú da cán xih\_in nu tó\_có ndihi na ndúu vehe da cán. <sup>33</sup> Ta mé hora ja na\_çaja tátá da ndáá vec\_aa cán nuú na\_ndicue\_h\_e ja\_t\_a Pablo xih\_in ja\_t\_a Silas nuú na\_cani yí\_t\_o cán. Ta tá na\_ndihi ja na\_candú\_t\_a da ndáá vec\_aa cán xih\_in tó\_có ndihi na vehe da. <sup>34</sup> Tá na\_ndihi ja ndá\_ç\_a da Pablo xih\_in Silas na\_saha\_n da xih\_in dá vehe da. Ta cán na\_çaja ndí\_vi na ñ\_a cuxu Pablo xih\_in Silas. Ta chí na\_çajii ndi\_vaha ini da ndáá vec\_aa cán xih\_in na vehe da já\_chi sa na\_ndiquehe na í\_chi cuéntá Jesús.

<sup>35</sup> Ta naha inga quí\_vi ita\_an ja na\_chindahá na cúu jué\_xe cán policia nuú da ndáá vec\_aa cán ñ\_a ná janí

da Pablo xihin Silas vecaa. <sup>36</sup> Anda já nacachi da ndáá vecaa cán já xihin Pablo:

—Nasahnda na cúú juéxe chuun nuú i ña ná janí i ndohó cuhun ndo. Sahá ña cán quea cáxi tuhun i xihin ndó cuáhán quee ndó ta ná cuhun Ndióxi xihin ndo —nacachi da xihin dá.

<sup>37</sup> Joo nacahan Pablo xihin da cúú policia cán já nacachi da já xihin ná:

—A váha toho nacaja na xihin nde jáchi cúú nde na romano ta na jutixia jan nacani quini na ndehe nu táhyí tóco ndihi ñayivi tá camaní caja vií na sahá nde. Ta tá nandihí já nataán jín ga na ndehe vecaa. Ta viti cúni na janí jehé na ndehe quee nde cuhun nde. Joo a váha toho cája na já. Sahá ña cán quea a queta nde janda quiahva ná quixi mé ná tavá na ndehe já quee nde —nacachi Pablo xihin da cúú policia cán.

<sup>38</sup> Anda já nasahan na cúú policia nandicani na nuú na cúú juéxe ña nacachi Pablo xihin ná. Tá nacandaa ini na cúú juéxe cán ña cúú Pablo xihin Silas da romano chí nayihví na. <sup>39</sup> Anda já nasahan na naxica na ñamaní nu Pablo xihin nu Silas ña ná caja cáhnu ini da sahá ña nacaja na. Já natavá na da vecaa ta tá nandihí já naxica na ñamaní nu dá ña ná quee da ñuu cán cuhun da. <sup>40</sup> Tá naquee Pablo xihin Silas vecaa já nasahan na vehe ña naní Lidia. Ta tá nandihí nandique táhan da xihin na cúú cuéntá Jesús ndúu cán já nasahan da tuhun ndéé ini na anda já naquee da cuahan da.

## 17

*Ndinihi ñayivi ñuu Tesalónica*

<sup>1</sup> Nani xíca Pablo xihín Silas cuahan da íchi nayaha da chí ñuu naní Anfípolis xihín inga ñuu naní Apolonia anda quiahva naxinu coo na ñuu Tesalónica. Cán nasahin veñuhu nu táca na Israel. <sup>2</sup> Ta sahá ña naçaan Pablo sahan da veñuhu quivi ndíquehe ndée ná sahá ña cán quéa naquihvi da veñuhu cán. Ta tixi uní semana naçahan da tuhun Ndióxi xihín ná mé quivi ndíquehe ndée ná. <sup>3</sup> Ta nu libro yii Ndióxi tává Pablo tuhun ndícani da nu ná ña nditahan nuú Jesucristo ndoho ini a. Ta tá sa nandihí naxihí a já nditacu a jáchi já cáchi libro yii Ndióxi coo. Já naçachi Pablo já xihín ná:

—Mé Jesús, mé a cahan i saha nu ndo yóho, mé a yóho cúu Cristo, ña naçindahá Ndióxi cacomí cuénta sahá ñayivi —naçachi Pablo.

<sup>4</sup> Ta chí naçandúsa java na Israel ña naçachi Pablo xihín ná. Anda já naçatáhan na xihín Pablo xihín Silas xíca nuu na. Ta cuahá ri na griego, na sa cája cáhnu Ndióxi ndúu cán naçandúsa na ña naçachi Pablo xihín ná. Ta naçandúsa ri cuahá najihí, na ín toní ñúhú ñayivi xihín ta nandihvi na íchi cuénta Jesús. <sup>5</sup> Joo na Israel, na co cándúsa Jesús naçasáhá cáhivvi ini na. Sahá ña cán quéa najátaca na java taq quini, da coó chuun nu xíca nuu mé cáyé cán. Já naçasáhá na jándinihi na ñayivi mé ñuu Tesalónica cán. Anda já cáti na nasahan na vehe in da naní Jasón. Ta xihín ña ndúsa naquihvi na vehe da cán ña ndínducú na Pablo xihín Silas ña tavá na da ndíquiavha na da nuú na sacuahá ñuu cán. <sup>6</sup> Joo coó nandínehe ná Pablo xihín Silas cán sahá ña cán quéa janda mé Jasón, da xihín ñaha vehe cán ñúhu na da xihín java ga na cúu cuénta Jesús cuahan na nuú na jutixia ñuu cán. Tá nandihí já cáyuhú na já

cáchí nā já xihín nā jutixia cán:

—Da naní Pablo xihín da naní Silas xíca nuu da níí cúú ñuyíví jájana da jiní ñayivi. Ta quiahva já cúni da caja da xihín ñayivi ñuu í. <sup>7</sup> Ta da naní Jasón yóho nandiquehe vaha da da cán vehe da. Ta xihín ña cája nā yóho náha ña co cája na ña sáhdá ley ñuu Roma ta ni co cája cáhnu na da cómi cuéntá sahá ñuu Roma. Jáchi mé nā yóho xíca na cáhan nā ña ín inga da cómi cuéntá sahá ñayivi. Ta cáchí nā cúú dá in da naní Jesús —nācachi na.

<sup>8</sup> Tá naxini johó ñayivi xihín nā jutixia cán ña yóho chí nācasáhá nā ndívaā nā. <sup>9</sup> Joo nāchahvi Jasón xihín java nā cúú cuéntá Jesús cán jiuhún nuú nā jutixia cán já najaní ñahá nā.

### *Cuahān Pablo xihín Silas ñuu Berea*

<sup>10</sup> Ta tá sa nācuaá mé ñuú já nāchindahá nā cúú cuéntá Jesús cán Pablo xihín Silas já ná cuhun da chí ñuu Berea. Ta tá naxinu coo da ñuu Berea cán já nandihvi da veñuhu nā Israel cán. <sup>11</sup> Ta nāsuná chága nā Israel cán ínima ná a juú ga nā ndúu ñuu Tesalónica chí cáji iní nā nandiquehe na tuhun Ndióxi. Ta ndijáá ní quivi ndínducú nā nuú tuhun Ndióxi ña á mé a ndaa cúú ña jánaḥa Pablo nu ná. <sup>12</sup> Ta cuahā táhan nā nāquixi chichi Israel cán nandiquehe na íchi cuéntá Jesús. Ta cuahá najihí griego, nā tácu ini nación cán xihín cuahá nātaa griego nandiquehe na íchi cuéntá Jesús. <sup>13</sup> Joo tá nāñehé nā Israel ñuu Tesalónica tuhun ña ín Pablo ñuu Berea cáhan da tuhun Ndióxi nuú ñayivi chí ivi laá nāsaḥan nā jándinihi na ñayivi ñuu Berea cán já ná ndicuiṭa na xihín Pablo. <sup>14</sup> Joo ivi laá nā cúú cuéntá Jesús cán nāchindahá nā Pablo cuahān

da yati yuhú tañuhú nani naçandoo Silas xihin Timoteo ñuu Berea cán. <sup>15</sup> Ta java na cúu cuéntá Jesús ndáca na Pablo ta nañañe na da janda ñuu Atenas. Ta tá nandicó coo na cán ñuu Berea já ñehe na chuun ña ná cuhun quíj Silas xihin Timoteo ñuu Atenas ná ndique táhan da xihin Pablo.

### *Íin Pablo ñuu Atenas*

<sup>16</sup> Nani ndáti Pablo xinu coo Silas xihin Timoteo ñuu Atenas cán já naçasáhá ndíhi ini da jáchi níi cúu ñuu cán naçhutú ndaa xihín cuahá tiniñu yúu ndícahán ñayivi ñuu cán. <sup>17</sup> Sahá ña cán quea naçasáhá Pablo cáhan da tuhun Ndióxi xihín na Israel ini veñuhu na. Ta quiahva já naçahan ri da tuhun Ndióxi xihín java na tóho, na cája cáhnu Ndióxi cán. Ta jári ndijáá níi quivi cáhan da tuhun Ndióxi xihín ñayivi táca nuú yahvi ñuu cán. <sup>18</sup> Ta java ta, da jácuaha íchi cuéntá Epicureos xihín da jácuaha íchi cuéntá Estoicos naçasáhá ndítuhún na xihin Pablo. Joo java na cán cáchi na saha Pablo ña cuahá ndivaha cáhan da ta co cándaa ini na ndá quea cáhan da. Ta java na cáchi na já saha dá:

—Á tá coó ta java ga ndióxi xíca nuu da cáhan da saha —cáchi na.

Naçachi na ña yóho saha Pablo jáchi naxica nuu mé dá cáhan da tuhun vaha saha Jesús ta cáhan da ña nanditacu tucu Jesús. <sup>19</sup> Sahá ña cán quea ndáca na Pablo cuahan ná in nuú nani Areópago jáchi cán cúu nu ndítaca ñayivi ndítuhún na. Ta tá naxinu coo Pablo cán já naçasáhá ndáca tuhún na da já cáchi na já xihin dá:

—Á cajún ñamaní caxi tuhún xihín nde ndá cúu ña saá ña xícún jánahún nuú ñayivi. <sup>20</sup> Jáchi

sa ñañehé nde tuhun ña cátóntó ñayivi xihín ña jánahún nu ná ta viti cúni nde candaa ini nde ndía quea jánahún nu ná —ñacachi na xihín Pablo.

<sup>21</sup> Ñacachi na já xihín Pablo jáchi tóco ndihi ñayivi Atenas xihín na tóho ndúu cán ndijáá níi quivi ndinuhu ini na ndítúhún na ñaha saá, ña ñaxini johó na jánahá inga na.

<sup>22</sup> Anda já ñacandichi Pablo tañu na ndúu mé nuú naní Areópago cán já ñacachi da já xihín ná:

—Candehé ndó, ñayivi ñuu Atenas. Cándaa cáxi ini i ña cúu ndó ñayivi cátóo ndicahán cuahá nuú tiniñu yúu, ña cúu ndióxi ndo ta ndicahán ndó ña xihín ndinuhu ini ndó. <sup>23</sup> Jáchi tá xíca nuu i ñuu ndó já ñaxini i cuahá nunáa nu cája cáhnu ndó ña. Ta nu xíca nuu i cán ñaxini i inga nunáa. Ta nunáa cán ndaa in tuhun ta cáchi a: “Naa yóho cúu nu ndicahán nde ndióxi co xini nde”, já ñaxini i cáchi a. Ta vatí co xini ndó Ndióxi ndicahán ndo cán joo cája cáhnu ndó ña. Ta mé Ndióxi cán quea cúni cahan i saha nu ndó viti.

<sup>24</sup> Mé Ndióxi cán quea ñacavaha ñuyívi xihín tóco ndihi ñaha ín ñuyívi yóho. Ta mé á cómi a cuénta sahá indivi xihín ñuyívi. Ta co ndacaan toho mé á ini veñuhu ña ñacavaha ndahá ñayivi.

<sup>25</sup> Ta ni co xini ñuhú a chindee ñayivi mé á jáchi sa mé á quea cája ña ná catacu mí. Mé Ndióxi quea sahan tachí yó nu yo ta mé á sahan tóco ndihi ñaha nu yo.

<sup>26</sup> Mé Ndióxi cán ñacavaha in ta nu cuítí. Ta tóco ndihi ñayivi ndúu ñuyívi ñaquixi na chichi mé ta, da ñacavaha Ndióxi cán. Tá ñandihí já ñajándicuita nuu Ndióxi ñayivi ñaquixi chichi da cán níi cúu ñuyívi já ñatahnda in in nación canduu



a. Ta sa nasacu ini Ndióxi ndaja tiempo canduu in in nación ñuyíví yóho ta nasacu ini mé á ndáchí coo in in nación. <sup>27</sup> Já naja Ndióxi jáchi cúni a ña ná ndinducú ñayivi mé á ta já ná ndiñehe ná íchi cuéntá mé á. Joo mé a ndaa yati va ín Ndióxi nu tóco ndihi ñayivi. <sup>28</sup> Jáchi mé á cája ña ná catacú ta ná canda yiquí cuñu í. Sanahá nacachi java ta cuéntá mé ndó já: “Cúú yó na vehe Ndióxi.” <sup>29</sup> Joo tá mé a ndaa cúú yó na vehe Ndióxi co ndítahan cahán yo ña Ndióxi cúú tiniñu yúú ña najándicuchu na xihín jiuñun cuáán á xihín jiuñun cúxú. Ta ni co ndítahan cahán yo ña Ndióxi cúú tiniñu yúú cávaha ndahá ñayivi xihín yuu. Jáchi jiní mé va na jan cána ña cávaha na. <sup>30</sup> Jihna nasacu ini Ndióxi ña a jándoho toho a ini ñayivi sahá cuachi nasacaja na jáchi co cándaa ini na ña cúni mé á, nduu. Joo viti sáhdá Ndióxi chuun nu tóco ndihi ñayivi ña ná ndicó coo ini na ta ná a cája cáhnu ga na tiniñu yúú. <sup>31</sup> Jáchi sa nasacu Ndióxi in quiví caja vií a saha tóco ndihi ñayivi ndúu ñuyíví yóho. Ta sa naxaxi mé á Jesús ña caja vií ndaa mé á saha ná. Ta najánditacu tucu Ndióxi Jesús tá nandihí naxihí a. Ta xihín ña yóho nanaha nuú ñayivi ña mé a ndaa caja vií Jesús saha ná —nacachi Pablo xihín ndihi na cán.

<sup>32</sup> Tá naxini johó na cán ña cáchí Pablo ña vaxi quiví nditacu ndji já nacasáhá java na cán sácu ndaa na da. Joo java na cáchí na já xihín dá:

—Vaha chága ná cahún sahá ña jan nuú nde inga tañu —cáchí na xihín dá.

<sup>33</sup> Anda já naquee Pablo nu Areópago cán cuahan da. <sup>34</sup> Joo java ñayivi, na nacandúsa ña

cáchí dā nacasáhá ndíco nā dā xíca na. Tañu nā cán nasandacaan in dā naní Dionisio, dā cúú táhan nā ndítaca Areópago cán. Ta tañu nā nacandúsa cán ndácaan ri in ñáñáha naní Dámaris. Ta jári java chága nā cándúsa nandihvi na íchi cuéntá Jesús.

## 18

### *Xínu coo Pablo ñuu Corinto*

<sup>1</sup> Tá nandihí já naquee Pablo ñuu Atenas cán já cuahan dā chí ñuu Corinto. <sup>2</sup> Ta mé cán nandique táhan da xihín in dā Israel naní Aquila, dā nasacuu estado Ponto. Ta jacá cúu saá va naxinu coo Aquila ñuu Corinto cán xihin ñájíhí dā, ñá naní Priscila. Ta ndíví nā yóho sá naquee na ñuu Roma ndácaan nación Italia jáchi Claudio, dā cómí cuéntá sahá nā ñuu Roma cán nasahnda dā chuun ñā ná quee ndihí nā Israel cuhun nā. Ñā cán queā naxinu Aquila xihin ñájíhí dā ñuu Corinto cán. Andā já nasahan Pablo naxito nihni da nā nu ndúu nā cán. <sup>3</sup> Ta nacandoo Pablo vehe nā cán cája chúun da xihin ná jáchi sá mé chuun ñā cája nā cán tiahva ri dā cán va. Ta chuun nasacaja na queā cávaha na vehe lona, ñā ndeé. <sup>4</sup> Ta tá xínu coo quivi ndíquehe ndéé ná já sahan dā veñuhu nā Israel cahan dā tuhun Ndióxi xihin ná. Ta já najaxinu dā ini nā Israel xihin nā tóho já nacasáhá nā cándúsa na Jesús.

<sup>5</sup> Ta ndaja coo najándacoo Silas xihin Timoteo estado Macedonia ta naxinu coo na ñuu Corinto cán. Andā jáví najándacoo Pablo chuun cája dā cán já nacasáhá dā ndúcú ndéé chága dā cahan dā tuhun Ndióxi nuú ñayivi. Ta cáxí táhyí cahan dā

xihín na naquixi chichi Israel ña mé Jesús cúú á ña ndáti na chindahá Ndióxi quixi. <sup>6</sup> Joo na naquixi chichi Israel cán coó nandiquehe na tuhun cáhan Pablo ta nacasáhá canahá na xihín dá ta cáhan núu na saha Jesús. Anda já naquiji nihni Pablo jáhma dá já ná candaá ini na ña co ndójo ga da cuachi sahá na Israel cán ta já nacachi da já xihín ná:

—Tá ná cuhun ndó indayá ta cómi mé va ndó cuachi sahá. Joo yehe co ndójo ga i cuachi saha ndo jáchi sa nacañan i tuhun Ndióxi xihín ndo ta co cúni ndó cándúsa ndó ña. Viti xihín chí nuu cuhun i cañan i tuhun vaha saha Jesús nuú na coó naquixi chichi Israel —nacachi Pablo xihín ná.

<sup>7</sup> Já naqueta da veñuhu na cán cuañan da. Já nasaa da vehe in da naní Justo, da cája cáhnu Ndióxi. Ta yati jín veñuhu cán íin vehe da. <sup>8</sup> Ta in da naní Crispo, da sáhdá chuun veñuhu cán nacandúsa da Jesús, xitoho í xihín tóco ndihi na vehe da. Ta cuaha táhan mé na ñuu Corinto cán nandiquehe na íchi cuéntá Jesús ta nacandúta ná tá naxini johó na tuhun Ndióxi nacañan Pablo xihín ná. <sup>9</sup> Ta ndaja coo in ñuu naquixi tátuhun in sani nu Pablo ta xihín ña cán nacañan Ndióxi xihín dá já nacachi a já:

—A yíhvún cahún sahá i nuú ñayivi ta coto a catáji yuhun cañan chágun xihín ná saha i. <sup>10</sup> Jáchi íin vi xuhun ta ni in na a cúu tiin yohó ña ná caja xíxi na xuhun. Jáchi sa ndúu cuahá ndivaha ñayivi ñuu yóho, na cacuu cuéntá mí i —nacachi Ndióxi xihín dá.

<sup>11</sup> Sahá ña cán queá nasahjin tóo Pablo in cuia java ñuu Corinto cán ta najánañaha da tuhun Ndióxi nuú ñayivi cán.

<sup>12</sup> Joo mé tiempo cán naçasáhá cómi in da naní Galión cuéntá sahá ñayivi estado Acaya nu ndácaan ñuu Corinto cán. Já nandique táhan ndihi na Israel ña cúni na caja xíxi na xihín Pablo chí nañiin na da já ñéhe na da cuahan da vechúun. <sup>13</sup> Ta mé cán naçasáhá cáchi na já xihín da cúu gobernador cán:

—Da naní Pablo yóho xíca da jácahan da ñayivi ña ndítahan nu ná caja cáhnu na Ndióxi ta co sáhdá ley yo cája í já —cáchi na cán xihín gobernador.

<sup>14</sup> Anda já ndúcú Pablo candichi da cahan da joo mé Galión cán naçasáhá cáchi da já xihín na Israel cán:

—Tá cuachi ndeé ná caja da yóho já quéa cuu cuni johó i nu cáhan ndo ná ndaja ndichi i saha dá, nduu. <sup>15</sup> Joo co cúni toho i caja vií sahá ña jan jáchi cúu á sahá tuhun cáhan ndo xihín sahá quivi ñayivi Israel xihín saha ley mé va ndó ña cán quéa vaha chága ná caja vií mé va ndó sahá ña yóho —naçachi da cúu gobernador cán xihín ná.

<sup>16</sup> Tá nandihí já naçavá da na Israel vechúun cán. <sup>17</sup> Anda já nañiin tóco ndihí na griego cán da naní Sóstenes, da sáhdá chuun veñuhu cán. Ta nañiin na da mé nu táhyí mé da cúu gobernador cán naçani na da. Joo coó naçahní toho Galión mé dá sahá ña naçaja na.

### *Ndícó coo tucu Pablo chí Antioquía*

<sup>18</sup> Cuahá va quivi naçandoo too chága Pablo ñuu Corinto cán. Anda já nandindayí da na cúu cuéntá Jesús ndúu cán já naçuee da cuahan da ñundáhyi cuéntá Siria. Ta ndáca da Aquila xihín Priscila cuahan na xihín dá. Ta tá naxinu da ñuu Cencrea

tá cámanj ndaa da barco cuhun chága da chí nuu já najatá lahla da jini dá já ná xinu coo nuú tūhun naçahan da. <sup>19</sup> Ta tá naxinu coo da ñuu Efeso xihín na ndáca táhan xihín dá cán já najándacoo da Priscila xihín Aquila. Ta naquee da cuahan da chí veñuhu ñuu Efeso cán nuú naçahan da tūhun Ndióxi nuú na Israel, na táca cán. <sup>20</sup> Tá nandihí já naçasáhá cáhan ndahví na Israel cán xihín Pablo ña ná candoo too da chága quiví xihín ná. Joo coo naxeen toho da. <sup>21</sup> Ña naçaja da quéa nandindayí da na já naçachi da já xihín ná:

—Ndítahan cuhun i coo i Jerusalén jáchi sa nandindaa quiví vaxi víco. Joo ndicó coo tucu u coto nihni i ndohó tá cúní Ndióxi —naçachi Pablo xihín ná.

Tá nandihí já nandaa da barco naquee da ñuu Efeso. <sup>22</sup> Ta tá naxinu coo da ñuu Cesarea já naquee da cuahan da chí ñuu Jerusalén çahan Ndióxi da xihín na cúu cuéntá Jesús ndúu cán. Tá nandihí já naquee da cuahan da chí inga ñuu naní Antioquía. <sup>23</sup> Ta tá nandihí nasahiin da chá quiví cán já naquee tucu da cuahan da tá in tá in ñuu válí ñúhu chí estado Galacia xihín estado Frigia ña quiahva da tūhun ndeé ini na cúu cuéntá Jesús ndúu cán.

### *Cáhan Apolos tūhun Ndióxi nuú na ñuu Efeso*

<sup>24</sup> Mé tañu já naxinu coo in da naquixi chichi Israel naní Apolos mé ñuu Efeso cán. Mé Apolos yóho cúu dá da naçacu ñuu Alejandría. Ta cúu dá in da tiahva vaha tūhun Ndióxi ta tiahva vaha da jánaħa da ña nuú ñayivi. <sup>25</sup> Mé Apolos yóho sa najácuaha vaha da íchi cuéntá Jesús, xitoho í

ta xihín ndinuhu ini da cáhan da saha mé á nuú ñayivi. Ta cáxí táhyí jánaḥa da saha Jesús nu ná. Ta naçahan da xihín ná ña ndítahan candúta ñayivi tá quiahva najácandúta Juan ñayivi jihna. Joo co xíní vaha da tóco ndihi ña najánaḥa Jesús. <sup>26</sup> Chí já naquihvi mé Apolos veñuhu cán çahan da tuhun Ndióxi xihín ñayivi jáchi co yíhvi da çahan da xihín ná. Ta ndaja coo naḥini joho Priscila xihín Aquila nu cáhan da. Ta tá nandihí já ñéhe na da cuahan na já nandicani vaha chága na nu dá ndaja íin íchi cuéntá Ndióxi. <sup>27</sup> Ta tá naçacu ini Apolos çuhun da chí estado Acaya já naçindeé na cúu cuéntá Jesús da já ná cuu çuhun vaha da. Ta naçahí na in carta naçahan na nu dá ná quiahva da ña nuú na cúu cuéntá Jesús ndúu cán já quea ná ndiquehe vaha na da. Ta tá naḥinu coo Apolos yóho estado Acaya cán naçindeé cuahá ndivaha da na cúu cuéntá Jesús, na naçandeé ini mé á sahá ña naḥavi ini Ndióxi saha ná. <sup>28</sup> Ta nu cáxí táhyí ndihi ñayivi nanaha da ña a juú ña ndaa cúu ña jánaḥa na Israel nuú ñayivi. Ta xihín tuhun Ndióxi nanaha da nu ná ña mé Jesús cúu Cristo, mé a naçindahá Ndióxi cacomí cuéntá sahá ñayivi.

## 19

### *Tá íin Pablo ñuu Efeso*

<sup>1</sup> Ta nani íin Apolos ñuu Corinto cán já nayaha Pablo chí yúcu janda quiahva naḥinu coo da ñuu Efeso. Ta cán nandíñeḥe dá java na cúu cuéntá Jesús. <sup>2</sup> Já nandaca tuhún da na já naçachi da já xihín ná:

—Á nandicutú ndaa ínimā ndo xihin ínimā yii Ndióxi tá ñacandúsa ndó Jesús —ñacachi da xihin ná.

Já nanducú ñehe ña cán tuhun nu dá já cáchí ña já xihin dá:

—Chí a ñáha mé va candaa ini nde saha ínimā yii Ndióxi jan —ñacachi ña cán xihin Pablo.

<sup>3</sup> Andá já ñandaça tuhún Pablo ña já cáchí ña já xihin ná:

—Ndaja vaha ñacandúta ndo, dá já.

Andá já nanducú ñehe ña cán tuhun nu dá já ñacachi na já:

—Ñacandúta nde tá quiahva najánaña Juan —ñacachi na.

<sup>4</sup> Andá já ñacachi tucu Pablo já xihin ná:

—Najácandúta Juan ñayivi já ná ñaha ña nuú ñayivi ña nandijama na ta co cája ga ña cuachi ñasacaja na jihna. Joo ñacahan Juan xihin ná ña ndítahan nu ná candúsa na inga ña vaxi jata dá. Ta ña ñacahan Juan cán saha cúu Jesús, mé a ñachindahá Ndióxi cacomí cuéntá saha ñayivi —ñacachi Pablo xihin ná.

<sup>5</sup> Tá ñaxini joho ña cán ña ñacachi Pablo xihin ná chí ivi laá ñacandúta ná cuéntá Jesús, mé a cúu xitoho í. <sup>6</sup> Ta tá ñachojó Pablo ndáha dá jini ná já ñaxinu ínimā yii Ndióxi najándicutú a ini na. Andá já ñacasáhá ña ndícahan ña inga tuhun ña coó ñasatiahva na. Ta jáyaha na tuhun ñacahan Ndióxi nuú ña ndúu cán. <sup>7</sup> Ta tixi ndihi ña cán cúu ná tátuhun uxu ivi ña.

<sup>8</sup> Ta tixi uní yoo ñasahjin Pablo ñuu cán sahan ña veñuhu jánaña ña saha Jesús nuú ñayivi xihin ndinuhu ini da. Ta jáxinu ña ini ñayivi ña ná

ndihvi na íchi cuéntá Jesús já cuu cacomí mé á cuéntá saha ná. <sup>9</sup> Joo java na cán sáá ini na ta coó naxeen na candúsa na nu cáhan da. Ña nacaja na quéa nacasáhá cáhan núu na sahá tuhun vaha cáhan saha Jesús nuú ñayivi. Saha ña cán quéa natavá xóo Pablo na cúu cuéntá Jesús tañu na cán já nasahan ndaca da na in vehe escuela nu in in da naní Tiranno ta cán jánaha Pablo tuhun Ndióxi nu ná ndijáá ní quivi. <sup>10</sup> Já nasacaja Pablo tixi ivi cuia ta xihín ña cja da naxini johó ndihi na ndúu estado Asia tuhun vaha saha Jesús, xitoho í. Ta na naxini johó tuhun Ndióxi cán cúu ná na naquixi chichi Israel xihín na tóho viti. <sup>11</sup> Ta nacaja Ndióxi ña ná cuu caja Pablo cuahá ña xitúhún nuú ñayivi ndúu cán. <sup>12</sup> Jáchi janda pañito á jáhma ña cáni ndaa Pablo cán ñéhe na ña cuahan na ta jácani ndaa na ña na quíhvi xihin á chí ndíva ha na. Ta tá ñúhu ínimá quini ini na janda rí cán quéta cuahan.

<sup>13</sup> Joo java na Israel, na co cúu cuéntá Jesús xica nuu na tává na ínimá quini ñúhu ini ñayivi. Ta ndaja coo nasacu ini na caja chúun na quivi Jesús, xitoho í, ña ná tavá na ínimá quini. Já nacachi na cán já xihín ínimá quini ndácaan ini ñayivi:

—Xihín quivi Jesús ña xica nuu Pablo cáhan da saha, sáhdá nde chuun nuun ña ná queún cūhun —nacachi na cán.

<sup>14</sup> Já nacaja ndíhusa jahyi in da naní Esceva, da cúu da sacuahá nuú jutú veñuhu na Israel ndúu ñuu cán. <sup>15</sup> Joo tá nacachi na ña yóho xihin rí quini ñúhu ini in dāta ja nanducú ñehe rí cán tuhun nu ná já cáhí rí já:

—Xini vi yo cúu Jesús ta xini ri ndá da cúu Pablo



va. Joo mé ndó, co xini toho i ndohó —nacachi rí quini.

<sup>16</sup> Tá nacachi ínima quini cán já chí ivi laá nandava dataa ndácaan ínima quini ini cán jata ndíhusa na cán ta nacaja xixi quini da xihin ná jáchi a juú quiahva ndacú da. Quini nacaja da cán xihin ná anda naxinu lahla ndihi na jata véhe ta chí a váha na nandicuehe na nacaja ínima quini cán.

<sup>17</sup> Ta chí nacandaa ini ndihi ñayivi ndúu ñuu Efeso cán sahá ña nayaha yóho vatí cúú ná na Israel á cúú ná na tóho ñañehe ndihi na tuhun. Sahá ña cán quea nayihví na. Ta cuaha ná nacahan na ña cánu cúú quivi Jesús ña cúú xitoho í.

<sup>18</sup> Ta cuaha táhan na cándusa Jesús cán nacasáhá na náhma na tóco ndihi cuachi nacaja na. <sup>19</sup> Ta cuahá na nasacuu na tají ñéhe ndihi na libro ña tají naxinu na ta nachicaan ñúhu ná ña nuú ndihi ñayivi. Tá najitá na cuénta sahá yahvi tóco ndihi libro nacayi cán naxinu a tátuhun ivi jico uxu mil jiuhun cúxú. <sup>20</sup> Já nacasáhá xíta nuu tuhun vaha saha Jesús. Ta náha ña mé a ndaa ín ndée Jesús caja tóco ndihi ñaha.

<sup>21</sup> Tá sa nayaha ndihi ña yóho já nasacu ini Pablo cuhun da coto nihni da estado Macedonia xihin estado Acaya. Já quehe tucu da íchi cuhun da janda Jerusalén. Ta nacachi da ña tá sa nasahan da ñuu Jerusalén já yaha da cuhun da chí ñuu Roma.

<sup>22</sup> Ta mé Pablo yóho nachindahá da ivi táhan da xica chindeé táhan xihin dá ña ná cuhun da chí estado Macedonia. Ta da nachindahá da cán cúú Timoteo xihin Erasto ta mé Pablo nacandoo tóo chága da estado Asia.

*Ndávaa ñayivi ndúu ñuu Efeso*

<sup>23</sup> Mé tiempo já a juú quiahva cuahá ñayivi ñuu Efeso nandivaa na sahá ña nandihvi cuahá ñayivi íchi cuéntá Jesús. <sup>24</sup> In da naní Demetrio cúú dá da najándivaa na cán. Mé Demetrio yóho cávaha da tiniñu yúú xihín jiuñun cúxú ta mé tiniñu yúú cán ndaa tá quiahva cáa in veñuhu cuéntá Diana, ñá cúú ndióxi cája cáhnu na ñuu cán. Ta a juú quiahva vaha cána jiuñun na cája chúun xihín dá cán. <sup>25</sup> Sahá ña cán quéa mé Demetrio yóho najátaca da tóco ndihi na cája chúun xihín dá ta najátaca ri da java ga táhan na cája mé chuun cávaha tiniñu yúú cán. Já ñacachi da já xihín ná:

—Candehé ndo, sa cánda vaha ini ndó ña vaha ndivaha cána jiuñun yo xihín chuun cája í yóho ta ndúu vaha í cája ña. <sup>26</sup> Joo sa xíní ndo ta ñeñe mé ndó tuhun sahá da naní Pablo. Xíca nuu da cáhan da xihín ñayivi ña a juú toho ndióxi cúú ña cávaha ndahá ñayivi. Ta sa cuahá ndivaha ñayivi ñacava da jini. Ta a juú in túhún ñuu Efeso yóho cuití va jáchi sa ñacandee da ñacava da jini cuahá na ndúu chí estado Asia viti. <sup>27</sup> Ta ihvi ndivaha cáa ña yóho jáchi cuu cahnu da nuú chuun cája í ta nu cána jiuñun yo quéa yóho. Ta janda veñuhu ndióxi yo, ñá naní Diana cuu ndihi saha vatí ní cúú cáhan vaha na saha veñuhu ñá. Joo xihín ña cája Pablo yóho tá xíca nuu da cuu casahá ñayivi cahán núu na saha Diana ta cuu casahá na candají na ñá cúú ndióxi yo, mé Diana yóho. Ta mé ñá cúú ñá ñá cáhnu ndivaha ta ñayivi ní cúú estado Asia yóho xihín ñayivi ní cúú ñuyiví cája cáhnu na ña —ñacachi Demetrio cán xihín java ga da cávaha tiniñu yúú cán.

28 Ta tá naxini joho ndihi na cán ña nacachi Demetrio chí ivi laá najaa quini na já nacayuhú na já nacachi na já:

—Cáhnu ná cacuu Diana, ñá cúu ndióxi ndícahán na Efeso.

29 Ta xihín ña yóho tóco ndihi ñayivi ñuu cán nacasáhá na ndívaá na. Sahá ña cán queá natiin na ivi dataa, da naní Gayo xihín da naní Aristarco. Ndíví da yóho cúu da da estado Macedonia ta xíca nuu da xihín Pablo. Ta mé ñayivi cán natiin na da já ñúhu na da cuahan da vehe nu ndítaca ñayivi cán. 30 Ndúcu Pablo quíhvi nuu da tañu ñayivi cán ña cahan da xihín ná cúni da. Joo na cúu cuéntá Jesús cán coó naxeen na ña ná cuhun da. 31 Ta jári java na jutixia cuéntá estado Asia ndúu cán ta xíní táhan vaha xihín Pablo sahá ña cán queá nachindahá na chuun nu dá ña ná a quíhvi nuu da cahan da xihín na cán. 32 Tañu nu táca ñayivi ndívaá nahá cán sa jíin sa jíin ñaha cáyuhú na ndúu na. Jáchi cuahá na nataca cán ni co xíni na ndá cuéntá queá nataca na tañu ñayivi cuaha cán. 33 Joo java ñayivi ndúu cán nandicani na ndaja cáa ña cúu cán nuú in da naní Alejandro. Ta java na Israel ndúu cán nachindahá na Alejandro já ná candichi da cahan da xihín ñayivi cán. Anda já nandiñehe Alejandro ndáha dá já ná catáji tóo yúhu ná já nacasáhá ndíquehe da sahá na cúu cuéntá Jesús. 34 Joo tá naxini ñayivi cán ña cúu Alejandro in da Israel chí ivi laá nacasáhá tóco ndihi na cán cáyuhú na já cáchi na já:

—Cáhnu ná cacuu Diana, ñá cúu ndióxi ndícahán na Efeso.

Ta coó ñacatáji na tixi ivi hora cáyuhú na mé tuhun yóho.

<sup>35</sup> Ta tá sa ñacatáji loho ñayivi já ñacasáhá da cúu da cáhyí tutu ñuu cán cáhan da xihín ñayivi já cáchí da já xihín ná:

—Candehé ndó, na Efeso. Sa cándaá ini ndihi ñayivi ndúu ñuyiví ña ndítahan nuú ñayivi ndúu ñuu Efeso candaa vaaha na veñuhu ña cúu ndióxi naní Diana. Jáchi mé ña cúu ña ña cáhnu ndivaha ta indivi ñaquixi nahná ña ñandicava nu yo. <sup>36</sup> Ta ni in na a cúu cachi ña cáhan i ña tuhún sahá ña cán queá caja ndó ñamaní catáji ndó ta ndicani vaaha ini ndó sahá ña cúni ndó caja ndó. <sup>37</sup> Jáchi ndíví da ndáca ndó ñacasaa ndó yóho co cája cuíhná da veñuhu Diana ta ni co cáhan núu da saha ña. <sup>38</sup> Ta tá co táhán ini Demetrio xihín na cája chúun xihín dá sahá ña cája Pablo já ndítahan nu ná cuhun na vechúun nuú jutixia ta cán cuu ndiquehe in in na saha mé ná jáchi sahá ña cán ndúu juéxe cán caja víi na saha ñayivi. <sup>39</sup> Joo tá inga ñaha queá cúni ndó caja víi ndó saha, xíní ñúhú nditaca ndihí já ná cuu caja víi yó saha. <sup>40</sup> Jáchi cája i cuéntá cuu chicaan na cuachi jata yo saha ña jándicuita í ñayivi cani táhan na saha tóco ndihi ña nayaha quiví viti. Jáchi mé a ndaa co xini yo ndá tuhun nducú ñehé tá ná ndaca tuhún na mí ndá cuéntá queá ñandivaa nahá yo —ñacachi da xihín ná.

<sup>41</sup> Tá ñandihí ñacachi da cáhyí tutu cán tuhun yóho xihín ñayivi cán já najánduta da na.

## 20

*Cuahan Pablo estado Macedonia xihín estado Grecia*

<sup>1</sup> Tá sa nanduta ndihi ñayivi, na nandivaa nahá cán já nacana Pablo tóco ndihi na cúu cuéntá Jesús jáchi cúni da cahan da xihin ná sahá java ñaha ña ndítahan nu ná caja na. Ta tá nandihí nacahan da xihin ná já nanumi da na ta nandindayí da na já naquee da cuahan da chí Macedonia. <sup>2</sup> Níí cúu estado Macedonia cán naxica nuu da sahan da tuhun ndéé ini na cúu cuéntá Jesús xihin tuhun cahan da. Tá nandihí já naquee da cuahan da ta naxinu da chí estado Grecia. <sup>3</sup> Ta nacando da cán tixi uní yoo. Ta tá ja chá quehe da barco cuhun da chí ñundáhyi cuéntá Siria já nañehe dá tuhun ña sácu ini na Israel cán cahní na da. Sahá ña cán quéa nasacu ini da ña vaha chága ná cuhun sahá da já ná yaha tucu da chí Macedonia. <sup>4</sup> Ta ndáca táhan java na cúu cuéntá Jesús cuahan na xihin Pablo. Ta na cán cúu na yóho: in da naní Sópater, da ñuu Berea xihin Aristarco xihin Segundo, da ñuu Tesalónica xihin Gayo, da ñuu Derbe xihin Timoteo. Ta tañu na cán cuahan ri Tíquico xihin Trófimo, da naquixi estado Asia. <sup>5</sup> Tóco ndihi na ndáca táhan xihin Pablo yóho nasahan cuéé na chinu candati na ndehe ñuu Troas. <sup>6</sup> Joo ndehe, da cúu Pablo xihin Lucas tá sa nayaha víco tá xixi na pan ña co cáva táhan yusá naxaa xihin já nandaa nde barco ñuu Filipos cuahan nde chí Troas. Ta janda quiví uhun já nandique táhan nde xihin ndihi na cán. Ta chí nacando too chága nde usa quiví ñuu Troas cán.

*Xíto nihni Pablo ñuu Troas*

<sup>7</sup> Ta quiví domingo nataca ndihi nde, na cúu cuéntá Jesús ña cuxu nde pan yii. Ta sahá ña queta Pablo cuhun da inga quiví itaen sahá ña cán quéa

najánaḡa cuaḡa dá nu ná janda quiahva naxinu java ñuu. <sup>8</sup> Tóco ndihi na cúu cuénta Jesús cán nanditútu nde ndúu nde in vehe cánúu jiní ninu. Ta chí ndíyihvi ndaa nu ndúu nde jáchi cuaḡa lámpara cáyi. <sup>9</sup> Ta ndaja coo in da loho naní Eutico in coo da ventana xini johu da nu cáḡan Pablo. Joo saḡa ña cuaḡa cáḡan Pablo saḡa ña cán quea nanaá ini da loho cán chí naquiji da. Já najani dá nandicava da janda nu ñúhu piso uni. Ta tá nanuu na cúu cuénta Jesús cán nandiñehe na da janda ndii cúu dá. <sup>10</sup> Anda já nanuu Pablo ta najáca da mé dá jatá da loho cán ta nanumi da da ta já nacachi da já xihin na cúu cuénta Jesús cán:

—A cáyihvi toho ndó jáchi tácu va da yóho — nacachi Pablo chí najánditacu ñahá da.

<sup>11</sup> Anda já nandaa tucu Pablo cuaḡan da vehe piso ninu cán. Já nasahnda java da pan yii cán ta naxixi na ña. Anda já nacahan chága da xihin ná janda quiahva nativi. Já naquee da cuaḡan da. <sup>12</sup> Ta saḡa mé da loho, da nandicava cán cájii iní na ndáca vaḡa na da cuaḡan na jáchi nanditacu da.

### *Quéé Pablo ñuu Troas ta cuaḡan da chí ñuu Mileto*

<sup>13</sup> Nasacu ini Pablo cuhun sáhá da anda ñuu Asón. Joo mé nde nandaa nde barco nasahan nde mé ñuu cán jáchi janda cán nacandoo nde ndique táhan nde xihin dá. <sup>14</sup> Ta tá nandique táhan nde ñuu Asón cán xihin dá já nandaa da xihin ndihi nde ini barco. Já naquee nde cuaḡan nde ñuu Mitilene. <sup>15</sup> Cásahan nde ini barco ta inga quivi itaan já nayaha nde yati isla Quío ta janda tá nayaha inga tucu quivi já naxinu coo nde ñuu Samos.

Ta naquee tucu nde cuahan nde janda quiahva naxinu coo nde ñuu Trogilio. Ta cán nandiquehe ndée nde ta janda inga quivi itaan naxinu coo nde ñuu Mileto. <sup>16</sup> Co cuni Pablo cayancá da estado Asia sahá ña cán quéa coo nasahan nde ñuu Efeso. Númi da cuhun da ñuu Jerusalén coo da quivi víco Pentecostés jáchi nasacu ini da coo da víco cán tá ná quiahva Ndióxi ñamanj nu dá.

### *Cáhan Pablo xihin na sacuahá ñuu Efeso*

<sup>17</sup> Ta nani ndúu nde ñuu Mileto cán já nacana Pablo tóco ndihi na sacuahá veñuhu ñuu Efeso cán já ná quixi na. <sup>18</sup> Ta tá sa nataca na nu ndúu nde já nacachi da já xihin ná:

—Sa xini vaha ndó ndaja nacaja i janda quivi nu cuítí tá naxinu coo i estado Asia yóho. <sup>19</sup> Níi tiempo nasahjin i tañu ndó cán nacaja chúun i cuénta Jesucristo, xitoho í. Ta coo nandinehe jícó i mí i sahá ña nacaja i. Ta cuahá tañu nasacu u saha ndo. Ta nandoho ini i sahá ña cuni na Israel cahni na yehe. <sup>20</sup> Ta coo najandacoo i cáhan i tuhun Ndióxi xihin ndo jáchi xini vaha i ña jan cuu chindeé a ndohó. Ta najánaaha i ndohó nu táhyí ñayivi ta jari ini vehe ndó. <sup>21</sup> Ta najánaaha i nuú na Israel xihin nuú na tóho ña ndítahan nu ná ndicó coo ini na ta jándacoo na cuachi cája na. Ta nacachi i xihin ná ña ndítahan candeé ini na Jesucristo, xitoho í. <sup>22</sup> Ta viti cuhun i chí ñuu Jerusalén jáchi cuni ínima yji Ndióxi ña ná cuhun i cán ta co xini ndía cuu ndoho i ñuu cán. <sup>23</sup> Ña xini ndusa i quéa ña nacaxi tuhun ínima yji Ndióxi xihin i ña ndá ñuu nacuu nuú cuhun i ña jivi i chicaan ñayivi yehe vecaa á jivi i caja xíxi na xihin i. <sup>24</sup> Joo ni in ña yóho co cája

toho a nuú i. Ta vatí ná cahní na yehe co yíhvi toho i. Jáchí ña cúní mí i quéa cajii ínii jáxinu coo i chuun nasahan Jesucristo nuú i caja i. Ta ña yóho cúú á cáxi tuhun i nuú ñayivi tuhun vaha saha mé á ta saha ndá quiahva quíhvi ini a ñayivi.

<sup>25</sup> Sa naxica nuu i tañu ndó ta nacahan i xihin ndó ña vaxi quivi cacomí Ndióxi cuéntá sahá ñayivi. Ta viti xini vaha i ña ni in ndó a cúní ga ndó yehe. <sup>26</sup> Sahá ña cán quéa cáxi tuhun i xihin ndó quivi víti ña co ndójo ga i cuachi saha ndo tá ná jándicoo ndó íchi cuéntá Jesús. <sup>27</sup> Jáchí sa nacaxi tuhun i nu ndo tóco ndihi ña sácú ini Ndióxi caja ta coó nachijehé tuhun toho i sahá nu ndo. <sup>28</sup> Sahá ña cán quéa ndítahan candaa vaha ndó mé va ndó ta candaa vaha ndó tóco ndihi na cúú cuéntá Jesús ná cuahnu chága na xihin tuhun Ndióxi. Jáchí mé ínimá yii Ndióxi nasacu a ndohó ña ná cacomí ndo cuéntá sahá na cúú cuéntá mé á jáchí naxita nii mé á sahá ndihi na tá naxihí a ndica crúxu. <sup>29</sup> Cahan i ña yóho xihin ndo jáchí sa cándaa vaha ini i ña tá sa ná quee yehe cuhun i já quixi java ñayivi ta cacu ini na jándihi na sahá na cúú cuéntá Jesús. Ta tá quiahva cája ndivahyí jándihi rí sahá ndicachi quiahva já cacúni na jándihi na sahá na cúú cuéntá Jesús. <sup>30</sup> Ta jandá mé tañu mé ndó jan va cana java na ta jánahá na ña tuhún nuú ñayivi. Ta nducú na ndiquehe na na sa cúú cuéntá Jesús cuhun na jatá na cán. <sup>31</sup> Ña cán quéa cuéntá vaha coo ndó ná a jándahvi na ndohó. Xíní ñúhú ndicuhun ini ndó ña tixi uní cuia coo najándacoo i cahan i xihin ndó ndáa quéa ndítahan nu ndó caja ndó. Ta ñuú ta ndiví nacahan i xihin ndó sahá ña yóho ta chí anda



nasacu u saha ndo ña ná caja ndó ña cúni Ndióxi.

<sup>32</sup> Viti jándacoo i ndohó, ñani i, ndahá Ndióxi jáchi cáchi tuhun mé á ña quíhvi ini a tóco ndihi ñayivi. Íin ndée Ndióxi caja ndacú a ndohó já ná cuu coo ndó xihin tóco ndihi na ñacaxi mé á caja ñamaní xihin. <sup>33</sup> Ta xíní ñúhú ndicuhun ini ndó ña cóo nandiava ini i quehe e jiuhún á jáhma vaha cómí java ga ñayivi. <sup>34</sup> Ña ñacaja i quéa ñacaja chúun i xihin ndahá i já ná a ndímaní ñaha catacu u ta já ná cuu catacu na xíca xihín i. <sup>35</sup> Ta ní tiempo najánaha i nu ndo ña quiáhva já ndítahan nu ndó caja chúun ndó já ná coo ñaha catacu ndó ta já ná cuu chindeé ndó na ndímaní ñaha nuu. Ndítahan ndicuhun ini ndó tuhun ñacachi Jesucristo tá ñacachi a: “Cáji chága ini na jása ñaha a juú ga na ñéhe á”, ñacachi Pablo xihin na sacuahá veñuhu ñuu Efeso cán.

<sup>36</sup> Tá nandihí ñacahan Pablo já ñacaxítí da já ñacasáhá xíca tahví da nu Ndióxi xihin ndihi na cúu cuéntá Jesús cán. <sup>37</sup> Ta tóco ndihi na cán nasacu na xihin dá ta ñanumi na da ta já natatí yúhu ná sajóho da ña ndíndayí na da. <sup>38</sup> Tóco ndihi na ñacacuéha ini na saha Pablo jáchi ñacachi da xihin ná ña a cúni ga na da. Tá nandihí já ndáca táhan ndihi na nasahan na xihin dá janda nuú nandaa da barco cán.

## 21

### *Cuahan Pablo chí ñuu Jerusalén*

<sup>1</sup> Tá nandihí nandindayí nde na cúu cuéntá Jesús cán já nandaa nde barco ñaquee nde cuahan ndacú nde in ñuu naní Cos. Ta inga quiví itaan

já naquee tucu nde cuaḥan nde chí inga ñuu naní Rodas. Ta já naquee nde cuaḥan nde chí ñuu naní Pátara. <sup>2</sup> Ta mé cán nandique táhan nde xihín in barco, dó cuḥun chí estado Fenicia ta chí nandaa nde dó cuaḥan nde. <sup>3</sup> Ta nani cásahan nde ini dó já naxini nde isla Chipre xoo íti nde. Joo nayaha saa va nde janda quiahva naxinu coo nde ñuu Tiro ndacaan estado Siria jáchi mé cán ndítahan nu ná jánuu na ñaha ndójo dó. <sup>4</sup> Mé ñuu Tiro cán nanditahan nde na cúu cuéntá Jesús ta naçandoo tóo nde xihín ná tixi usa quivi. Ta najacahan ínimā yii Ndióxi na cán ña ná caxi tuhun na xihín Pablo ña ná a cuḥun da ñuu Jerusalén. <sup>5</sup> Joo tá sa nayaha usa quivi já naquee nde cuaḥan nde chí ñuu Jerusalén. Ta naqueta tóco ndihi na cúu cuéntá Jesús cán xihín ñájíhí na xihín jahyi válí na já ndaca táhan na xihín nde cuaḥan nde anda yuhú ñuu cán. Ta yatí yuhú tañuhú cán nacaxítí ndihi nde naxica tahví nde nu Ndióxi. <sup>6</sup> Ta tá nandindayí táhan nde já nandaa nde barco ta na cán naquee na cuanúhu ná vehe na.

<sup>7</sup> Naquee nde mé ñuu Tiro cásahan nde nuú tañuhú janda quiahva naxinu coo nde ñuu Tolemaida. Ta mé cán nacahan Ndióxi nde xihín na cúu cuéntá Jesús ndúu cán. Ta chí naçandoo nde in quivi xihín ná. <sup>8</sup> Ta inga quivi itaan já naquee nde cuaḥan nde janda quiahva naxinu coo nde ñuu Cesarea. Ta cán nasahan nde vehe in da sáxica nuu cahan tuhun Ndióxi xihín ñayivi. Mé da yóho naní da Felipe ta nasacuu da in táhan ndíhusa da chindeé na apóstol veñuhu ñuu Jerusalén. Ta chí naçandoo tóo nde vehe da cán. <sup>9</sup> Ta nasahin comí jahyi jíhí da, na tacú. Ta tiaḥva ndícomi ná jáyaha

na tuhun cáhan Ndióxi nuú ñayivi. <sup>10</sup> Tá sa ñacaja chá quivi ndúu nde vehe da cán já ñaxinu coo in profeta, da ñaquixi estado Judea ta naní da Agabo. <sup>11</sup> Mé da yóho ñasaá da coto nihni da ndehe nu ndúu nde cán. Ta nani íin da xihín nde cán já ñatiin da cinturón ñaha Pablo. Já ñacató da ndáha dá xihín saha dá xihin mé cinturón ta já ñacachi da já:

—Cáchi íinima yji Ndióxi ña tá quiahva ñacaja i ñacató i mí i quiahva já cató na Israel da xihín ñaha cinturón yóho. Ta já ndiquiahva na da ndahá na tóho —ñacachi Agabo cán xihín nde.

<sup>12</sup> Tá ñaxini johó nde ña ñacachi Agabo yóho já ñacasáhá nde cáhan ndahví nde xihin Pablo ña ná a cühun da ñuu Jerusalén. Ta jári na cúu cuéntá Jesús ndúu ñuu Cesarea cán cáhan ndahví na xihin dá ña ná a cühun da. <sup>13</sup> Joo ñanducú ñehe Pablo tuhun nuú nde já ñacachi da já:

—Ndá cuéntá quea sácu cóhó ndo ta cája ndó ña cándíí ini i. Candehé ndo ná cahan i xihin ndo. Coó caja toho a ná cató na yehé jáchi íin tiahva i ndiquiahva i mí i quivi i saha Jesús, xitoho í mé ñuu Jerusalén cán —ñacachi da.

<sup>14</sup> Coó ñacuu caja nde cava nde jini dá ña ná a cühun da. Chí coó ñacahan chága nde sahá ña yóho xihin dá ta ñacachi nde:

—Ná coo tá quiahva cúni Ndióxi va.

<sup>15</sup> Tá ñandihi já ñacaja tiahva nde ñaha nde ta já ñaquee nde cuahan nde ñuu Jerusalén. <sup>16</sup> Ta ndáca táhan java na cúu cuéntá Jesús ñuu Cesarea cán cuahan na xihin nde. Ta tañu na cán ndácaan in da naní Mnason, da ñaquixi isla Chipre. Ta anda sanahá ndíco da íchi cuéntá Jesús. Ta sa mé vehe

da yóho sácú ini nde canduu tóo nde ñuu Jerusalén cán.

*Xíto nihni Pablo da nani Jacobo*

<sup>17</sup> Tá naxinu coo nde ñuu Jerusalén já cávatá na cúú cuéntá Jesús cán nandiquehe na ndehe. <sup>18</sup> Ta inga quiví itaan já ndáca Pablo ndehe nasahan nde coto nihni nde Jacobo. Ta tá naxinu coo nde cán já naxini nde ña nataca tóco ndihi na sacuahá nuú na cúú cuéntá Jesús cán. <sup>19</sup> Ta nacañan Ndióxi Pablo xihin ná já nacasáhá ndícani da nu ná tá in tá in ña náhnu nasahan Ndióxi ñamaní nu dá caja da tañu na tóho, na coo naquixi chichi Israel. <sup>20</sup> Tá naxini johu na cán ña yóho já nacaña cáhnu na Ndióxi. Ta tá nandihí já nacasáhá cáchí na já xihin Pablo:

—Candehé, ñani i. Sa xini vahún ña cuahá ndivaha táhan na naquixi chichi Israel sa ndíco na íchi cuéntá Jesús viti. Ta tóco ndihi na cáchí na ña ndítahan caja na ña sáhdá ley Moisés. <sup>21</sup> Joo nañehe ná tuhun ña xíca nuún jáñahún nuú na Israel, na ndúu ñuu tóho ña co xini ñúhú ga caja na ña sáhdá ley Moisés ta ni marca cán co xini ñúhú chicaan ga na yiquí cuñu jahyi na. Ta jáñahún na ña co ndítahan caja na costumbre najándacoo tásáhnu jícó yo nu yo. <sup>22</sup> Ta co xini nde ndía caja nde viti jáchi nditútú na ndúu Jerusalén yóho tá ná candaa ini na ña nacasauñ yóho. <sup>23</sup> Sahá ña cán quéa caja nde cuéntá ña vaha chága ná cajún ña cáchí nde yóho: Cañehún comí ta ndúu tañu nde yóho já ná cuhun na xuhun. Jáchi sa naxinu coo quiví caja ndícomí da yóho ña nasahan da tuhun da nu Ndióxi caja da. <sup>24</sup> Ná cuhún xihin dá já ná ndaja viún mún xihin dá tá quiahva sáhdá ley

Moisés ta já ná chahvún nuú jatá jini dá. Ta xihín ña yóho cuni na Israel ña a juú ña ndaa cúú tóco ndihi tuhun cáhan ihvi na sahun. Ta xihín ña yóho cuni na ña cája tá cájún ña sáhdá ley Moisés. <sup>25</sup> Ta sahá na tóho, na cúú cuénta Jesús, sa nacahyí nde in carta cuahan nu ná ña ná a jándihí na mé ná caja na ley Moisés. Joo nacachi nde xihín ná ña ná a cáxi na cuñu quíti, rí najoco na nuú tiniñu yúú. Ta ná a cáxi na nji ta ni ná a cúxu na cuñu quíti, rí nasahnú. Ta ná a cóo na xihín taa á ñaha, na co cúú yí ná á ñájihí na. Ña yóho cúú tuhun nacahyí nde nu carta cuahan nuú na tóho —nacachi na sacuahá cán xihín Pablo.

<sup>26</sup> Anda já naquehe Pablo ndícomí dataa cán ndaca da cuahan xihín dá. Ta inga quiví itaan já nandaja vií da mé dá nu Ndióxi ta nandivií ndícomí da cán viti. Ta tá nandihí já naquihvi da veñuhu ña caxi tuhun da xihín ná ndá quiví xinu coo ña ndivií na já ná cuu joco in in da cán ñaha nu Ndióxi.

### *Tín na Pablo veñuhu cáhnu ñuu Jerusalén cuahan da vecaa*

<sup>27</sup> Tá ja chá xinu coo quiví usa já naxinu coo java da Israel, da naquixi chí estado cuénta Asia. Ta tá naxini na cán ndacaan Pablo ini veñuhu cáhnu cán já najándivaa na ñayivi já ná ndicuíta na caja xíxi na xihín dá. <sup>28</sup> Ta nacasáhá cáyuhú na nuú ñayivi já cáchí na já xihín ná:

—Candehé ndó, na Israel. Caja ndó ñamaní chindeé ndó ndehe xihín da yóho jáchi ní cúú nu xíca da yóho cáhan núu da sahá ñayivi Israel ta jánaha da ñayivi ña co ndítahan nu ná candúsa

na ley Moisés ta ni co ndítahan nu ná caja cáhnu na veñuhu cáhnu ndácaan Jerusalén yóho. Ta viti cája núu chága da jáchi janda java da tóho, da ñuu Grecia najáquihvi da veñuhu í ta jáyuxu da veñuhu yii yóho xihín da tóho jan —cáchi na.

<sup>29</sup> Tóco ndihi ña yóho nacachi taa Israel naquixi Asia cán xihín ñayivi jáchi nacahán da ña najáquihvi Pablo cán da naní Trófimo, da tóho ñuu Efeso ini veñuhu joo a juú a já. Nacahán na já jáchi naxini na ndáca táhan Trófimo xihín Pablo xíca nuu da ñuu Jerusalén cán.

<sup>30</sup> Xihín ña nacachi da naquixi Asia yóho nandivaa tóco ndihi ñayivi ñuu Jerusalén já xínu na naxinu coo na ñatiin na Pablo. Já ñúhu na da ñatavá na da jatá veñuhu cán ta ivi laá nachicaji na yéhe veñuhu cán. <sup>31</sup> Chí ndúcú na cahní na da joo da cúu jefe soldado cán ñañehe dá tuhun ña nandivaa ndihi ñayivi ñuu Jerusalén cán. <sup>32</sup> Anda já najátaca da cúu jefe soldado xihín java ga da náhnu já xínu da naxinu coo da nu ndívaa ñayivi cán. Tá naxini ñayivi cán vaxi da cúu jefe soldado cán xihín java soldado já najávaa ñahá na chí co cáni ga na Pablo. <sup>33</sup> Anda já nacayati da cúu jefe soldado cán nu Pablo já ñatiin da da cuhun da vecaa. Ta ñasahnda da chuun ña ná cató na da xihín ivi cadena. Tá nandihí já nacasáhá ndáca tuhún da ñayivi ña ndá da cúu da yóho ta ndía nacaja da. <sup>34</sup> Joo sa jíin sa jíin tuhun cáyuhú in in ñayivi cán. Sahá ña cán queá coo nacuu candaa ini da cúu jefe soldado cán ndá cuachi queá jácojo na jata Pablo jáchi a juú quiahva ndívaa na cán ndúu na. Sahá ña cán queá ñasahnda mé jefe

soldado cán chuun ña ná cañehe na Pablo vehe nu ndúu soldado. <sup>35</sup> Ta tá naxinu coo na cán naçahán na ndaa na cuani vehe soldado cán xihín Pablo joo coó naçuu ndaa na jáchi chí cándíhi táhan ñayivi cúni na cani na Pablo. Sahá ña cán quea nasajocó soldado cán Pablo já nandaa na cuani vehe soldado cán xihín dá. <sup>36</sup> Ta tóco ndihi na cán cáyuhú cóhó na ndícaa na jata soldado já cáchi na já:

—Cahní ndó da. Ná quivi da —cáyuhú na.

*Ndíquehe Pablo saha mé dá nuú ñayivi cán*

<sup>37</sup> Ta tá sa ndúcú na jáquihvi na Pablo ini vehe soldado cán já naçachi Pablo já xihín da cúu jefe soldado cán:

—Á quiahva ndó ñamani nuú i ná cahan i ivi joho tuhun xihín ñayivi yóho.

Anda já nanducú ñehe da cúu jefe soldado cán tuhun nu Pablo já naçachi da já:

—Á tiahvún cahún tuhun griego, dá já. <sup>38</sup> Á a juú toho yóhó cúu da naquixi nación Egipto viti chá va, da najácahan ñayivi ná ndicuíta na cani táhan na xihín gobierno ta nasandaca da comi mil da sáhní ndii nasahan da chí yucú íchí nuú coó ñayivi. Á a juú toho yóhó cúu mé da cán —naçachi da cúu jefe soldado cán xihín Pablo.

<sup>39</sup> Anda já nanducú ñehe Pablo tuhun nu dá já naçachi da já:

—Jiin va cúu yehe jáchi cúu u in da naquixi chichi Israel ta naçacu u ñuu Tarso, in ñuu cáhnu ndácaan estado Cilicia. Ta viti á cuu quiahva loho ndó ñamani nuú i ná cahan i ivi tuhun xihín ñayivi

yóho —ñacachi Pablo xihín da cúu jefe soldado cán.

<sup>40</sup> Anda já nasahan da cán ñamaní nu Pablo ña ná cahan da xihín ñayivi. Anda já nandaca ndichi Pablo nuú cuani vehe cán já nandiñehe da ndáha dá nu ná já ná catáji yúhu ná. Ta tá sa nacatáji yúhu ná já nacasáhá cahan da tuhun hebreo xihin ná.

## 22

<sup>1</sup> Já nacasáhá Pablo cáchi da já xihin ná:

—Cuni johó ndó nu cahan i xihin ndóhó, na sacuaḥa xihín ñani i jáchi cúni ndiquehe e sahá i viti —ñacachi Pablo xihin ná.

<sup>2</sup> Tá naxini johó na cán ña cahan Pablo tuhun hebreo, mé tuhun cahan mé ná já nacatáji chága yúhu ná. Anda já ñacachi Pablo já xihin ná: <sup>3</sup> —Yehe cúu u da ñaquixi chichi Israel. Ta ñacacu u ñuu Tarso ndácaan estado Cilicia. Joo nasahnu u ñuu Jerusalén yóho ta mé yóho najácuaha vi xihin in da naní Gamaliel. Ta tá quiahva sáhdá ley Moisés, ña nasacu vaha tásáhnú jícó yó quiahva já nandihí ini i cája i. Ní tiempo nandihí ini i cája chúun i cuéntá Ndióxi xihin ndinuhu ini i tá quiahva cája mé ndó anda quivi viti. <sup>4</sup> Naxica nuu i cája xíxi i xihin na ndíco íchi cuéntá Jesús janda quiahva sáhní i na. Ta cuahá taa, ñáha viti naxica nuu i játaca i na ña ná cuhun na vecaa. <sup>5</sup> Ta xíni vaha da cúu sacuaḥa nuú jutú xihin ndihí na sacuaḥá veñuhu ña cahan i ña ndaa xihin ndo. Jáchi mé na yóho cúu na ñacahíyí tutu nasahan na nuú i já ná ndiquiahva i ña nuú ñaní, na ñaquixi chichi Israel ndúu ñuu Damasco cán. Ta nasahan i cán ndínducú



u na cúu cuéntá Jesús ña cañehe e na quixi i ñuu Jerusalén yóho caja xíxi nde xihin ná.

*Ndicani Pablo ndaja ñacuu ñandiquehe da íchi cuéntá Jesús*

*(Hch. 9:1-19; 26:12-18)*

<sup>6</sup> Joo nani xíca i íchi cuahan i tátuhun caxivi cáa tá sa yati xinu coo i ñuu Damasco cán já in cuití ñandiyehē ndaa nu ín i ta mé a yóho ñaquixi a indiví. <sup>7</sup> Chí ñandicava i nu ñúhu ta já ñaxini johō i in a cáhan xihín i já ñacachi a já: “Saulo, Saulo ndá cuéntá quéa ndícuítún cája xísún xihín i”, ñacachi a xihín i. <sup>8</sup> Anda já ñacasáhá ndáca tuhún i já cáchí i já: “Ndá na cúu ndóhó ta ndaja naní ndo”, ñacachi i xihín á. Anda já ñanducú ñehe a tuhun nuú i já cáchí a já: “Yehe cúu Jesús, da ñuu Nazaret ta xihín yehe ndícuítún cája xísún viti”, ñacachi a cán xihín i. <sup>9</sup> Ta na cuahan xihín i cán ñayihví na tá ñaxini na ña ñandiyehē nu ín i cán. Joo coó ñaxini johō na ña cáhan xihín i cán. <sup>10</sup> Anda já ñacachi i já xihín Jesús: “Cahan ndó xihín i, xitoho i ndíá ndítahan caja i.” Anda jáví ñacachi a já xihín i: “Candichi ta cuahán ñuu Damasco nu cáhún cuhun jan. Ta ñuu jan ndicani in da nuun ndíá ndítahan cajún”, ñacachi Jesús xihín i. <sup>11</sup> Ta chí ñacuaá nuú i ñacaja ña ñandiyihví cán. Sahá ña cán quéa jandá ñatiin ndaa na ndáca táhan i cán yehe cuahan nde janda quiahva ñaxinu coo nde ñuu Damasco cán.

<sup>12</sup> Ta mé cán ñasahjin in da naní Ananías, da cája ña sáhdá ley Moisés xihín ndinuhu ini da. Ta tóco ndihi na Israel ndúu Damasco cán cáhan na saha dá ña cúu dá ta vaaha. <sup>13</sup> Ta mé Ananías yóho ñasaá da ñaxito nihni da yehe. Já ñacasáhá cáchí

da já xihín i: “Saulo, ñani i candehé tucu viti.” Tá ñacachi da já chí ivi laá nanuna nuú i já ñaxini i da. <sup>14</sup> Anda já ñacachi da cán já xihín i: “Mé Ndióxi, ña ñacaja cáhnu tásáhnu jícó yo, mé a cán quéa ñacaxi a yohó já ná candaa inún ndá quéa sácú ini mé á caja xuhun. Ta ñacaxi a yohó já ná cunún Jesús, mé a cája ndinuhu ña ndaa. Ta ñacaxi a yohó já ná cuni johún nu cáhan Jesús. <sup>15</sup> Já quéa cuhún cahún saha mé á nu tóco ndihi ñayivi. Já ná ndicanún nu ná saha ña ñaxinún xihín ña ñaxini johún. <sup>16</sup> A cándati chágun viti. Cuándacoo. Cándéé inún Jesucristo viti chí cuáhán candúta já ná ndoo cuachún, caja Ndióxi”, ñacachi Ananías xihín i.

*Ndicani Pablo ña ñachindahá Ndióxi da cahán da tuhun vaha saha Jesús nuú na tóho*

<sup>17</sup> Tá ñandihí já ñandicó cōo i ñuu Jerusalén ta ñasahan i veñuhu cáhnu cán caça tahví i nu Ndióxi. Ta nani xíca tahví i cán já ñaquixi tátuhun in sani nuú i vatí ndíta i. <sup>18</sup> Ta ñaxini i Jesús, xitoho i já ñacachi a já xihín i: “Camún cuáqueún ñuu Jerusalén yóho jáchí a cándúsa toho ña yóho tuhun vaha cahún saha i”, ñacachi Jesús xihín i. <sup>19</sup> Anda já ñanducú ñehe e tuhun nu Jesús já cáchí i já xihín á: “Candehé ndo, xitoho i. Sa xini vaha tóco ndihi ñayivi ña ñaxica nuu i ndijáá veñuhu tiin i ña cándéé ini ndohó ta já ñacani i ña ta ñataán i ña vecaa. <sup>20</sup> Ta sa xini ña ña tá ñasahní ña Esteban, mé da ñaxica nuu cáhan tuhun vaha saha mé ndó, in ñasacuu u xihín ña ñasahní ñahá cán. Jáchí táhán ini i cándichi i ndáá i jahmá ñayivi cán nani sáhní ña Esteban”, ñacachi i xihín Jesús. <sup>21</sup> Anda já ñacachi Jesús já xihín i: “Cuáqueún cuhun jáchí chindahá

xícá i yohó cuhún cahún sahá i nuú ñayivi tóho, na coó naquixi chichi Israel”, nacachi Jesús xihín i — nacachi Pablo xihín na cán.

*Cáhan chága Pablo xihín mé da cúu jefe nu ndíhi soldado*

<sup>22</sup> Nasanduu táji na Israel cán nani cáhan Pablo xihín ná. Joo tá nacahan da sahá na tóho cán já nacasáhá cáyuhú na já cáchí na já:

—Cahní ndó da jan. Ná quivi da. Co ndítahan ga nu dá coo da ñuyívi yóho —cáchí na cán cáyuhú na.

<sup>23</sup> Ta sahá ña ndúcú ndeé na cáyuhú na ta jání na jáhma ná nu táchi ta janda ña yácá jácana nihni na nu táchi. <sup>24</sup> Sahá ña cán quéa nasahnda da cúu jefe soldado cán chuun ña ná jáquihvi na Pablo cán ini vehe soldado. Ta tá nandihvi da já nasahnda da chuun ña ná jácaxáhan na da xihín churú ní já ná nahma da ndía nacaja da ta ndá saha quéa ndícuja ñayivi cán xihín dá. <sup>25</sup> Joo tá sa nacató na Pablo ta ndúcú na jácaxáhan na da já nacachi Pablo já xihín in soldado cán:

—Ta viti cahan ndó xihín i á núná nu ndo jácaxáhan ndó in da cúu ta romano tá camaní yíi caja vií ndó saha dá tá quiahva sáhdá ley romano jáchi yehe cúu u da romano —nacachi Pablo xihín soldado cán.

<sup>26</sup> Tá naxini johó da ña yóho chí ivi laá nasahan da cáxi tuhun da nu da cúu jefe soldado cán já cáchí da já xihín dá:

—Cuéntá vaha coo ndó ta coto a cája xíxi ndó xihín da jan jáchi cúu dá ta romano —nacachi in soldado cán.

<sup>27</sup> Anda já n̄acayatí da cúú jefe soldado cán n̄u Pablo já n̄acasáhá ndáca tuhún ñahá da já cáchí da já:

—Á ndaa cúún taa romano —cáchí da.

—Ajan, taa romano cúú u —n̄acachi Pablo xih̄in dá.

<sup>28</sup> Anda já n̄acasáhá cáchí mé da cúú jefe soldado cán já xih̄in Pablo:

—Yehe n̄achah̄vi i cuahá ndivaha jjuhún já n̄acuu n̄anduu u in taa romano —n̄acachi da cán xih̄in Pablo.

Ta já cáchí Pablo já xih̄in dá:

—Joo yehe cúú u taa romano jáchí já n̄acacu u —n̄acachi Pablo.

<sup>29</sup> Tá n̄axini joh̄o n̄a cúni jácaxáhan Pablo cán ña yóho chí n̄ayih̄ví n̄a já n̄acasáhá xíca játá n̄a cáxoo na n̄u dá. Ta j̄anda mé da cúú jefe soldado cán n̄ayih̄ví da jáchí sa n̄atiin na da vatí cúú dá taa romano.

*Ndíquehe Pablo sah̄a mé dá nuú n̄a sācuah̄a Israel*

<sup>30</sup> Ta inga quiv̄i itaan n̄atavá da cúú jefe soldado cán cadena n̄asandico ndáha Pablo. Ta sah̄a ña cúni da cán candaa ini da ndá cuachi quéa jácojo na jata Pablo sah̄a ña cán quéa najátaca da n̄a sācuah̄a nuú jut̄u xih̄in n̄a sācuah̄a Israel. Anda já ñéhe da Pablo já n̄asacu da da nuú n̄a cán.

## 23

<sup>1</sup> Anda já n̄asandehé Pablo n̄u tóco ndihi n̄a sācuah̄a nuú n̄a Israel cán já n̄acasáhá cáchí da já xih̄in ná:

—Candehé ndo, ñani i. Janda jihna ta janda quivi víti cája i ña cuni Ndióxi ta xini mé á ndaja ndacaan jini i —ñacachi Pablo.

<sup>2</sup> Joo da cúu sacuaḥa nuú jutu naní Ananías cán nasahnda da chuun nuú na ndíta yati xihin Pablo cán ña ná caní na jahndá yuhu dá. <sup>3</sup> Anda já ñacachi Pablo xihin Ananías cán:

—Tá quiahva ñacani na jahndá yuhú i quiahva já caní Ndióxi yohó, da co cúu tá quiahva ndáa da. Íun jan ndaja ndíchún yehe jáchi jácojo na cuachi jatá i ña co sácú vaḥa i ley. Joo yohó nandava ndojún ña sáhdá ley jáchi nasahndún chuun ña ná caní na yehe —ñacachi Pablo xihin Ananías cán.

<sup>4</sup> Anda já ñacasáhá na ndúu cán cáḥan na xihin Pablo já cáchi na já xihin dá:

—Cuéntá couñ jáchi cáḥhún xihin da cúu jutu sacuaḥa chága nu ndíhi jutu cuéntá Ndióxi —ñacachi na xihin Pablo.

<sup>5</sup> Anda já ñacachi Pablo já:

—Cáhnú coo ini ndó, ñani i jáchi co xini toho i ña cúu da jan jutu sacuaḥa chága nu ndíhi jutu cuéntá Ndióxi. Mé tuhun Ndióxi sáhdá chuun já cáchi a já: “A cáḥhún xihin da cómí chuun sahá ñuu ndó” —ñacachi Pablo.

<sup>6</sup> Tá nandihí já nandicuni Pablo ña ndúu java na saduceo ta ndúu ri java na fariseo mé cán. Sahá ña cán quea ñacaḥan cóhó Pablo já ñacachi da já:

—Candehé ndo, ñani i. Yehe cúu u in da fariseo ta in fariseo nasacuu ri tátá i. Ta víti cája víi na yóho sahá i sahá ña cándúsa i ña vaxi quivi nditacu tucu ndji —ñacachi Pablo.

<sup>7</sup> Tá ñacachi Pablo já ivi laá nandicuíta na fariseo xihin na saduceo ndítuhún xihin táhan na

já ñasahnda java táhan na. <sup>8</sup> Jáchi ña saduceo cán cō cándúsa na ña vaxi quiví nditacu tucu ndii. Ta ni cō cándúsa na ña ndúu tátō Ndióxi. Ta ni cō cándúsa na ña ín inima ñayivi. Joo ña fariseo cándúsa va na tóco ndihi ña yóho. <sup>9</sup> Tóco ndihi ña cán cáyuhú ña ndúu na. Sahá ña cán quéa nandaca ndichi java ña jánaha ley Moisés, mé ña cuahan xoo ña fariseo cán. Já ñacasáhá cáchi ña já xihin tóco ndihi ñayivi cán:

—Coó toho cuachi ná caja ña naní Pablo yóho. Jáchi ndá inima yii quéa ñacahan xihin ña yóho á tá cōó ta ndá tátō Ndióxi quéa ñacahan xihin ña yóho. Sahá ña cán quéa tá ná cahan ihvi yó xihin ña yóho cúu á tátuhun cáni táhan í xihin Ndióxi —ñacachi ña jánaha ley Moisés xihin ná.

<sup>10</sup> A juú quiahva ñacasáhá ndívaá ñayivi cán sahá ña cán quéa ñacasáhá yíhví ña cúu jefe soldado cán ña tiahva náá tiin na Pablo ta jácuachi na ña. Sahá ña cán quéa ñasahnda da chuun ña ná quixi soldado tavá ña Pablo tañu ñayivi cuaha cán. Ta já ná cañehe tucu na ña cuhun ña vehe soldado cán.

<sup>11</sup> Ta ñuú inga quiví itaan já ñacanaha ñuú Jesús, xitoho í ñu Pablo ta ñacahan xihin dá já ñacachi a já:

—A ndícani inún, Pablo jáchi tá quiahva ñacahún sahá ña ñuú ñayivi ñuu Jerusalén yóho quiahva já cahún sahá ña ñuú ñayivi ndúu ñuu Roma —ñacachi Jesús xihin dá.

### *Sácú ini ña Israel cahní ña Pablo*

<sup>12</sup> Ta inga quiví itaan já najándique táhan java ña Israel tuhun na ña cahní ña Pablo. Ta ñacachi na a cúxu na ta ni ticuúí a cóho na janda quiahva

na cahní na Pablo. Ta naçachi xihín táhan na ña cuhun cháhan jata ndá da naxixi á naxihi ticuñi nani tácu Pablo. <sup>13</sup> Ta yáha ga nuú ivi jico ta cúu da najándique táhan tuhun caja ña yóho. <sup>14</sup> Tá nandihí já naquee na nasahan na çahan na xihín da sacuaça nuú jutú cán xihín na sacuaça nuú na Israel cán já naçachi na já xihín ná:

—Tóco ndihí nde najándique táhan nde tuhun nde cahní nde Pablo. Ta nachicaan nde cháhan jata ndá da ná cuxu nani tácu Pablo. <sup>15</sup> Sahá ña cán queá caja ndó ñamaní jándique táhan ndó tuhun ndó xihín java ga na sacuaça jan já ná çahan ndó xihín da cúu jefe soldado já ná cañehe tucu da Pablo quixi da nu ndo. Ta çahan loho ndó xihín dá ña cúní ndó caja vií cuéé chága ndó sahá ña naçaja Pablo. Já va cachi ndó xihín da cúu jefe soldado cán ta ndehe canduu tiahva nde cahní nde da tá ná quixi da íchi —naçachi na xihín na sacuaça cán.

<sup>16</sup> Joo in ta loho, da cúu jaxi Pablo nañehe dá tuhun ña sácú ini na cahní na Pablo sahá ña cán queá xínu da nasahan da cáxi tuhun da nu Pablo vehe soldado cán. <sup>17</sup> Tá nandihí nandicani ta loho cán ña yóho nu Pablo já naçana da in táhan da cúu soldado cán já naçachi da já xihín dá:

—Cajún ñamaní candacún da loho yóho ná cuhun da nuú da cúu jefe nu soldado. Jáchi ín tuhun cúní da yóho çahan da xihín da cán —naçachi Pablo xihín dá.

<sup>18</sup> Anda já ndáca soldado cán da cúu jaxi Pablo nasahan da nuú da cúu jefe soldado cán já naçachi da já xihín dá:

—Da naní Pablo ndácaan vehe soldado naxiça da ñamaní nuú i ña ná candaca i da loho yóho quixi

i ñehé e da jáchi íin tũhun cúnı da caħan da xihın ndo —naçachi da.

<sup>19</sup> Anda já naıiin jefe soldado cán ndahá ıa loho cán já naıavá xóo da da já naçasáhá ndáca tũhun ñahá da já naçachi da já xihın dá:

—Ndıa cúnun caħún xihın i —naçachi da.

<sup>20</sup> Anda já naçasáhá ıa loho cán cáxi tũhun da já naçachi da já:

—Najándique táhan na Israel tũhun na ña caça na ñamanı nu mé ndó ña ná cañehe tucu ndó Pablo nuú na saçuaha nuú na Israel cán ña caviı vaha chága saħa dá. <sup>21</sup> Joo a cándúsa ndó caja ndó ña cúnı na jáchi yáha chága nuú ivı jico ıa ndáti jehé na íchi ña cahnı na Pablo. Ta nandique táhan tũhun na ña a cúxu na ni a cóho na ticuiı janda quıahva ná cahnı na Pablo. Ta viti ndáti na candehé na á caja ndó ña cúnı na —naçachi jaxi Pablo cán xihın da cúu jefe soldado.

<sup>22</sup> Ta tá nandıhi já naçachi da cúu jefe soldado cán xihın dá ña ná a ndıcanı da nuú ni in ñayıvi saħá ña sácú ini na Israel caja na xihın Pablo. Chí naçuee da loho cán cuħan da.

*Chındahá na Pablo cuħan da nuú gobernador nanı Felix*

<sup>23</sup> Anda já naçana jefe soldado cán ivı da sáhdá chuun nuú soldado ta naşahnda da chuun nu dá ña ná caja ııahva da ivı ciento soldado táhan da xıca sáhá xihın unı jico uxu soldado táhan da cándójó cuáyı. Ta naıahnda chuun nu dá ña ná caja ııahva da inga ivı ciento táhan da ñeħe lanza já ná candaca na Pablo cuħun da ñuu Cesarea cán. Ta ná quee na cuħun na tátũhun caa in sacuaá.

<sup>24</sup> Ta naşahnda da chuun ña ná caja ııahva na cuáyı



canúu Pablo cūhūn dā. Ta naśahnda da chuun ñā ná candaa vaha na Pablo já ná cuu xīnū cōo vaha da nuú dā cúu gobernador naní Felix ñuu Cēsarea cán. <sup>25</sup> Ta naçindahá dā in carta cuahan xihīn ná já ná ndiquiahva na ñā nuú dā cúu gobernador cán ta ñā yóho cúu mé tuhun naçahyi nū carta cán:

<sup>26</sup> “Yehe cúu Claudio Lisias ta chindahá i carta yóho nū ndo, tá Felix. Ta nū carta yóho cáhan Ndióxi yehe xihīn ndo, dā cúu dā cáhnu ñuu Cēsarea cán. <sup>27</sup> Candehé ndo, tá Felix. Chindahá i dā yóho nū ndo jáchi natiin na Israel dā ta ndúcú na cahní na dā. Joo tá naçandaa ini i ñā cúu dá dā romano já naśahan i xihīn java soldado ta naçandaa nde dā ndáha na cán. <sup>28</sup> Ta sahá ñā cúni candaa ini i ndá cuachi jácojo na jata dá sahá ñā cán quea naśañehe e dā naśahan i nuú na sacuaħa nuú na Israel cán. <sup>29</sup> Já naçandaa ini i ñā jácojo na cuachi jata dá saħa ley mé va na. Ta sahá ñā cōo cuachi naçaja da nū mí sahá ñā cán quea cōo naçeen nde ñā ná cahní na dā ta ni janda vecaa cōo cáni nū dá cūhūn dā, cáhán i. <sup>30</sup> Joo naçandaa ini i ñā sácú ini na Israel cahní na dā sahá ñā cán quea chindahá vaha i dā nū mé ndó. Ta naçachi i xihīn na xójo ini xihīn dá ñā ná saa na nū mé ndó cacu na saħa dá ndia ndóho na xihīn dá. Ñā yóho cúu ndihi ñā cáhan i xihīn ndo, tá Felix. Ndióxi ná cōo xihīn ndo”, cáchi carta cuahan xihīn Pablo.

<sup>31</sup> Ta naçaja mé soldado cán tá iin natahnda chuun nū dá. Ta já ñehe ñuu na Pablo naśahan na janda ñuu Antípatris. <sup>32</sup> Ta inga quiví itaan já nandicó cōo java soldado, dā naśahan sahá cán chí vehe soldado. Joo java dā cándójó cuáyī cán cátaħan yīi dá xihīn Pablo cuahan

da. <sup>33</sup> Ta tá naxinu ɔo da ñuu Cesarea já nandiquiahva da carta cán nuú da cúu gobernador. Ta nandiquiahva ri da Pablo nuú da cán.

<sup>34</sup> Ta tá sa nandihi naçahvi da cúu gobernador carta cán já naçasáhá ndáca tuhún da Pablo saha ndá ñuu naquixi da. Ta tá naçandaa ini da ña cúu Pablo da ñuu Cilicia <sup>35</sup> já naçachi da já xihin dá:

—Janda quiahva ná xinu ɔo na jácojo cuachi jatun anda já caja vii i sahún —naçachi Felix cán xihin Pablo.

Tá nandihi já naçahnda da chuun ña ná candaa vaha na Pablo nani ndácaan da vechúun Herodes cán.

## 24

*Ndíquehe Pablo saha mé dá nuú da cúu gobernador naní Felix cán*

<sup>1</sup> Ta tá sa nayaha uhun quivi já naxinu ɔo da cúu sacuahá nuú jutú, da naní Ananías cán. Naxinu ɔo da ñuu Cesarea xihin java ga na sacuahá ta ndáca da in da ndíquehe sahá na Israel naní da Tértulo. Tóco ndihi na yóho naçatáhan na naçahan na sácú na saha Pablo nuú gobernador cán. <sup>2</sup> Ta tá nandihi já naçahan quehe na Pablo já naxinu da nuú ndihi na cán. Anda já naçasáhá Tértulo cán sácú da saha Pablo já naçachi da já:

—Ndíquiahva nde ndixahvi nu ndó, tá gobernador jáchi sahá ña ndíchí jini ndó cúu ndáa vaha ndó ndehe. Ta ɔo tandóhó tañu nde ta tóco ndihi nde ndúu táji nde. <sup>3</sup> Ñayivi ndúu ndijáá ñuu ín toni ñúhú na xihin ndo ta ndíquiahva na ndixahvi nu ndo, tá Felix jáchi cája cuahá ndó ñamaní xihin nde. <sup>4</sup> Ta viti ɔo cúni nde jáquihvi nde ndohó

joo caja ndó ñamanj cuni joho loho ndó ña cúnj nde çahan nde xihjn ndo yóho. <sup>5</sup> Candehé ndo, tá Felix. Nanditahan nde da naní Pablo yóho xíca nuu da jáquihvi da ñayivi. Ta níi cúu xíca nuu da sáhndá java táhan da ñayivi naquixi chichi Israel. Ta mé Pablo yóho cúu dá jinj nuú in táhndá ñayivi, na naní nazarenos. <sup>6</sup> Ta jivi mé da yóho nanducú da jáyuxu da veñuhu cáhnu nde ndáçan ñuu Jerusalén cán. Sahá ña cán queá natiin nde da ta nanducú nde caja vií nde saha dá tá quiahva sáhndá ley mé nde caja nde. <sup>7</sup> Joo da cúu jefe soldado, da naní Lisias cán naquihvi da tañu nde ta xihjn ña tóyíi naçandaa da Pablo ndahá nde. <sup>8</sup> Ta naçachi da xihjn nde ña ná quixi nde çahan cuachí nde nu mé ndó saha Pablo. Ta viti, tá Felix cuu ndaçá tuhún ndó Pablo jan ta já nahma mé va da nu ndo. Ta xihjn ña yóho cuu candaá ini ndó ña ndaa çahan nde sácú nde saha dá nu ndo — naçachi Tértulo cán xihjn Felix.

<sup>9</sup> Ta jári na Israel ndúu cán naçachi na ña jivi ndusa ña ndaa queá. <sup>10</sup> Anda já nandiñehe gobernador cán ndáha dá ña ná çahan Pablo. Ta já cáchí Pablo já:

—Cájjj ini i ndiquehe e sahá i nu mé ndó, tá Felix jáchj sa cuahá cuia cája vií ndó sahá ñayivi Israel. <sup>11</sup> Tá ná ndaçá tuhún ndó ñayivi yóho já candaá ini ndó ña sa ín uxu ivi quivi naxinu coo i ñuu Jerusalén caja cáhnu i Ndióxi. <sup>12</sup> Ta ni in tuhún toho ñayivi co ndítuhún ihvi yehe xihjn. Ta ni in tuhún toho ñayivi coo najándinihi i veñuhu cáhnu ndáçan Jerusalén cán. Ta ni na táca veñuhu válí ta ni na táca cáyé ñuu Jerusalén cán coo najándinihi i. <sup>13</sup> Ta na jácojo cuachi jatá i yóho a cúu caja na

naḥa na nu mé ndó ña ndaa cáhan na sahá i. <sup>14</sup> Ña cúnj ndusa i caxi tuhun i xihín ndihi ndó queá cája cáhnu i Ndióxi, mé a naçaja cáhnu tásáhnú jícó i tá quiahva najánaha Jesús caja í. Vatí cáchí na Israel yóho ña co xíca i íchi ña ndaa. Joo cándúsa i tóco ndihi ley naçahyí Moisés ta cándúsa i ña naçahyí na profeta sanahá. <sup>15</sup> Ta tá quiahva cándúsa na yóho quiahva já cándúsa ri yehe va jáchi cándúsa nde ña vaxi quiví nditacu tóco ndihi na sa naxihí. Coó caja toho á cúu ná na vaha á na quini. <sup>16</sup> Sahá ña cán queá xínj Ndióxi ña ndijáá ní quiví cája i ña vaha xihín ndinuhu ini i nu mé á xihín nuú ñayivi.

<sup>17</sup> Sa ín chá cuiã naxica nuu i java ga ñuu. Anda jáví nandicó coo tucu u ñuu Jerusalén ña quiahva i jiuhún nuú na Israel ta joco i nu Ndióxi ña ndítahan nuú i joco i nu á. <sup>18</sup> Ta nani cája i mé ña yóho ndácaan i veñuhu cáhnu Jerusalén cán já java da Israel, da naquixi chí estado Asia cán naxini da yehe nu ndácaan i ve ñuhu cán. Ta tá nandihí nandaja vií i mí i tá quiahva sáhdá ley cája nde, coó ñayivi cuaha nasanduu cán ta ni in túhún toho na cán coó najándinihi i. <sup>19</sup> Ta na naquixi chí Asia cán, na cán va cúu na ndítahan cacu sahá i nu ndo, tá Felix tá ín a ndóho na xihín i. <sup>20</sup> Joo na ndúu yóho coó saha toho na cacu na sahá i nu mé ndó. Á tá coó ná cahan na tá nandiñehe ná cuachi i tá naçaja vií na sahá i nuú na sacuaha nuú na Israel cán, dá já. <sup>21</sup> In túhún ña naçaja i tá cája vií na yóho sahá i queá naçayuhú u ta naçachi i: “Cája vií ndó sahá i sahá ña cándúsa i ña vaxi quiví nditacu tucu ndí”, ña cán cúu ndihi va naçachi i xihín ná —naçachi Pablo cán xihín da cúu gobernador cán.

<sup>22</sup> Sa xínj vaha Felix cán ndaja ín ña jánaha na

cúu cuéntá Jesús cán sahá ña cán quéa cúní da candati tóo da caja vií da saha Pablo. Sahá ña cán quéa já nacachi da já xihín na Israel cán:

—Candati ndó janda quiahva ná casaa da naní Lisias, da cúu jefe soldado ñuu Jerusalén já cuu caja vií i sahá da yóho —nacachi Felix.

<sup>23</sup> Tá nandihí já nasahnda Felix chuun nuú da sáhdá chuun nuú soldado cán ña ná chicao tucu na Pablo vecaa. Ta nasahnda da chuun ña ná caja vaha da xihín Pablo ta ná quiahva da ñamani nuú na xica xihín Pablo coto nihni na da ña ná caja ndíví na nu dá.

<sup>24</sup> Tá nayaha chá quiví já nacasaa tucu Felix cán xihín Drusila, ñájihí da, ña cúu ña Israel. Nacana tucu Felix Pablo ña ná quixi da ta ná ndicani da nu ná ndá quiahva caja na ndiquehe na íchi cuéntá Jesús. <sup>25</sup> Ta nandicani Pablo nu ná ña ndítahan nu ná caja na ña ndaa cuití va ta ndítahan nu ná cahnu na nuú ña xica ini yiquí cuñu na caja. Ta nandicani Pablo nu ná ña vaxi quiví caja vií Ndióxi sahá cuachi ñayivi. Anda já nayihví Felix cán já nacachi da já xihín Pablo:

—Cuáhán viti. Tá núna nuú i já cana tucu u yohó quisún —nacachi Felix xihín Pablo.

<sup>26</sup> Mé Felix yóho ndáti da quiahva Pablo jiuhún nu dá já janí ñahá da. Sahá ña cán quéa cuahá ndivaha tañu nacana da da ndituhún da xihín dá. <sup>27</sup> Ta tixi ivi cuia já cuití nacaja da xihín Pablo janda quiahva nandicojo da naní Porcio Festo chuun cacuu da gobernador saá cán. Ta mé Felix cán coó naxeen da janí da Pablo jáchi cúní da candoo vaha da nuú na Israel cán.

## 25

*Ndíquehe Pablo saha mé dá nuú gobernador Festo*

<sup>1</sup> Tá sa nayaha uní quiví nandicojo Festo chuun cúú dá gobernador já naquee da ñuu Cesarea cán nasahan da chí ñuu Jerusalén. <sup>2</sup> Ta tá naxinu coo da cán nasahan na sacuaḥa nuú jutú xihín java ga na Israel, na ín chága saha caḥan cuachi na saha Pablo nu Festo. <sup>3</sup> Ta ñamaní cáhnu naxica na nu dá quea ña ná cahnda da chuun ná quixi Pablo chí ñuu Jerusalén yóho. Jáchi mé na cán nasacu ini na tiin na Pablo íchi cahní na da. <sup>4</sup> Joo coo nacandúsa Festo caja da ña cúní na sahá ña cán quea nacachi da xihín ná ña ndáá vaḥa na Pablo ñuu Cesarea cán. Ta sahá ña sácú ini da cuhun yachi da mé cán <sup>5</sup> sahá ña cán quea nacachi da xihín ná já:

—Ndá na cúú na sacuaḥa nu ndó jan xíní ñúhú cuhun na ñuu Cesarea xihín i já ná cuu cacu na saha Pablo tá ín cuachi nacaja da —nacachi Festo xihín na Israel cán.

<sup>6</sup> Ta nasahin Festo tátuhun una á uxu quiví cuití va ñuu Jerusalén cán já nandicó coo tucu da chí ñuu Cesarea. Ta inga quiví itaan já nasacoo da nu silleta nu sácoo na caja vií sahá ñayivi. Andá já nasahnda da chuun ña ná cana na Pablo quixi da nu dá. <sup>7</sup> Ta tá naxinu coo Pablo nu Festo cán já tóco ndihi na Israel, na naquixi ñuu Jerusalén cán nacava nuu na jata Pablo já nacasáhá jácojo cuḥa ná cuachi ndeé jata dá. Joo coo ñeḥe ná ndaja naha na nu Festo cán ña caḥan na ña ndaa saha dá. <sup>8</sup> Ta nacasáhá Pablo ndíquehe da saha mé dá já nacachi da já:

—Ni in túhún toho cuachi coó ñacaja i xihín ley na Israel ta ni xihín veñuhu cáhnu coó ñacaja i cuachi. Ta ni nuú da cómí cuéntá sahá ñuu Roma coó ñacaja i cuachi —ñacachi Pablo xihín tóco ndihi ñayivi ndúu cán.

<sup>9</sup> Ta sahá ña cúní Festo candoo vaha da nuú na Israel sahá ña cán quéa nandacá tuhún da Pablo já ñacachi da já:

—Á cándúsún cuhún ñuu Jerusalén já ná caja vií i sahun cán —ñacachi da xihín Pablo.

<sup>10</sup> Anda já nanducú ñehe Pablo tuhun nu dá já ñacachi da já:

—Uhun. Coó saha cúu á cuhun i ñuu Jerusalén jáchi viti ñuhú cándichi i nu mé ndó ta cúu ndó gobernador romano. Ta mé ndó ndítahan nuu caja vií sahá i jáchi sa cánda cáxí ini ndó ña coó cuachi toho ñacaja i xihín na Israel jan. <sup>11</sup> Joo tá ñacaja ndusa i cuachi, mé a ndaa co yíhví toho i quivi i sahá cuachi i. Joo a juú toho ña ndaa cúu tóco ndihi cuachi jíquí jácojo na Israel jan jatá i sahá ña cán quéa co ndítahan nu ndó ndiquiahva ndó yehe nuú na yóho. Ta viti xíca i ñamaní nu ndo ña ná chindahá ndó yehe ná cuhun i nuú emperador ñuu Roma ná caja vií mé dá sahá i —ñacachi Pablo xihín Festo cán.

<sup>12</sup> Tá nandihí já nandituhún Festo cán xihín na sacuahá cája chúun nu dá cán ndaja ndítahan coo caja da. Anda já ñacachi tucu Festo cán já xihín Pablo:

—Vaha dá já. Nu emperador ín ñuu Roma ñacachún cuhun cúnun. Ta cán cuhun cavií sahun —ñacachi Festo xihín Pablo.

*Tá ín Pablo nu rey Agripa*

<sup>13</sup> Tá nayaha chá quiví já naxinu coo in rey naní Agripa xihín ñá naní Berenice ñuu Cesarea cán coto nihni na Festo. <sup>14</sup> Ta nasanduu na chá quiví xihín Festo cán. Ta nani ndúu na cán nandicani Festo nu rey Agripa ndaja cáa ña ndóho Pablo já nacachi da já xihín dá:

—Ini vechúun yóho ndácaan in da naní Pablo ta anda tá nasacuu Felix gobernador já natiin na da. <sup>15</sup> Ta tá nasahan i ñuu Jerusalén já sácú na sacuahá nuú jutú xihín na sacuahá nuú na Israel saha dá ña ná quiví da caja i. <sup>16</sup> Anda já nanducú ñehe e tuhun nu ná ña co sahan ley ñuu Roma ñamaní ña cahní na ñayivi tá coo na sácú saha dá ndíta nu táhyí da já ná cuu ndiquehe da saha dá nu ná. <sup>17</sup> Saha ña cán quea tá nandai cuu na Israel cán ñuu Cesarea yóho já nandihí ini i já nasahan i nasacoo i inga quiví itaan nu sacoo na caja vií sahá ñayivi. Já nasahnda i chuun ña ná cañehe na Pablo quixi da nuú i. <sup>18</sup> Tá naxinu coo na cán sácú na saha dá coo nasacu na cuachi cáhnu saha dá tá quiahva cáhán i. <sup>19</sup> Joo cáhí na ña co cúni da candúsa da tá quiahva cándúsa mé ná. Ta sácú na saha dá jáchi xíca da jánaha dá saha Jesús, mé a naxihí jihna. Joo jánaha Pablo ña tácu yí va mé Jesús. <sup>20</sup> Ta sahá ña co cándaa ini i ndaja caja i caja vií i sahá ña yóho sahá ña cán quea nandaca tuhún i Pablo ña á cándúsa da cuhun da ñuu Jerusalén caja vií i saha dá. <sup>21</sup> Joo nacachi da xihín i ña cúni da cavií saha dá nuú da cúu emperador naní Augusto, da íin ñuu Roma cán. Saha ña cán quea nasahnda i chuun ña ná candaa vaha na da janda quiahva ná cuu chindahá i da nuú emperador já ná caja vií da cán saha dá — nacachi Festo xihín rey Agripa cán.



<sup>22</sup> Anda já nacachi rey Agripa cán já xih̄in Festo:  
—Cúni ri yehe va cuni joh̄o i ndá quiahva cáhan da naní Pablo jan —cáchi Agripa.

Anda já nacachi Festo já xih̄in dá:

—Itaan já cuni joh̄ún nuú cáhan da —cáchi Festo.

<sup>23</sup> Ta inga quiví itaan nax̄inu coo rey Agripa xih̄in Berenice nu íin Festo cán. Ta ndíxi vāha ndivaha na nandihvi na xih̄in in yíco da cúu sacuah̄a nu soldado xih̄in nataa íin sahāa ñuu cán. Ta tá nasanduu na já nasahnda Festo chuun ña ná cuh̄un na quehe na Pablo. <sup>24</sup> Ta tá nasaa da nu ná já nacachi Festo já:

—Mé ndó, rey Agripa xih̄in ndihi ndó, na nataca ndúu xih̄in nde yóho. Candehé ndó da naní Pablo cándichi yóho. Cuah̄a ndivaha táhan na Israel, na ndúu ñuu Jerusalén xih̄in na ndúu ñuu Cesarea yóho sácú na sahāa dá nuú i. Ta a juú quiahva ndúcú ndéé na cáhan na ña ndítahan quivi da caja i. <sup>25</sup> Joo yehe cáhán i ña co ndítahan toho nu dá quivi da jáchi coo cuachi cáhnu ná caja da. Ta sahá ña nax̄ica mé dá cavií sahāa dá nuú emperador Augusto íin ñuu Roma cán sahá ña cán quea sácú ini i chindahá i da cuh̄un da cán cavií sahāa dá. <sup>26</sup> Joo co xini ndía cahyí i nuú da cúu emperador ñuu Roma sahá cuachi sácú na sahāa dá. Sahá ña cán quea nasani ndichi i da nuú ndihi ndó xih̄in nu mé ndó rey Agripa já ná ndaja ndichi ndó da já ná ñehe ín i ndaa cahyí i nu carta chindahá i nu emperador ñuu Roma cán. <sup>27</sup> Jáchi coo sahāa cúu á chindahá i da ñuu Roma tá a cuú cahyí i ndá cuachi jácojo na jata dá —nacachi Festo xih̄in na cán.

## 26

### *Ndíquehe Pablo saha mé dá nu rey Agripa*

<sup>1</sup> Andá já nacachi rey Agripa cán já xihin Pablo:  
—Viti va sahan nde ñamaní nuun ndiquehún sahan.

Andá já nandiñehe Pablo ndáha da já nacasáhá cáhí da já:

<sup>2</sup>—Cájií íní i ña cuu ndiquehe e saha mí i nu ndó, rey Agripa jáchi a juú quiahva cuahá cuachi jíquí jácojo na Israel jatá i. <sup>3</sup> Cájií íní i cáhan i nu mé ndó, rey Agripa jáchi cándaá vaha ini ndó ndaja ín costumbre na Israel. Ta cándaá ini ndó ndá ñaha quéa ndítuhún táhan nde saha. Saha ña cán quéa xíca tahví i nu ndó ña ná caja ndó ñamaní cáhnu coo ini ndó cuni johó ndó ña cahan i xihin ndo yóho.

<sup>4</sup> Tóco ndihi na Israel xíni vaha na ña nacaja i tá nasacuu u da tacú. Ta anda viti xíni na yehe ta xíni na ña nacaja i ñuu i xihín ñuu Jerusalén. <sup>5</sup> Ta xíni vaha na ña janda yúta i nasacuu u ta fariseo ta chí cuu ndicani na nu mé ndó tá cuni na. Ta ndehe, na fariseo cúu nde na cája ley Moisés xihín ndinuhu chága ini nde a juú ga inga na. <sup>6</sup> Ta sahá ña cándeé cáhnu ini i ña vaxi quiví jánditacu tucu Ndióxi tóco ndihi na naxihí sahá ña cán quéa na Israel yóho ñehe na yehe nacasaá na caja vií na sahá i nu mé ndó. Ta mé Ndióxi quéa nasahan tuhun a nu tásáhnu jícó nde ña nditacu tucu ndii. <sup>7</sup> Tóco ndihi ñayivi táhan na naquixi chichi ndíhuxu ivi jahyi Israel cán ndáti na cuni na nuú jáxinu coo Ndióxi nuú tuhun a. Saha ña cán quéa ñuu ta ndiví cája cáhnu na Ndióxi. Candehé ndo, rey Agripa. Saha

ñá cándúsa i tá quiahva cándúsa na cán sahá ña cán quéa jácojo na Israel cuachi jatá i viti —ñacachi Pablo xihín rey Agripa.

<sup>8</sup> Anda já ñacahan Pablo xihín na Israel ndúu cán já:

—Á mé a ndaa cándúsa ndó ña cuu caja Ndióxi ña nditacu tucu ndii —ñacachi Pablo xihín na Israel ndúu cán.

<sup>9</sup> Anda já ñacachi tucu Pablo xihín rey Agripa já:

—Yehe ñacahan i jihna ña ndítahan caja xíxi i xihín na cúu cuénta Jesús, mé a ñaquixi ñuu Nazaret. <sup>10</sup> Sahá ña cán quéa já ñacaja i ñuu Jerusalén jihna. Ta ñasahan i ñaxica i ñamaní nuú na sacuaña nuú jutú já ná quiahva na ñamaní nuú i caja i ña yóho. Ta tá ñañehé e ñamaní já ñataán cuahá i na cúu cuénta Jesús vecaa. Ta tá ñasahní ñahá na, cájii ini i sahá ña cája na já xihín ná. <sup>11</sup> Ta cuahá tañu ñacaja xíxi i xihín ná ña ná çahan ihvi na saha Jesús, mé a cándeé ini na. Níí cúu veñuhu ñaxica nuu i cája i já xihín ná. Ta janda ñuu tóho ñasahan i ñandicuita ñee e na jáchi ñasaxojo ndivaha ini i xihín ná.

*Ndicani Pablo ndaja ñandihvi da íchi cuénta Jesús (Hch. 9:1-19; 22:6-16)*

<sup>12</sup> In tañu ñañehé e ñamaní nuú na cúu sacuaña nuú jutú ñuu Jerusalén ña ná cuhun i ñuu Damasco taán i na cúu cuénta Jesús vecaa. Sahá ña cán quéa ñaquee e cuahan i. <sup>13</sup> Candehé ndó, rey Agripa. Nani xica i cuahan i íchi cán cúu á tátuhun çaxivi já ñaxini i ñandiyihvi ndaa in ñúhu indivi ta yéhe chága ña a juú ga çandii. Ta ñacava nuu a jatá i xihín jatá da çasahan xihín i cán. <sup>14</sup> Anda já

naçuyu ndihi nde nu ñúhu ta já naxini johu nde in a cáhan tuhun hebreo já naçachi a já xihín i: “Saulo, Saulo ndá cuéntá quéa ndícuítún cája xísún xihín i. Candehé. Cája xísún xihín mé vún. Ña cájun xihín i cúú á tátuhun ña cája tindiçui tá sání ndaa rí nu poyá”, naçachi a cán xihín i. <sup>15</sup> Anda já naçasáhá ndáca tuhún i já cáçhi i já: “Yo cúú mé ndó cáhan xihín i.” Anda já nanducú ñehe a cán tuhun nuú i já naçachi a já: “Yehe cúú Jesús, mé a xíca nuún cája xísún xihín. <sup>16</sup> Ta viti cuáhán ndaço, candichi. Nanaña i mí i nuun já ná caja chúún cuéntá mí i viti já ná ndicanún nuú ñayivi ndaja cáa ña naxinún viti ta já ná ndicanún nu ná java ga ñaha jánaña i nuun chága chí nu. <sup>17</sup> Mí i jáçacu u yohó já ná a cáhni na Israel yohó ni na tóho a cáhni na yohó jáçhi nu mé na tóho cán chindahá i yohó çuhún çahun sahá i viti. <sup>18</sup> Ta jánañún nu ná ndaja caja na jándicoo na íçhi naá ndivaña nu xíca na viti. Jáçhi ndítahan nu ná ndicaca na íçhi mí i nu yehe ndivaña. Ta jánañún nu ná ña ná a ndíquiahva ga na mé ná ndahá tiñáhá saçuaha. Ña ndítahan caja na quéa ndiquiahva na mé ná ndáha Ndióxi ta ná caja na ña cúní mé á. Ta ndítahan candeeé ini na yehe já ná caja cáhnu ini i sahá cuaçhi na. Ta já ná cuu in nduu na xihín na naçaxi i ñehe táhvi ña cúní Ndióxi quiahva nu na”, naçachi Jesús xihín i tá nañahan i íçhi ñuu Damasco.

### *Ndicani Pablo sahá chuun cája da*

<sup>19</sup> Candehé ndó, rey Agripa. Coó naçaja sáa ini i. Jáçhi naçaja i tá ín nañahnda Jesús nuú i caja i. <sup>20</sup> Sahá ña cán quéa ivi laá naçasáhá cáhan i tuhun vaña saña Jesús nuú ñayivi ñuu Damasco cán. Tá

nandihí já naqúee e nasahan i cahan i ña xihín na ndúu ñuu Jerusalén xihín na ndúu ndijáá ñuu estado Judea. Ta janda xihín na coó naquixi chichi Israel nacahan i saha Jesús. Ta nacachi i xihín ná ña ndítahan nu ná jándacoo na ña núu cája na ta ná ndicó coo na nu Ndióxi. Ta ndítahan caja na ña vaha já ná nahá ña mé a ndaa táhyí nandiquehe na íchi cuéntá Jesús. <sup>21</sup> Ta sahá ña yóho cuití natiin na Israel yehe nani ndácaan i veñuhu cáhnu ñuu Jerusalén ta viti ndúcú na cahní na yehe. <sup>22</sup> Joo Ndióxi nachindee a yehe sahá ña cán queá coó najándihí na sahá i. Ta anda viti xíca nuu i cahan i tuhun Ndióxi nuú ñayivi ta coó caja toho a á cúu ná na ndahví á cúu ná na ín cuahá saha. Ta tóco ndihí ña jánahá i nu ná co cúu á ña quíxi jini mí i jáchi cúu á ña nacachi na profeta xihín ña nacachi Moisés coo. <sup>23</sup> Ta ña nacachi na cán queá vaxi quivi quixi Jesucristo ñuyívi yóho ta a juú quiahva jándoho na ini a. Ta cahní na ña ta tá nandihí jánditacu tucu a. Ta mé á cacuu ña nu cuití nditacu nuú tóco ndihí na sa naxihí. Ta mé á jánahá nuú ñayivi ndaja cuu cacu ndaa ínimá ná coó caja toho a á cúu ná na Israel á cúu ná na tóho —nacachi Pablo xihín rey Agripa cán.

*Cúni Pablo ná ndihvi Agripa íchi cuéntá Jesús*

<sup>24</sup> Tá nacatáji loho Pablo nu cahan da já nacayúhú cóhó Festo nu dá já cáchi da já:

—Nacatachi vún, Pablo. Nayaha ndivaha quiahva najácuahún sahá ña cán queá nacatachun —nacachi Festo cán xihín Pablo.

<sup>25</sup> Anda já nacachi Pablo já xihín dá:

—Coó ñacatachi toho i, tá Festo jáchi ndinuhu ña ndaa cáhan i xihin ndo. <sup>26</sup> Ta xini vaha mé rey Agripa yóho ña cáhan i ña ndaa. Ta co yíhví cahan i nu dá jáchi cándaa ini i ña xini vaha mé dá ndá saha cáhan i jáchi co cúu á ñaha nayaha nuú jehé. <sup>27</sup> Ta viti cachi ndó xihin i, rey Agripa á cándúsa ndó ña ñacahan na profeta sanahá. Cája i cuéntá cándúsa ndó ña ñacachi na —ñacachi Pablo.

<sup>28</sup> Anda já nanducú ñehe rey Agripa cán tuhun já ñacachi da xihin Pablo:

—Ja lóho cuití ta cavún jiní i ña ná nduu u cuéntá Jesús, nduu —ñacachi rey Agripa.

<sup>29</sup> Anda já ñacachi Pablo já xihin dá:

—Á yachi á cuee coó caja toho a. Ña xica tahví i nu Ndióxi quéa ná xinu coo mé ndó, rey Agripa xihin tóco ndihi na ndúu yóho cacuu ndó tátuhun mí i jáchi cándeé cáhnu ini i Jesús vatí mé a ndaa co cúni ña ná candico ndáha ndo tátuhun yehe —ñacachi Pablo xihin dá.

<sup>30</sup> Tá nandihí ñacahan Pablo já nandaça ndichi rey Agripa cán xihin Berenice ta nandaça ndichi Festo xihin java ga na nasanduu coo xihin dá cán.

<sup>31</sup> Já ñatavá táhan na ndítuhún na saha Pablo já cáchi xihin táhan na já:

—Co ndítahan toho nuú da yóho quivi da jáchi coó cuachi ndeé ná caja da ta janda ni vecaa co ndítahan ndacaan da —cáchi na.

<sup>32</sup> Anda já ñacachi rey Agripa cán já xihin Festo:

—Tá ná a cáhan da yóho ña cúni da cavií saha dá nuú da cúu emperador ñuu Roma ta cuu janí vún da, nduu —ñacachi Agripa cán xihin Festo.

## 27

*Chíndahá na Pablo ñuu Roma*

<sup>1</sup> Tá nasacu ini na chindahá na Pablo ná cūhun da chí nación Italia nu ndácaan ñuu Roma cavíi saha dá já nandiquiahva na da xihín java ga da ndácaan veca can nuú da naní Julio, da sáhdá chuun nu soldado cuéntá Roma. Mé Julio yóho cúú dá da cómi cuéntá sahá in táhdá soldado naní Augusto. Ta tañu na cūhun xihín Pablo can cuahan ri yehe, da naní Lucas. <sup>2</sup> Ta tañu nde can cuahan ri da naní Aristarco, da ñuu Tesalónica, ña ndácaan estado Macedonia. Nandaa nde ini barco, dó naquixi chí Adramitio. Mé barco yóho cúú dó cūhun ndijáá ñuu válí ñúhu estado Asia can. Cándójó nde barco can cuahan nde. <sup>3</sup> Ta inga quiví itaan naxinu coo nde ñuu Sidón. Ta can nacija vaha da naní Julio can xihín Pablo jáchi nasahan da ñamani nu Pablo ña ná coto nihni da na xini táhan xihín dá ndúu ñuu Sidón can já ná caja ndívi na nu dá. <sup>4</sup> Ta inga quiví itaan já nandihvi tucu nde barco já naquee nde ñuu Sidón can. Ta sahá ña vaxi tachí xoo nuú cūhun barco can sahá ña can quéa nayaha nde xoo íti isla Chipre jáchi co xícó cuahá tachí can. <sup>5</sup> Naxojo cava nde anda inga xoo tañuhú ta já nayaha nde in xoo estado Cilicia xihín estado Panfilia. Anda já naxinu coo nde ñuu Mira ndácaan estado Licia.

<sup>6</sup> Mé ñuu Mira can nandiñehé da sáhdá chuun nu soldado can in barco, dó naquixi chí Alejandría ta cūhun do chí Italia. Ta najánda da ndehe jata dó can já naquee tucu nde cuahan nde. <sup>7</sup> Cuéé vaha va cuahan nde ta nandoho chá ini nde cuahan nde sahá ña can quéa cuahá quiví nacija nde janda

quiahva naxinu coo nde ñuu Gnido. Ta sahá ña xícó ndivaha tachí xoo nuú cuhun nde cán sahá ña cán quéa nandijama nde nuú cuhun nde. Ta já nayaha nde inga xoo isla Creta nuú nayaha nde ñuu Salmón. <sup>8</sup> Cuéé ndivaha cuahan nde já yáha nde yati yuhú tañuhú isla Creta cán. Anda jávi naxinu coo nde nuú coo vaha barco naní Puerto Vaha yati ñuu Lasea.

<sup>9</sup> Sa nayaha cuahá quivi ta nacacuáchi nde. Ta iyó ndivaha cáa cuhun nde xihin barco jáchi nacayati tiempo vixi. Sahá ña cán quéa nacahan Pablo xihin ndihi na cán já cáchí da já xihin ná:

<sup>10</sup> —Candehé ndo. Cája i cuénta iyó ndivaha cáa coho xihin barco jáchi cuu ndihi saha barco xihin ña ndójo dó cuahan do. Ta janda mí cuu quivi — nacachi Pablo xihin ná.

<sup>11</sup> Joo coó naxeen da sáhdá chuun nuú soldado cán cuni joho da nu cahan Pablo. Nacandúsa chága da nuú nacahan da ñéhe barco xihin da xíñaha barco a juú ga nuú nacahan Pablo. <sup>12</sup> Ña nacachi na quéa a cuú candoo na yóho tiempo vixi jáchi xícó ndivaha tachí. Ta tóco ndihi na nacachi na ña vaha chága ná cuhun nde. Tiahva naá jana quee vaha nde xinu coo nde janda ñuu Fenice cáhan na. Mé ñuu Fenice cán ndácaan isla Creta ta co xícó ndeé nahá tachí cán. Sahá ña cán quéa nasacu ini na canduu na cán tiempo vixi.

### *Tá naxicó ndivaha tachí nuú tañuhú*

<sup>13</sup> Tá nandihí já nacasáhá vitá uun xícó tachí sahá ña cán quéa nacahan na ña cuu va quee nde cuhun nde. Anda já nacquee nde cuahan nde yati yuhú isla Creta cán xíca nde cuahan nde. <sup>14</sup> Joo



tá nandihí já naxinu tachi ndeé jata barco. Mé tachi ndeé cán vaxi a chí xoo norte xihin chí nu cána candii. <sup>15</sup> Ta nacasáhá ñúhu mé tachi ndeé cán barco cuahan do. Ta sahá ña coó nacuu caja nde jándicaca nde barco cán xoo nuú vaxi tachi sahá ña cán quéa nasahan nde ñamani ña ná cañehe a barco cuhun do tá quiahva cúni tachi. <sup>16</sup> Tá nandihí já nayaha nde jata in isla loho naní Clauda. Ta mé cán coó naxicó nahá tachi ndeé. Anda já nacasáhá nde jándaa nde lancha loho, dó jítá barco cáhnu cán. Joo nandoho chá ini nde já nacuu najánda nde do jata barco cáhnu cán. <sup>17</sup> Tá nandihí já nacava nuu na rieta jata mé barco cáhnu já ná coo tóyí do. Tá nandihí já najánuu na jáhma cáhnu sándaca barco cán ña ná cañehe mé tachi do. Nacaja na ña yóho jáchi yíhvi na xinu coo barco xoo naní Sirte nu yáji tañuhú ta cán cuu cachihin dó ñutí. <sup>18</sup> Ta chí coó nasacuiin tachi ndeé nahá cán inga quiví itaan sahá ña cán quéa nacasáhá na jácana nihni na ñaha ndójo barco cán ini tañuhú já ná ndicama dó. <sup>19</sup> Ta tá naxinu quiví uní janda mé nde viti nacasáhá nde jácana nde ña sácaja chúun barco cán ini tañuhú já ná ndicama chága do. <sup>20</sup> Ta tixi cuahá ndivaha quiví coó naxini nde nuú candii ta ni quimi co tívi. Ta javí nacuun quini ndivaha dó ta a juú quiahva naxicó ndivaha tachi. Sahá ña cán quéa chí nasahnda vaha ini nde: “Yóho quiví viti”, nacañán nde.

<sup>21</sup> Cuahá ndivaha quiví nayaha ta ni in nde co cúni cuxu. Sahá ña cán nandaça ndichi Pablo tañu tóco ndihí na cán já nacasáhá cáhí da já:

—Tá ná coo johó ndó tá nacañan i xihin ndo ta ná candoo í ñuu Creta, nduu. Ta ni a ndóho í

ñā ndóho í yóho viti ta ni a tíví toho ndihi ñaha nasandojo barco yóho, nduu. Joo coo naxeen ndó candúsa ndó ñā naçahan i xihin ndo. <sup>22</sup> Joo cáchí i xihin ndó viti ñā co ndítahan ndicani ini ndó. Jáchi ni in túhún toho ndó a quíví vatí mé barco ndihi saha do. <sup>23</sup> Jáchi yehe cúú u cuéntá Ndióxi ta cája cáhnu i mé á. Ta mé ñuu janda véhe nanaha in tátō Ndióxi mé á nuú i. <sup>24</sup> Ta já naçachi a já xihín i: “A cáyihví tohún, Pablo. Jáchi ndítahan xinun tá xinun nuú da cúú emperador ñuu Roma cán. Ta saha yóhó jáçacu ri Ndióxi tóco ndihi na ñúhu xuhun ini barco jan já ná a quíví na ini tañuhú”, já naçachi tátō Ndióxi xihín i. <sup>25</sup> Saha ñā cán quéa a ndicani ga ini ndó jáchi cándéé cáhnu ini i Ndióxi ta cándaçá cáxí ini i ñā coo tá in naçachi tátō Ndióxi xihín i. <sup>26</sup> Joo in tachí ndeé caja ñā ná tiví barco yóho yati in isla —naçachi Pablo xihín na cán.

<sup>27</sup> Sa naxinu sahun quivi xíca nde ini barco cán cuahan nde. Ta in ñuu naxinu coo nde in xoo tañuhú naní Adria. Joo tá xoo johó tá xoo cáa ñéhe tachí nde cuahan nde. Joo tátuhun java ñuu já naxini da ñéhe barco cán ñā cáyati nde yuhú tañuhú cuahan nde. <sup>28</sup> Anda já naçasáhá chíquiahvá na ndá quiahva cúná tañuhú yati yúhu nu ndúu nde cán. Ta quiahva cúná do nasacuu oco sahun in metro. Tá naçasáhá cáyati chága barco yúhu cán já naçiquiahva tucu na. Ta cán sa yáji chága ta cúú á oco usa metro quiahva cúná a. <sup>29</sup> Ta saha ñā yíhví na xinú coo barco cani ndaa dó tótō ñúhu yati cán saha ñā cán quéa natiin na rieta ñā ndíco comí çaa gáncho cáhnu nu cán. Ta najácana na ñā ini tañuhú chí xoo cáha mé barco cán já ná

tiin a barco ná a cáca ga dó cuhūn do chí nuu. Ta a juú quiahva yíhvī nā ndāti na ná tīvi. <sup>30</sup> Joo ndaja coo java da cája chúun xihīn barco cán naçahán da quee jehé da xihīn lancha loho cán cuhūn da. Sahá ña cán quéa naçasáhá da ndáxí da lancha loho cán ña jánuu da do nuú tañuhú ta já cuhūn da, cáhán da. Ta naçasáhá cája da tátuhun táán chága da çaa gáncho cán ini tañuhú já ná tiin a barco xoo chí nuu do. <sup>31</sup> Joo naçini Pablo ña cája da sahá ña cán quéa naçaxi tuhun da nuú da sahná chuun nuú soldado ta xihīn nuú soldado cán já cáhí da já xihīn ná:

—Tá ná quee da jan cuhūn da já quéa ndihi saha ndó ini tañuhú —naçachi Pablo.

<sup>32</sup> Anda já naçahan soldado cán naçahnda da rieta ndíco lancha loho cán já najándicava da dó ini tañuhú.

<sup>33</sup> Ta tá sa yati tīvi yaa já najáçahan Pablo tóco ndihi nā cán ña ná cuxu na vaṭí loho. Já naçachi da já xihīn ná:

—Sa nayaha sahun quivī co xíxi ndó ta ni co quíji ndo. <sup>34</sup> Sahá ña cán xíca i ñamani nu ndó ña ná cuxu ndó vaṭí chá va. Xíní ñuhú cuxu ndó já ná coo ndéé ndo chindeé ndó mé ndó já ná çacu ndó. Jáçhi çacu ndihí. Ta ni janda in túhún ijí jīni yo a ndihi saha —naçachi Pablo xihīn ná.

<sup>35</sup> Tá nandihī naçachi Pablo ña yóho xihīn ná já natiin da in pan ta nu táhyí ndihī nā cán nandiquiahva da ndixahvi nu Ndióxi. Tá nandihī já naçahnda java da ña ta naçasáhá da xíxi da.

<sup>36</sup> Xihīn ña yóho nandindeé ri ini nā java cán ta naçasáhá nā xíxi na. <sup>37</sup> Ta tóco ndihī nde, nā naçañuhu ini barco cán naçacuu nde ivi ciento unī

jícó saḥun in ñayivi. <sup>38</sup> Tá nandihī naxixi nde ña cúni nde já nasata na trigo ini tañuhú já ná ndicama chága jaṭa barco cán.

*Cáço barco cahá tañuhú*

<sup>39</sup> Joo tá naṭivi yaa já naxini na ñundáhyi. Joo coó naçuu ndicuni da cája chuun xihīn barco cán ndá ñuu cúu á. Ta tá nandihī já naxini na ña ín ñutí nu yáji yuhú tañuhú cán. Anda já naçahán na jácayati na barco yati yúhu cán. <sup>40</sup> Sahá ña cán queá nasahnda na rieta ndíço barco cán já najani dó. Ta naçandoo çaa gáncho ini tañuhú naçaja na. Ta tá nandihī já najánditayi na yitó nuú jahnda ta xihīn yító cán naçasáhá na jándicaca na barco cán nuú tañuhú. Ta najándindita tucu na jahmá cáhnu xoo nu barco cán já ná cuu caca dó xihín taçhi. Ta xihín ña yóho naçasáhá barco cán cáyati dó yuhú tañuhú. <sup>41</sup> Ta in cuití naxinu barco cán nu ndique táhan ivi táhnda tañuhú. Ta sahá ña naçayáji tañuhú nuú ñutí cán sahá ña cán queá naçatiin nuu barco cán. Ta ni loho ga coó naçuu çuhun do. Joo xihín ña quiahva ndeé ndacú cáni ndaa tañuhú cán xoo cáha do sahá ña cán queá naçasáhá cháchi dó. <sup>42</sup> Anda já nanducú soldado cahní ndihī da na çuahan vecaa ñuu Roma cán. Jáçhi tiaḥva náá jítá na çuhun na nuú tañuhú ta cunu na çuhun na tá sa naçqueta na yuhú tañuhú, cáhán na. <sup>43</sup> Joo da sáhnda chuun nuú soldado cán coó nasahan da ñamaní ña ná çaja na já jáçhi cúni da jáçacu da Pablo. Ña naçaja da queá nasahnda da chuun nuú na tiaḥva jítá ticuí ña ná jácana na mé ná ini tañuhú cán já ná xinu na nu ñúhu. <sup>44</sup> Ta na java, na co tiaḥva jítá ticuí cán naçachi da xihīn ná ña ná

ndaá na jata yító á jata túhūn barco cán já ná xinu na nu ñúhu. Anda jáví naxinu coo vaha tóco ndihi nde nu ñúhu.

## 28

### *Ín Pablo isla Malta*

<sup>1</sup> Tá sa naxinu coo vaha ndihi nde yuhú ñundáhyi cán já nacandaa ini nde ña naní a isla Malta. <sup>2</sup> Ta vaha ndivaha nacaja ñayivi ndúu isla cán xihín nde. Nandicahmi na ñúhu jáchi nacasáhá cúun ga javi ta a juú quiahva vixi xini nde. Chí nacahan na xihín nde ña ná cativi nde catúní nde. <sup>3</sup> Anda já najátaca Pablo java titó íchí, dó quee yávi núhu. Ta tá chójó da títo cán nu ñúhu já naqueta in coo tañu títo cán xinu rí sahá ña ihní ñúhu. Ta natiin rí ndáha Pablo. <sup>4</sup> Ta tá naxini na isla Malta cán ña ndícaa coo ndáha Pablo já nacasáhá cáchí xihín táhan na já:

—Ndá da sáhní ndii cúu da yóho jáchi vatí coo naxihi da ini tañuhú joo yóho cuni Ndióxi jándihi a saha dá —nacachi na.

<sup>5</sup> Joo mé Pablo naquiji nihni da coo ndícaa ndáha dá cán nu ñúhu cándaha cán ta coo ña ná ndoho da.

<sup>6</sup> Tóco ndihi na cán ndáti na cuni na ña ná quihvi cuiñu ndáha dá á tá coo ta in cuití ndicava da quivi da, nacahan na. Ndáti na java cán cuni na ndaa ndoho Pablo joo tá sa nacanahá ndáti na coo ñaha ná ndoho toho Pablo cán. Anda já nandijama jini ná ta nacasáhá na cahan na ña cúu dá in ndióri.

<sup>7</sup> Yati nuú naxinu nde cán nasacuu a ñundáhyi da naní Publio, da cómi cuénta saha isla cán. Ta tixi uni quivi nandiquehe vaha ndivaha da ndehe ta vaha nacaja da xihín nde. <sup>8</sup> Ta ndaja coo quihvi tátá Publio cándúhu dá ndóho da cuehe nii ta

chícaan cáhni ñahá. Ta já nasahan Pablo naxito nihni da da ta nacasahá Pablo xíca tahví da nu Ndióxi saha dá ta nachineúu Pablo ndáha dá jini dá ta já nandivaha da. <sup>9</sup> Tá naxini java ga na quíhvi ndúu isla cán ña naja Pablo já naquixi na nu dá ña ná ndaja vaha da na chí nandivaha na. <sup>10</sup> Ta nandiquiahva na ndixahvi nuú nde ta najasá na cuahá ñaha nuú nde. Tá naxinu coo quiví ndaa nde barco cuhun nde já nasahan na ña xini ñuhú nde cuhun nde.

### *Xínu coo Pablo ñuu Roma*

<sup>11</sup> Nasanduu nde tátuhun uní yoo isla cán janda quiahva nandaa nde in barco, dó nasandati yaha tiempo vixi mé isla Malta cán. Mé barco cán naquixi dó chí Alejandría. Ta nuu do cándaa ivi tiniñu yúu ndióxí cája cáhnu na cán. In a naní a Cástor ta inga a naní Pólux. <sup>12</sup> Naquee nde cuahan nde já naxinu nde in ñuu naní Siracusa ta cán nasanduu nde uní quiví. <sup>13</sup> Ta naquee nde cuahan nde yati yuhu tañuhú janda quiahva naxinu coo nde ñuu Regio. Joo inga quiví itaan já nacasahá víi uun xícó tachí chí sur sahá ña cán quéa tá sa nayaha ivi quiví já naxinu nde ñuu Puteoli. <sup>14</sup> Ta cán nanditahan nde java na cúu cuénta Jesús. Ta nacaahan na xihín nde ña ná canduu nde in semana xihin ná ta já naja nde. Ta tá nandihi já naquee nde cuahan sahá nde chí ñuu Roma. <sup>15</sup> Ta na cúu cuénta Jesús ndúu ñuu Roma cán sa nañeñe ná tuhun ña xinu coo nde cán. Saha ña cán quéa naqueta na vaxi na ñeñe ná ndeñe. Java na naquixi janda ñuu nu sahijn yahvi cáhnu naní a Apio ta java na naquixi janda ñuu naní

Uní Taberna. Tá naxini Pablo na cán já nacasáhá ndíquiahva da ndixahvi nu Ndióxi ta nandindacú ini da. <sup>16</sup> Ta tá naxinu coo nde ñuu Roma já nandiquiahva da sáhndá chuun nuú soldado cán tóco ndihi da cuahan vecaa cán nuú in da cómi chuun saha mé vecaa ñuu Roma cán. Joo nasahan na ñamaní nu Pablo coo jíin da vatí nasacu na in soldado ndáá ñahá.

*Cáhan Pablo tuhun Ndióxi xihín na ñuu Roma*

<sup>17</sup> Tá sa naxinu uní quivi naxinu coo nde ñuu Roma cán já nacana Pablo tóco ndihi na sacuaña nuú na Israel ndúu ñuu Roma cán. Ta tá sa nataca ndihi na ndúu na já nacachi da já xihín ná:

—Candehé ndó, ñani i. Ni in túhún toho ñaha núu coó nacaja yehe xihín na Israel mé ñuu Jerusalén cán ta ni xihín costumbre nacaja tásáhnú jícó yo. Joo natiin na Israel yehe ta nandiquiahva na yehe nuú na cúu cuéntá gobierno ñuu Roma yóho. <sup>18</sup> Ta tá nandihí nandaja ndíchí na yehe já nasacu ini na janí na yehe jáchi coó nañehe ná cuachi i sahá ña cuu cahní na yehe. <sup>19</sup> Joo ndaja coo na Israel coó naxeen na ña ná janí na cán yehe. Sahá ña cán quéa naxica i ñamaní ña ná cavií sahá i nu emperador ñuu Roma yóho. Joo yehe co cuni toho i jácojo i cuachi jatá na Israel jáchi cúu ná na naquixi chichi nuú naquixi mí i. <sup>20</sup> Sahá ña cán quéa nacana i ndohó viti jáchi cuni cuni i ndohó já ná nditúhún i xihín ndo. Cuni ndicani i nu ndo ña ndíco ndáha i xihín cadena yóho sahá mé a nachindahá Ndióxi jácaacu a ndihi yó, na Israel —nacachi Pablo xihín na Israel cán.

<sup>21</sup> Anda já nanducú ñehe na cán tuhun nu Pablo já cáchi na já xihín dá:

—A ñaha quixi carta estado Judea nuú nde ña cáhan sahá ña cájun. Ta ni na cúu táhan na Israel tá nandai cuu na ñuu yóho coó toho tuhun núu ñéhe na ná casaá na nuú nde sahá yóhó. <sup>22</sup> Joo cúni nde ña ná ndicanún nuú nde ndía cándúsún jáchi ní cúu ñuyívi cáhan núu ñayivi sahá na cúu cuénta Jesús —nacachi na Israel cán xihin Pablo.

<sup>23</sup> Tá nandihí nasacu na in quiví cahan Pablo xihin ná ta tá naxinu coo mé quiví cán nataca cuahá ndivaha ñayivi mé vehe nu íin Pablo cán. Ta naha ta janda sahini najánaha da nu ná ña cúni Ndióxi cacomí a cuénta sahá ñayivi. Ta xihín ña nacahyí Moisés sanahá ta xihín ña nacahyí na profeta já nandicaní da nu ná sahá Jesús ña ná candeé ini na mé á. <sup>24</sup> Java na cán nacandúsa na ña nacachi Pablo xihin ná joo java na coo naxeen na candúsa na. <sup>25</sup> Ta sahá ña coo nacuu ndique táhan vaha tuhun na Israel cán sahá ña jánaha Pablo sahá ña cán quéa nacasáhá na quée na cuahan na. Tá naxini Pablo ña yóho já nacasáhá cáchí da já xihin ná:

—Mé a ndaa nacahan ínimá yii Ndióxi nuú tásáhnu jíco yo tá nacahyí Isaías já:

<sup>26</sup> Cuáhán cahan xihín ñayivi Israel jan já cachún já xihin ná:

Mé a ndaa táhyí cuni johó ndó joo a cándaa ini ndó. Ta vatí sándehe ndó in ñaha joo co ndícuni ndó ña.

<sup>27</sup> Jáchi ihvi ndivaha cúu ini ndó ta co cúni ndó caja ndó ña cáchí i.

Ta co cúni ndó cuni johó ndó ña cáhan i xihin ndo.

Ta co cúni ndó ndicuni ndó ña cája ndó cuachi.

Jáchi tá ná jándacoo ndó cuachi cája ndó,

já quéa cuu caja cáhnu ini i saha ndo,



ta já cuu coo vaha ini ndó, já ñacachi ínima yii  
Ndióxi xihín tásáhnú jíco yo.

<sup>28</sup> Anda já ñacachi tucu Pablo já xihín ná:

—Ta viti xíní ñúhú candaá ini ndó, ña Israel ña  
sa ñaxini johó ña cóo ñaquixi chichi Israel tuhun  
vaha saha Jesús. Ta cája i cuénta candúsa mé ña cán  
ña —ñacachi Pablo xihín ná.

<sup>29</sup> Tá ñandihi ñacahan Pablo ña yóho já  
ñandituhún cuehe xihín táhan ña Israel cán ta  
já ñaquee na cuahan ña.

<sup>30</sup> Ñacandoo Pablo ivi ní cuja vehe nuú  
ñachahvi ndojo da. Ta ñandiquehe vaha da tóco  
ndihi ña sahan xito nihni ñahá. <sup>31</sup> Ta ni có yíhvi ña  
cáxi tuhun ña xihín ñayivi ña cúni Ndióxi cacomí a  
cuénta saha ná. Ta ñajánaha ña tuhun vaha saha  
Jesucristo, xitoho í ta ni in na cóo ñasaji nuu nu  
dá caja da ña.

**Tuhun saá ña najá<sup>ndacoo</sup> Jesucristo nu yo: El  
Nuevo Testamento en el mixteco de  
Silacayoapan  
New Testament in Mixtec, Silacayoapan  
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Silacayoapan

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022

7f2d3ecf-6d15-55a5-9081-6e970474df2f